

1ታሪኬ ማጻፋ ጊደ ቆፋ

ከይሮ ታሪኬ ማጻፋይ ሳሜላ ማጻፋኒኔ ካዎታ ማጻፋታን ዲዛ ታሪኬታ ሃራ ኦጌራ ዛሪ ዮቴስ፤ ታሪኬ ማጻፋቲ ኢሰራኤል ካዎታ ታሪኬ ገሻስ አይፌ ጊዲዳ ናሞኡ ቆፋታ ዮቴቴስ።

1. ኢሰራኤል ካዎቴላቲኔ የሁዳ ካዎቴላቲ ሞሮን ኩንዲዳ ጊዲኮካ ጸሲ ባ ዴሪዛስ እሚዳ ሂደታ ቃላ ኡባ ናጊዲይሳ የሁዳን ዲዛ አሳ ባጋራ እዚ ባ ዴራስ ቆፒዳይሲ ኦሶ ቦላ ፔኦይሳ ቤሳናሳ፤ ሄሲ ቱሙ ጊዲዳይሳ ኤሪሳናስ ሃ ማጻፋ ጸፊዳ ዳዊቲኔ ሶሎሞኔይ ኦሊዳ ጊታ ኦሶታ፣ ኢዮሳፊጾይ ሂዘቂያሲኔ ኢዮሲያሲ ኦሊዳ ኦሪጸሶ ኦሶታኔ ጸሳስ ኢሰታ ኣማኔቴሊ ሚኒዳ ዴራ ሎኤሊ ቤሴስ (1-12)።
2. ዬሩሳላሚን ዲዛ ጸሳ ኬላን ጸሳስ ጎይኖይ ዋኒ ዶሜቲዳኮ ቆንጨሳናሳ፤ ቃሴ ሄ ዎዴ ጎይኖ ዎጋ ካሌሊዛይቲ ቄሴታ ጊዲዳ ገሻስ ኢሰቲ ካሌሊዛ ኦሶ ኬላይ ዋኒዲ ዶሜቲዳኮ ቆንጨሳናሳ፤ ጸሳ ኬላ ኬጲዳይ ሶሎሞኔ ጊዲኮካ ኮይሮ ጸሳ ኬላን ጎይኖ ዎጋ ኤሲዳይ ዳዊቲ ጊዳይሳ ኤሪሳናሳ። (13-29)

ሃ ማጻፋይ ኦይኪዳ ኩሜላ ቆፋ

አዳሜ ዛሬፔ ቢዲ ካዎ ሳኦሌ ጋካናስ 1:1—9:44
 ሳኦሌ ሃይቆኔ ኢዛ ናይታ ሃይቆ 10:1-14
 ዳዊቲ ካዎቲዲ ዬሩሳላሚ ኦይሉ 11:1-9
 ዳዊቲ ዎታዳራ ሚኖታ 11:10—12:40
 ታቦታ ዬሩሳላሚ ኤፎ 13:1—16:43
 ጸሳ ኬላ ኬጲናይ ሶሎሞኔ 17:1-27
 ዳዊቲ ዎታዳራታ ጸኖ 18:1—20:8
 ዳዊቲ ዴራ ቆዲን ጋኪዳ ሃንቆ 21:1-30
 ጸሳ ኬላ ኬጲናስ ገኒቴሉ 22:1—28:21
 ጸሳ ኬላ ኬጲናስ እሚቲዳ አሞታ 29:1-20
 ሶሎሞኔ ካዎቴሉ 29:21-25
 ዳዊቲ ሃይቆ 29:26-30

አዳሜፔ ቢዲ ኣብራሃሜ ጋካናስ ዲዛ ዬሌታ
 (ሜዴ 5:1-32፤ 10:1-32፤ 11:10-26)

1 አዳማይ ሴቲ ዩሊዳስ፤ ሴቲይ ሄኖሴ ዩሊዳስ፤ ሄኖሴይ ቃይናኔ ዩሊዳስ።

2 ቃይናኔይ ማላልኤሌ ዩሊዳስ፤ ማላልኤሌይ ያሬዳ ዩሊዳስ።

3 ያሬዳይ ሄኖኬ ዩሊዳስ፤ ሄኖኬይ ማቱሳላ ዩሊዳስ፤ ማቱሳላይ ላሜኬ ዩሊዳስ።

4 ላሜኬይ ኖሄ ዩሊዳስ፤ ኖሄይ ሴሜ፡ ካሜኔ ያፌቲ ዩሊዳስ።

5 ያፌቲይ፡ ጎሜሬ፡ ማጎጌ፡ ማዳዬ፡ ያዋኔ፡ ቱባሌ፡ ሜሼኬኔ ቲራሴ ጌቲቲዛ አቱማ ናይታ ዩሊዳስ።

6 ጎሜሬ ናይቲ አሽኬናዙ፡ ኤሬፋሲቲኔ ቶጋርማ።

7 ያዋኔ ናይቲ ኤሊሼ፡ ታርሴሴ፡ ኪቲሜኔ ኦርዳሂሜ።

8 ካሜ አቱማ ናይቲ ኩሼ፡ ሚጺራይሜ፡ ፑጾኔ ካናኔ።

9 ኩሼ ናይቲ ሴባ፡ ሃዊላ፡ ሳባ፡ ኤራኢሜኔ ሳቢቲካ፤ ኤራኢሜ አቱማ ናይቲ ሳባኔ ዳዳኔ።

10 ኩሼይ ናሙሩዳ ዩሊዳስ፤ ናሙሩዳይካ አላሜ ቦላ ኤሬቲዳ ዎልቃማ ኦላንቻ ጊዲዳስ።

11 ሚጺራይሜይ ሉዲሜታ፡ አናሜታ፡ ላሃቤታ፡ ናፍቱሄታ፡

12 ጸጺሮሴታ፡ ካሲሉሄታኔ ፊሊስጾሜ ዛሬታ ዩሊዳ ካፍቶሬታ ዩሊዳስ።

13 ካናኔይ ባይራ ና ሲዶናሲኔ ኢዛ ካሎ ሂቲስ አዋ፤

14 ቃሴካ ካናኔይ ያቡሴታስ፡ አሞሬታስ፡ ጌርጌሴታስ፡

15 ሂዊታስ፡ አርቁታስ፡ ሲኔታስ፡

16 አርዋዴታስ፡ ጸማሬታሲኔ ሃማቲታስ አዋ።

17 ሴሜ ናይቲ፡ ኤላሜ፡ አሶሬ፡ አርፋኪሲዳ፡ ሉዳ፡ አራሜ፡ ኡጾ፡ ሁሌ፡ ጌቲሬኔ ሜሼኬ፤

18 አርፋኪሲዳይ ሼላሄ ዩሊዳስ፤ ሼላሄይ ኤቦሬ ዩሊዳስ፤

19 ኤቦሬይ ናሞኡ አቱማ ናይታ ዩሊዳስ፤ ኢሶይ ዩሌቲዳ ዎዳ ሳኣይ ሻኬቲዳ ጊሻስ ኢዛ ሱንሳ ፔሌጌ ጌቲቲዳስ፤ ናሞኣንሶዚ ዮቁጸኔ ጌቲቲዳስ።

20 ዮቁጸኔይ አልሞዳዳ፡ ሼሌፌ፡ ሃጻርማዌቲ፡ ዩራሄ

21 ሃዶራሜ፡ ኡዛሌ፡ ዲቂሌ

22 ኤባሌ፡ አቢማኤሌ፡ ሳባ፡

23 ኦፊሬ፡ ሃዊላኔ ዮባቤ ዩሊዳስ፤ ሃይቲ ዉሪካ ዮቁጸኔ ናይታ።

24 ሴሜፔ ቢዲ አብራሃሜ ጋካናሰ ዲዛ ዩሌታ ዛርኬይ ሃይሳፌ ካሊ ዲዛይታ ኦይኬስ፤ ኢስቲካ ሴሜ፡ አርፋኪሲዳ፡ ሼላሄ፡

25 ኤቦሬ፡ ፔሌጌ፡ ኤራኤ፡

26 ሳሩጌ፥ ናኮሬ፥ ታራኔ

27 ጌዬ፤ ኣብራሃሜ ጌቴቲዳ ኣብራሚ።

ኣብራሃሜ ሶ ኣሳታ

(ሜዴ 25:12-16)

28 ኣብራሃሜይ ዩሳቃኔ ኢሰማኤል ዩሊዳስ።

ኣጋራ ኣብራሃሜስ ዩሊዳ ናይታ

29-30 ኣብራሃሜይ ኣጋሪ፤ ኢሰማኤል ዩሊዳስ፤ ኢሰማኤልይ ዩሊዳ ባይራ ናዛ ሱንሒ ኔባዮቴ ጌዲሺን ኢዛ ካሎቲ ቁዳሬ፥ ኣዲቢኤሌ፥ ሚቢሳሚ፥ ሚሺማኤ፥ ዱማ፥ ማሳ፥ ሃዳዳ፥ ቴማ፥

31 ዩዱሬ፥ ናፊሻኔኔ ቁዲማ ጌቴቴሰ።

ከጹራይ ኣብራሃሜስ ዩሊዳ ናይታ

32 ከጹራይ ኣብራሃሜስ ዩሊዳ ኡሱፑን ኣቱማ ናይቲ ዘሚራኔ፥ ዮቁሻኔ፥ ማዳ፥ ሚዲያኔ፥ ዩሺባቄኔ ሹሃ ጌቴቴሰ። ዮቁሻኔይ ሳባኔ ዳዳኔ ጌቴቲዛ ናሞኡ ኣቱማ ናይታ ዩሊዳስ።

33 ሚዲያኔይካ ኤፋ፥ ኤፌሬ፥ ሄኖኬ፥ ኣቢዳኤኔ ኤልዳኤ ጌቴቲዛ ኢቻሹ ኣቱማ ናይታ ዩሊዳስ፤ ሃይቲ ኡባይ ከጹራ ዜሬሳታ።

ኣብራሃሜይ ሳራ፤ ዩሊዳ ዛሬታ

(ሜዴ 36:1-19)

34 ኣብራሃሜይ ሳራ፤ ዩሊዳስ፤ ዩሳቂ ኤሳቄኔ ኢሰራኤል ዩሊዳስ።

35 ኤሳቄይ ኤልፋዜ፥ ኤራኡኤል፥ ያኡሹ፥ ያኢላሚኔ ቆሬ ዩሊዳስ።

36 ኤልፋዜይ ቴማኔ፥ ኦማሬ፥ ጳፌ፥ ጋኢታሚ፥ ቄናዜ፥ ቴሚናኤኔ ኣማሌቄ ጌቴቲዛ ኣቱማ ናይታ ዩሊዳስ።

37 ኤራኡኤሊይ ናሃቴ፥ ዛራሄ፥ ሻማሃኔ ሚዛሄ ጌቴቲዛ ኣቱማ ናይታ ዩሊዳስ።

ኤዶሜን ኮይሮ ዳኢዳ ኣሳታ

(ሜዴ 36:20-30)

38 ኤዶሜን ኮይሮ ዳኢዳ ሴይሬ ኣቱማ ናይቲ ሎጻ፥ ሾባሌ፥ ጸባኦኔ፥ ኣና፥ ዲሹ፥ ኤጼሬኔ ዲሻኔ።

39 ሎጻኔ ኣቱማ ናይቲ ሆሬኔ ሆማሜ፤ ቴሚናኢ ሎጻኔሰ ሚቾ።

40 ሾባሌ ኣቱማ ናይቲ ኣሊዋ፥ ማናሃቴ፥ ኤባሌ፥ ሼፌኔ ኦናሜ።

ጸባኦኔ ኣቱማ ናይቲ ኣያኔ ኣና።

41 አናይ ዲሾኔ ዩሊዳስ፤ ዲሾኔ አቱማ ናይቲ ሄምዳ፥ ኤሺባኔ፥
ዩቲራኔኔ ካራኔ።

42 ኤዬሬ አቱማ ናይቲ ቢሊሃኔ፥ ዛኢዋኔኔ ያቂኔ።
ዲሻኔ አቱማ ናይቲ ኡዬኔ አራኔ።

ኤዶሜ ዳሬ ካዎታ

(ሜዶ 36:31-43)

43 ኢሰራኤልን አይ ካዎይካ ካዎታናፕ ካሴ ኤዶሜ ቢታን
ካዎቲዳ ካዎቲ ሃይሳፌ ካሊ ጸፌቲዳይታ።

ቢኦሬ ና ቤላይ ካዎቲዳስ፤ ኢዛ ካታማ ሱንላይ ዲናቤ።

44 ቤላይ ሃይቂን ኢዛፕ ካሊዲ ቦዲራ ዳሬ አስ ዛራሄ ና
ዮባቤይ ካዎቲዳስ።

45 ዮባቤይ ሃይቂን ኢዛፕ ካሊዲ ቱማኔ ዳሬ አስ ሁሻሜይ
ካዎቲዳስ።

46 ሁሻሜይ ሃይቂን ኢዛፕ ካሊዲ ሞአቤ ዳሬን ሚዲያሜታ
ጸኒዳ ባዳዳ ና ሃዳዳይ ካዎቲዳስ፤ ኢዛ ካታማያ አዊቲ
ጌቲታዉስ።

47 ሃዳዳይ ሃይቂን ኢዛፕ ካሊዲ ማሲሬቄ ዳሬ አስ ሻኡሌይ
ካዎቲዳስ።

48 ሻኡሌይ ሃይቂን ኢዛፕ ካሊዲ ኤፊራዲሴ ሻፋ ማታን
ዲዛ ኤሪሆቦቲ ዳሬ አስ ሳኦሊ ካዎቲዳስ።

49 ሳኦሊ ሃይቂን ኢዛፕ ካሊዲ አኪቦሬ ና ባኦሊ-ሃናኔይ
ካዎቲዳስ።

50 ባኦሊ-ሃናኔይ ሃይቂን ኢዛፕ ካሊዲ ፓኡ ዳሬ አስ ሃዳዳይ
ካዎቲዳስ፤ ኢዛ ማቹያካ ማሄጸቢኡላ ሜዛሃቤ ና ማጺሬዳ ቢዮ፤
ሄሳፌ ጉዬ ሃዳዳይ ሃይቂዳስ።

51 ኤዶሜን ኬሂ ኤሬቲዛ ሃላቃቲ ቲሚናኤ፥ አሊዋ፥ ዩቲቲ፥

52 ኦሆሊባሜ፥ ኤላ፥ ፒኖኔ፥

53 ቄናዜ፥ ቲማኔ፥ ሚቢዛሬ፥

54 ማጊዲኤሌኔ ኢራሜ ጌቲቲቲስ።

2

ያቆቤ ናይታ

1 ያቆቤይ 12 አቱማ ናይታ ዩሊዳስ፤ ሄይቲካ ኦሮቤሌ፥
ሲሞና፥ ሊዌ፥ ዩሁዳ፥ ዩሳኮሬ፥ ዛቢሎኔ፥

2 ዳኔ፥ ዮሴፌ፥ ቢኒያሜ፥ ኒፍታሌሜ፥ ጋዴኔ አሴሬ።

ዩሁዳ ናይታ

3 የሁዳይ ካናኔ ዳሬ እስ ሹኣ ቢይፔ ኤራ፥ ኦናኔኔ ሴላ ጌቴቲዛ ሄቹ አቱማ ናይታ ዩሊዳስ፤ ኢዛስ ባይራ ናዚ ኤራይ ጎዳ ሲገላገ ኢታ እስ ጊዲዳ ጊሻስ ጎዳይ ኢዛ ቦሻገ ዎጂዳስ።

4 የሁዳይካ ባ ናዛ ማቾ ቲኢማሪፔ ፓሪሴኔ ዛራሄ ጌቴቲዛ ናሞኡ አቱማ ናይታ ዩሊዳስ፤ የሁዳይ ኢቻሽ አቱማ ናይታ ዩሊዳስ።

ፓሪሴ አቱማ ናይታ

5 ፓሪሴይካ ሄጺሮሜኔ ሃሙሌ ጌቴቲዛ ናሞኡ አቱማ ናይታ ዩሊዳስ።

ዛራሄ ናይታ

6 ዛራሄይ ኢቻሹ አቱማ ናይታ ዩሊዳስ፤ ሄይቲካ ዚሚሬ፥ ኤታኔ ሄማኔ፥ ካልኮሌኔ ዳራ።

7 ዛራሄ ዜሬላፌ ጊዲዳ ካርሜ ና ኣካኔይ ጸሳስ ዱማቲዳ ዲኦ ሚሻፌ ካይሶቲዲ ቆቲዳ ጊሻስ ኢስራኤሌ ዳራ ቦላ ሜቶ ኤሂዳስ።

8 ኤታኔይካ ኣዛሪያ ጌቴቲዛ ኢሲ አቱማ ና ዩሊዳስ።

9 ሄጺሮሜይ ሄቹ አቱማ ናይታ ዩሊዳስ፤ ሄይቲካ ዩራሂሞኤሌ፥ ኣራሜኔ ካሉቤ።

ካዎ ዳዊቲ ዩሊታ ዛርኬ

10 ኣራሜይ ኣሚናዳቤ ዩሊዳስ፤ ኣሚናዳቤይ የሁዳ ናይታስ ሃላቃ ጊዲዳ ኔኣሶኔ ዩሊዳስ።

11 ኔኣሶኔይ ሳላሞ ዩሊዳስ፤ ሳላሞይካ ቦኤዜ ዩሊዳስ።

12 ቦኤዜይ ኢዮቤዳ ዩሊዳስ፤ ኢዮቤዳይካ ኢሴዬ ዩሊዳስ።

ኢሴዬ አቱማ ናይታ

13 ኢሴዬ ባይራ ናዚ ኤልያቤ፤ ኤልያቤ ካሎቲ ኣቢናዳቤ፥ ሺሞኣ፥

14 ናቲናኤሌ፥ ኤራዴ፥

15 ኦጼሜኔ ዳዊቲ።

16 ኢስታ ሚቹቲ ጹሪያኔ ኣቢጋሎ ጌቴቲቲስ፤ ጹሪያይ ኣቢሳዬ፥ ኢዮኣቤኔ ኣሳሄሌ ጌቴቲዛ ሄቹ አቱማ ናይታ ዩሊዳስ።

17 ኣቢጋላ ኢስማኤሌ ዜሬላፌ ጊዲዳ ዮቶሬስ ኣማሳ ጌቴቲዛ አቱማ ና ዩሊዳስ።

ሄጺሮሜ ና ካሌቤ ዜሬላታ

18 ሄጺሮሜ ና ካሌቤይ አዙቦ ጌቴቲዛር ማቾ ኤኪዲ ዪርአቶ ጌቴቲዛ ማጫ ና ዩሊዴስ፤ ዪርአታካ ዩሼሬ፥ ሾባቤኔ አርዶኔ ጌቴቲዛ ሄዙ አቱማ ናይታ ዩሊዴስ።

19 አዙባ ሃይቂዳፔ ጉዬ ካሌቤይ ኤፍራቶ ማቾ ኤኪዲ ሁሬ ጌቴቲዛ አቱማ ና ዩሊዴስ።

20 ሁሬይካ ኡሬ ጌቴቲዛ አቱማ ና ዩሊዴስ፤ ኡሬይ ባሰለኤሌ ዩሊዴስ።

21 ሄጺሮሜይ ኢዛሰ 60 ላይሰ ኩሚሺን ጋላአዴ አዋ ማኪሬ ናዮ ማቾ ኤኪዲ ሳጉቤ ዩሊዴስ።

22 ሳጉቤይካ ያኢሬ ዩሊዴስ፤ ያኢሬይ ጋላአዴ ዴሬን ዲዛ 23 ካታማታ አይሴስ።

23 ጊዶ አቲን ጌሹሬይኔ አራሜይ ቄናቴኒኔ ኢዚ ሄራን ዲዛ 60 ቂሪ ካታማታኔ ያኢሬ ካታማታ ኦሊ ኦይኪዳ፤ ሄይቲ ኡባይካ ጋላአዴ አዋ ማኪሬ ዜሬላታ።

24 ሄጺሮሜይ ካሌቤ ኤፍራታ ጌቴቲዛሶን ሃይቂዳፔ ጉዬ ኢዛ ማቾ አቢያይ ቱቄሄ አዋ አሺሁሬ ኢዛሰ ዩሊዴስ።

ሄጺሮሜ ና ዩራሂምኤሌ ዜሬላታ

25 ሄጺሮሜስ ባይራ ናዚ ዩራሂምኤሌይ 5 አቱማ ናይታ ዩሊዴስ፤ ሄይታፔ ባይራዚ ኤራማ፥ ኢዛ ካሎቲ ቡና፥ ኦሬ፥ አጾሜኔ አካያ ጌቴቲቴስ።

26 ዩራሂምኤሌስ አጻሮ ጌቴቲዛ ሃራ ማቾ ዳዉስ፤ ኢዛ ኦናሜ አዮ።

27 ዩራሂምኤሌስ ባይራ ና ኤራማይ ማጾ፥ ያሚኔኔ ኤቄሬ ጌቴቲዛ አቱማ ናይታ ዩሊዴስ።

28 ኦናሜይ ሻማዬኔ ያዳ ጌቴቲዛ አቱማ ናይታ ዩሊዴስ፤ ሻማዬይ ናዳቤኔ አቢሹሬ ጌቴቲዛ አቱማ ናይታ ዩሊዴስ።

29 አቢሹሬይካ አቢሃይሎ ጌቴቲዛር ማቾ ኤኪዲ አሂባኔኔ ሞሊዴ ዩሊዴስ።

30 ናዳቤይ ሴሌዴኔ አፋይሜ ዩሊዴስ፤ ሴሌዴይ ጊዲኮ ና ዩሎንታ ሃይቂዴስ።

31 አፋይሜይ ዩሺኤ ዩሊዴስ፤ ዩሺኤይ ሼሻኔ ዩሊዴስ፤ ሼሻኔይ አሂላዩ ዩሊዴስ።

32 ሻማዬ ኢሻ ያዳይ ዮቶሬኔ ዮናታኔ ዩሊዴስ፤ ዮቶሬይ ጊዲኮ ና ዩሎንታ ሃይቂዴስ።

33 ዮናታኔይ ፓሌቲኔ ዛዛ ጌቴቲዛ 2 አቱማ ናይታ ዩሊዴስ፤ ሄይቲ ዉሪካ ዩራሂምኤሌ ዜሬላታ።

34 ሼሻኔስ ማጫ ናይታፔ ኣቲን ሃራ ኣቱማ ናይ ዳና፤ ኢዛስ ኦሊዛ ጊብጾ ዳሬ ኣስ ያራሃ ጌቲቲዛ ኦሳንቻይ ዳስ።

35 ሼሻኔይ ባ ማጫ ናዮ ያራሃስ ማቸ ጊዳና ማላ ኢሚዳስ፤ ኢዛካ ኢዛስ ኣታዬ ጌቲቲዛ ኣቱማ ና ዬላዱስ።

36 ኣታዬይ ናታኔ ዬሊዳስ፤ ናታኔይ ዛባዳ ዬሊዳስ፤

37 ዛባዳይ ኤፊላሌ ዬሊዳስ፤ ኤፊላሌይ ኢዮቤዳ ዬሊዳስ፤

38 ኢዮቤዳይ ኢዩ ዬሊዳስ፤ ኢዩይ ኣዛሪያሳ ዬሊዳስ፤

39 ኣዛሪያሳ ሂሌጾ ዬሊዳስ፤ ሂሌጾይ ኤልኣሳ ዬሊዳስ፤

40 ኤልኣሳይ ሲስማዬ ዬሊዳስ፤ ሲስማዬይ ሻሎማ ዬሊዳስ፤

41 ሻሎማይ ዪቃሚያኔ ኤልሻማ ዬሊዳስ።

ሃንኮ ኣቲዳ ካሌቤ ዬሌታ ዛርኬታ

42 ዬራሃሞኤሌ ኢሻ ካሌቤይ ባይራ ናዛ ሜሻ ዬሊዳስ፤ ሜሻይ ዚፌ ዬሊዳስ፤ ዚፌይ ማሬሻ ዬሊዳስ፤ ማሬሻይካ ኬብሮኔ ዬሊዳስ።

43 ኬብሮኔይካ ቆሬ፥ ታጵሄ፥ ኤሬቄሜኔ ሼማኤ ጌቲቲዛ ኣቱማ ናይታ ዬሊዳስ።

44 ሼማኤይካ ኤራሃሚ ዬሊዳስ፤ ኤራሃሚይ ኤሬቄሜ ዬሊዳስ፤ ኤሬቄሜይ ሻማዬ ዬሊዳስ።

45 ሻማዬይ ማኦኔ ዬሊዳስ፤ ማኦኔይካ ቤቲ-ጸሬ ዬሊዳስ።

46 ካሌቤስ ኤፎ ጌቲቲዛ ላጌሶ ማቻ ዳዉስ፤ ካሌቤይ ኢዚፔ ካራኔ፥ ሞዛኔ ጋዛዜ ጌቲቲዛ ሃራ 3 ኣቱማ ናይታ ዬሊዳስ፤ ሃራኔይካ ጋዛዜ ጌቲቲዛ ሃራ ኣቱማ ና ዬሊዳስ።

47 ያሂዳይ ኤርጌሜ፥ ኢዮኣታሜ፥ ጌሻኔ፥ ፓሌጾ፥ ኤፋኔ ሻኣፌ ጌቲቲዛ ኣቱማ ናይታ ዬሊዳስ።

48 ካሌቤስ ማኢካ ጌቲቲዛ ላጌሶ ማቻ ዳዉስ፤ ኢዛካ ሼቤሬኔ ቲሪሃና ጌቲቲዛ ኣቱማ ናይታ ዬሊዳስ።

49 ቃሴካ ማኢካ ሻኣፌኔ ሻዋ ዬላዱስ፤ ሻኣፌይ ማዳማና ዬሊዳስ፤ ሻዋይ ማኪባኔኔ ጊቢኣ ዬሊዳስ። ካሌቤስ ኣኪሳ ጌቲቲዛ ማጫ ናይ ዳዉስ።

50 ካሌቤይ ዬሊዳ ሃራ ናይቲ ሃይሳፌ ካሊ ዲዛይታ፤ ካሌቤይ ኤፍራቲፔ ባይራ ናዛ ኡሬ ዬሊዳስ፤ ኡሬይ ቂሪያቴ-ዪኣሪሚ ኣዋ ሾባሌ።

51 ቤቲሊሄሚ ኣዋ ሳላሞኔ ቤቲ-ጋዴራ ኣዋ ሃሬፌ ዬሊዳስ።

52 ቂሪያቴ-ዪኣሪሚ ኣዋ ሾባሌ ዜሬፋቲ፥ ሄርሄቲኔ ማናሃቲ ቆሞታፔ ባጋታ።

53 ቃሴካ ቂሪያቴ-ዪኣሪሚ ዛርኬቲ ያቲሬታ፡ ፑቴታ፡ ሹማቴታ፡ ሚሺራታ፡ ጸራኣታኔ ኤሽታኦሌታ።

ሳልማ ዜሬላታ

54 ሳላሞ ናይቲ ቤቴሊሄሜ፥ ናጾፊታ፥ ኣዲርታ፥ ቤት ኢዮኣቤ፥ ማናሃቴታ፤ ባጋታኔ ሃጾሬታ።

55 ያቤጾ ካታማን ዲዛ ጸፊዛይታ ዛሬቲ ቃሴ ቲርኣታ፥ ሸምኣታኔ ሱኮቴ፤ ሃይቲ ኤሬካቤታ ኣዋ ሃማቴ፤ ዬሌቲዳ ቂናቂታ።

3

ካዎ ዳዊቲ ናይታ ዛርኬ

1 ዳዊቲ ኬብርኔን ዲሺ ዬሊዳ ኣቱማ ናይታ ሱንሉ ሃይሳፊ ካሊ ዲዛይታ፤

ባይራ ና ኣሚኖኔ
ኢዘራኤሌ ዴሬ ማጫሰ
ኣሂናሆሞ፤ ዬሊዳሰ፤
ኢዛ ካሎ ዳኔላ
ቃርሚሎሴ ዴሬ ማጫሰ
ኣቢጋሊ፤ ዬሊዳሰ።

2 ሄዝንሐዛ ኣቤሴሎሚ
ጌሹሬ ካዎ ታሊማዬ ና
ማኢኪ፤ ዬሊዳሰ።
ኦይዳንሐዛ ኣደኒያሳ
ሃጊቲ፤ ዬሊዳሰ።

3 ኢቻሻንሐዛ ሻፋጺያ
ኣቢጸሊ፤ ዬሊዳሰ
ኡሱፑንሐዛ ዪቲራሚ
ኤግሊ፤ ዬሊዳሰ።

4 ሃይቲ ኡሱፑናቲ ዳዊቲ ኬብርኔን ላቸን ላይሊኔ ባጋ ዴራ ኣይሲዛ ዎዴ ዬሌቲዳ፤ ዳዊቲ ዬራሳላሚን 33 ላይሊ ካዎቲዳሰ።

5 ኢዚ ሄን ዲሺ ዬሊዳ ኣቱማ ናይቲ ሃይሳፊ ካሊ ዲዛይታ፤
ኣምኤሌ ና ቤርሳቤሃ ሸምኣ፥ ሾባቤ፥ ናታኔኔ ሶሎሞኔ ጌቲቲዛ
ኦይዱ ኣቱማ ናይታ ኢዛሰ ዬላዲሰ።

6 ቃሴ ሃራ ኡዱፋን አቱማ ናይቲ ኢዛሰ ዳቴሰ፤ ሄይቲካ ኢያቤሄሬ፥ ኤልሱኤ፥ ኤልፋሌዬ

7 ኖጋሄ፥ ኔፌጌ፥ ናፊያ፥

8 ኤልሻማ፥ ኤልኣዳኔ ኤልፋሌዬ ጌቴተዛይታ።

9 ሄይታፔካ ሃራ ዳዊቲ ጋራዳታፔ ዩሊዳ አቱማ ናይቲ ዳቴሰ፤ ኢሰታሰካ ቲኢማር ጌቴተዛ ሚቻ ዳዉሰ።

ካዎ ሶሎሞን ናይታ ዛርኬ

10 ካዎ ሶሎሞን ይ

ኤርቢኣሜ ዩሊዳሰ፤

ኤርቢኣሜ ያኢያ ዩሊዳሰ፤

ኣቢያይ ኣሳ ዩሊዳሰ፤

ኣሳይ ኢዮሳፊዬ ዩሊዳሰ፤

11 ኢዮሳፊዬ ኢዮራሜ ዩሊዳሰ፤

ኢዮራሜ ያካዚያሳ ዩሊዳሰ፤

ኣካዚያሲ ኢዮኣሳ ዩሊዳሰ፤

12 ኢዮኣሲ ኣማሲያሴ ዩሊዳሰ፤

ኣማሲያሲ ኣዛሪያሴ ዩሊዳሰ፤

ኣዛሪያሲ ኢዮኣታሜ ዩሊዳሰ፤

13 ኢዮኣታሜ ያካዜ ዩሊዳሰ፤

ኣካዜ ያካዜ ያካዜ ዩሊዳሰ፤

ሂዝቂያሲ ሚናሴ ዩሊዳሰ፤

14 ሚናሴ ያኣሞን ዩሊዳሰ፤

ኣሞን ኢዮሲያሳ ዩሊዳሰ፤

15 ኢዮሲያሲ ኦይዱ

አቱማ ናይታ ዩሊዳሰ፤

ባይራዚ ዮሃናኔ፥

ኢዛ ካሎቲ ኢዮኣቄሜ፥

ሴዳቂያሳኔ ሻሎሜ፤

16 ኢዮኣቄሜ ኢኮኒያኔ

ሴዳቂያሳ ዩሊዳሰ።

ካዎ ኢኮኒያኔ ናይታ ዛርኬ

17 ባቢሎን ዳኤቲ ቢዳ ኢኮኒያኔ ናይቲ ሳላቲያሌ፥

18 ማሊክራሜ፥ ፓዳያ፥ ሼናጻሬ፥ ዪቃሚያ፥ ሆሻሜኔ ናዳቢያ ጌቴተዛይታ።

19 ፓዳያይ ዜሩባቤሌኔ ሺምኤ ዩሊዳሰ፤ ዜሩባቤሌይካ ማሹላሜ፥ ሃናኒያኔ ኢሰታ ሚቻ ሻሎሚቶ ዩሊዳሰ።

20 ቃሴካ ሃራ ኢቻሽ አቱማ ናይቲ ኢዛሰ ዴቲስ፤ ሄይቲካ ሃሹቤ፥ ኦሄሌ፥ ባራካዬ፥ ሃሳዲያን ዮሻቢ-ሄሲዴ።

21 ሃናኒያይ ፓላጺያን ዬሻኢያ ጌቲቲዛ ናሞኡ አቱማ ናይታ ዬሊዴስ፤ ዬሻኢያይካ ኤራፋያ ዬሊዴስ፤ ኤራፋያይ ኦርናኔ ዬሊዴስ፤ ኦርናኔይ አብዲዩ ዬሊዴስ፤ አብዲዩይ ሻካኒያ ዬሊዴስ።

22 ሻካኒያይካ ሻማኤ ዬሊዴስ፤ ሻማኤይ ሃጹሹ፥ ዪጊአሌ፥ ባርያሄ፥ ናራያን ሳፋጼ ጌቲቲዛይታ 5 አቱማ ናይታ ዬሊዴስ፤ ሻካኒያ ዜሬፋቲ ኩሜሊ ኡሱፑና።

23 ናራያይ ኤልዮኤናዬ፥ ሂዝቂያሳኔ አዚርቃሜ ጌቲቲዛ 3 አቱማ ናይታ ዬሊዴስ።

24 ኤልዮኤናዬይ ሆዳዬ፥ ኤልያሹቤ፥ ፔላያ፥ አቁቤ፥ ዮሃናኔ፥ ዳላያኔ አናኔ ጌቲቲዛ 7 አቱማ ናይታ ዬሊዴስ።

4

ዩሁዳ ዬሌታ ዛርኬ

1 ዩሁዳ ዜሬፋቲ ፓሪሴ፥ ሄጺሮሜ፥ ካርሜ፥ ሁሬኔ ሾባሌ።

2 ሾባሌይ ኤራአዬ ዬሊዴስ፤ ኤራአዬይካ ያሃቴ ዬሊዴስ፤ ያሃቴይካ ጸራአታስ ኮይሮ አዋ ጊዲዲይታ አሁማዬኔ ላሃዴ ዬሊዴስ።

3-4 ሁሬይ ባ አዮ ኤፍራታስ ባይራ ና፤ ሁሬይ ቤቴሊሄሜ ዬሊዴስ፤ ኤጻሜ አቱማ ናይቲ ኢዝራኤሌ፥ ዩሺማኔ ዩዲባሹ፤ ኢስታስ ሚቻ ሃጺሌሊፖኖ ጌቲታዉስ፤ ፓኑኤሌይ ጋዶሬ ዬሊዴስ። ኤዜሬይ ሁሽ ዬሊዴስ፤ ሃይቲ ሁሬ ዛሬታ።

5 ቱቁሄ አዋ አሺሁሬስ ሄሎኔ ናኢሮ ጌቲቲዛ ናሞኡ ማቹቲ ዴቲስ።

6 አሺሁሬይ ናኢሮ ጌቲቲዛ ባ ማቹይፊ አሁዛሜ፥ ሄፌሬ፥ ቱሜናኔ አሃሺታሬ ጌቲቲዛ አቱማ ናይታ ዬሊዴስ።

7 ቃሴካ ሄለፔ ጸሬቲ፥ ጸሃሬ፥ ኤቲናኔ ቆጼ ዬሊዴስ።

8 ሃቆጼይ አኑቤ፥ ጸባቤኔ ሃሩሜ ና አሃርሄሌ ዜሬፋታስ አዋ።

9 ያቤጾይ ባ ኢሻታ ጊዶን ኬሂ ቦንቹቲዳ አስ ጊዲዴስ፤ ኢዛ አያ፥ «ታኒ ኢታ ሚጸን ዬሊዲይሳ» ጋሼ ኢዛ፥ «ያቤጾ» ጋ ሱንሳዲስ።

10 ያቤጾይካ፥ «አቤት ኅዳዉ! ኔ ታና አንጃ፤ ኔ ታ ዴራ አሳ፤ ኔ ኩሽይ ታናራ ዴኦ፤ ታና ሜቶፔኔ ቆሆፔ አሻ» ጊዲ ኢስራኤሌ ጸሳ ዋሲዴስ፤ ጸሲካ ኢዚ ዋሲዲይሳ ኢዛስ ኢሚዴስ።

ሃራ አሳታ ዩሌታ ዛርኬ

11 ሹሃሃ ኢሻ ካሉቤይ ማሂሪ ዩሊዳስ፤ ማሂሪይ ኤሽቶኔ ዩሊዳስ።

12 ኤሽቶኔይ ቤቲ-ራፋ፥ ፋሳሄኔ ኢር-ናሃሼ አዋ ታሂና ጌቲቲዛ አቱማ ናይታ ዩሊዳስ፤ ታሂናይ ናኣሼ ጌቲቲዛ ካታማ ኤሲዳስ፤ ሄይታ ዜሬፋቲ ካሴ አራካ ጌቲቲዛ ዳሬን ዳቲስ።

13 ቃናዜይ ኦቲንኤሌኔ ሳራያ ጌቲቲዛ ናምኡ አቱማ ናይታ ዩሊዳስ፤ ኦቲንኤሌይካ ሃታቴኔ ማኦኖታዬ ጌቲቲዛ ናምኡ አቱማ ናይታ ዩሊዳስ።

14 ማኦኖታዬይ ኦፊራ ዩሊዳስ።

ሳራያይካ ኩሼ ሂላንቻቲ ዲዛ ጌሃሪሺዋ ጌቲቲዛ ካታማዮ ኤሲዳ ኢዮኣቤ ዩሊዳስ።

15 ዮፊኔ ና ካሌቤይ ኢር፥ ኤላኔ ናኤማ ጌቲቲዛ አቱማ ናይታ ዩሊዳስ፤ ኤላይ ቁናዜ ዩሊዳስ።

16 ዩሃሌልኤሌይ ዚፌ፥ ዚፋ፥ ቲሪያኔ አሳርኤሌ ጌቲቲዛ አቱማ ናይታ ዩሊዳስ።

17 ኤዚራይ ዮቶሬ፥ ሜሬዳ፥ ኤፌሬኔ ያሎኔ ዩሊዳስ፤ ሜሬዳይ ጊብጾ ካዋ ናዮ ቢትዮ ማቾ ኤኪዲ ማራዋ ጌቲቲዛ ማጫ ናዮ፥ ሻማዬኔ ኤሽታዋኣ አዋ ዩሺባ ዩሊዳስ።

18 ሜሬዳይ ጋዶሬ አዋ ያሬዳ፥ ሶኮ አዋ ሄቤሬ፥ ዛኖሄ አዋ ዩቁቲኤሌ ኣይሁዳ ዳሬ ማጫሳይፌ ዩሊዳስ፤ ሄይቲካ ጊብጾ ካዋ ናዮ ቢትያ ሜሬዳስ ዩሊዳ ዛሬታ።

19 ሆዲያይ ናሃዋ ሚቾ ኤኪዳስ፤ ኢዛ ጋሪሚቲ ዳሬ ኣስ ቂኢላ አዋኔ ማኢካቲ ዳሬ ኣስ ኤሽታዋኣ አዋ ዩላዱስ።

20 ሺዋኒ አሚኖኔ፥ ኤራኔ፥ ቤኒ-ሃናኔኔ ቲሎኔ ዩሊዳስ፤

ዩሺኤይ ዞሄቴኔ ቤኒ-ዞሄቴ ዩሊዳስ።

ሴላ ናይታ ዛርኬ

21 ዩሁዳ ና ሴላ ዛሬቲ ሌካ አዋ ኤራ፥ ማሬሻ አዋ ላዳኔ ቤቲ-ኣሺቤኣ ካታማን ዳኢዛ ላይኖ ዳዲዛይታ ቆዋታስ አዋ።

22 ሃራቲ ቃሴ ዮቂሜ፥ ኢዮኣሳ፥ ያሹቢሊሄሜ፥ ሞኣቤ ቢታ ሃሪዳ ሳራፋኔ ኮዜቤ ካታማ ኣሳታ፤ (ሃ ዩሌታታ ታሪክ ማዘጋባይ ቤኒሶፌ ዳስ።)

23 ኢስቲ ካዋ ኬፋ ኦሶስ ኡርቃ ሜፉዛይታ ጊዲዲ ካሴ ናጻሜኔ ጋዶሬ ጌቲቲዛ ካታማታን ዳኢዳ።

ሲዋና ናይታ ዛርኬ

24 ሲዋኒ ናሙኤሌ፥ ያሚኔ፥ ያሪቤ፥ ዛራሄኔ ሻኤሌ ዩሊዳስ።

25 ሻኡሌይካ ሻሎሜ ዩሊዳስ፤ ሻሎሜይ ሚቢሳሚ ዩሊዳስ፤ ሚቢሳሚይ ሚሺማኤ ዩሊዳስ።

26 ሚሺማኤይ ሃሙኤሌ ዩሊዳስ፤ ሃሙኤሌይ ዛኩሬ ዩሊዳስ፤ ዛኩሬይ ሺሞኤ ዩሊዳስ፤

27 ሺሞኤይ ታማኔ ኡሱፑን አቱማ ናይታኔ ኡሱፑን ማጫ ናይታ ዩሊዳስ፤ ኢዛ ኢሻቲ ጊዲኮ ዳሮ ናይታ ዩሊቤቴና፤ ሄሳ ጊሻሰ ሲሞና ዛርኬቲ ዩሁዳ ዛርኬታ ማላ ዳሪቤቴና።

28 ሲሞና ዛሬቲ ቤርሳቤሄ ካታማኒኔ ሞላዴ፥ ሃጸሬ-ሹአሌ፥

29 ቢሊሃ፥ ኤጼሜ፥ ቶላዴ፥

30 ባቱኤሌ፥ ሆርማ፥ ጸጊላጌ፥

31 ቤቲማርካቦቲ፥ ሃጸሬ-ሱሲሜ፥ ቤቲ-ባሬኔ ሻኢራይሜ ካታማታን ዴኢዳ፤ ዳዊቲ ካዎታና ጋካናሰ ሄይቲ ኢስታ ካታማታ ጊዲዳ።

32 ቃሴ ኢስታ ሞላቲ ኤጸሜ፥ ኣዪኔ፥ ኣርሞኔ፥ ቶኬኔኔ ኣሻኔ፤ ኢስቲ ሙሌራ ኢቻሽ ካታማታ።

33 ባኣላ ጋካናሰ ሃ ካታማታ ዩሾን ዲዛ ሞላቲ ኡባይ ኢስታ ቦላ ጉጃቲቴስ፤ ሄይቲ ኢስቲ ዴኢዳሶሆታኔ ኢስታ ዩሌታታ ማራን ማዝጋባን ጸፊ ኦይኪዳ።

34 ሲሞና ዛሬታ ሃላቃቲ ሃይሳፌ ካሊ ጸፊቲዳይታ፤ ኢስቲካ ማሾባቤ፥ ያምላኬ፥ ኣማሲያሴ ና ዮሻ፥

35 ኢዩኤሌ፥ ዮሺቢያ ና ኢዩ፥ (ሳራያ ና ዮሺቢያ፥ ኣሳኤሌ ና ሳራያ፥)

36 ኤልዮኤናዬ፥ ያኮቤ፥ ሾሃያ፥ ኣሳያ፥ ኣዲኤሌ፥ ያሺሞኤሌ፥ ባናያኔ ዚዛ።

37 ዚዛይ ሺፍኣ ና፥ ሺፍኣይ ኣሎኔ ና፥ ኣሎኔይ ዩዳያ ና፥ ዩዳያይ ሺሚሬ ና፥ ሺሚሬይ ሻማኤ ና።

38 ሃይሳፌ ቦላን ጸፊቲዳ ኣሳቲ ባንታ ዛርኬታስ ዛርኬታስ ኮራፒኔታ፤ ኢስታሶ ኣሳታ ዜሬላ ኬሂፔ ጮራቲ ጮራቲ ቢዳስ።

39 ኢስቲ ባንታ ሜሄታስ ሄንፋሶሆ ኮያናሰ ጋዶሬ ጌሊዛሶ ማታን ዲዛ ሾባፌ ኣርሼይ ሞኪዛ ባጋራ ዲዛሶታ ጋካናሰ ቢዳ።

40 ኢስቲ ሄን ኬሂፔ ኣራዳኔ ሎኦ ሄንፋሶሆ ዴሚዳ፤ ሄ ቢታያ ዋፓይኔ ሳርይ ኩሚዳ ኣሆ ቢታ፤ ካሴ ሄን ካሜ ዜሬላቲ ዴቴስ።

41 ሃይሳፌ ቦላራ ኢስታ ሱንፋይ ጸፊቲዳ ሲሞና ዛሬቲ ዩሁዳ ካዎ ሂዘቂያሳ ዋዴ ጋዶሬ ቢታ ቢዲ ሄን ዲዛ ካሜ ዜሬላታኔ ማኤኔ ኣሳታ ኦሊዲ ጳይሲዳይታ፤ ሂስቲዲ ሄ ቢታን ኢስታ

ሚሄታስ ሄሚዘሶሆይ ዲዛ ጊሻስ ሲሞና ዛሬቲ ሃች ጋካናስ ሄን ኡቲዳ።

⁴² ሲሞና ዛሬታፔ 500 አሳቲ ሴይሬ ዙማኮ ቢዳ፤ ኢስታ ሃላቃቲ ፓላጺያ፤ ናራያ፤ ኤራፋያኔ ኡዚኤሌ፤ ሄይታንቲ ዪሺኤ ናይታ።

⁴³ ካሴ ባቃቲ አቲዳ አማሌቄ አሳታ ሲሞና ዛሬቲ ቆይሲዳ፤ ኢስቲ ሃች ጋካናስ ሄ ቢታን ዳቴስ።

5

ኦርቤሌ ናይታ ዛርኬ

¹ ያቆቤስ ኮይሮ ባይራ ና ኦርቤሌ ዜሬላቲ ሃይሳፌ ካሊ ዲዛይታ፤ ኦርቤሌይ ባ አዋ ሂጻ ቱኒሲዳ ጊሻስ ኢዛ ባይራቴላ ማታይ ዮሴፌ ዜሬላታስ አሜቲዳስ፤ ሃሳፌ ዳንደይሳን ኢዛ ዜሬላቲ ባይራቴላ ማራን ጸፊቲቤቴና።

² ባይራቴላ ማታይ ዮሴፌ ዜሬላታስ አሜቲኮካ ዩሁዳይ ባ ኢሻታ ጊዶን ሚኖ ጊዲዳ ጊሻስ ዳሬ አይሲዛዳይ ኢዛ ዜሬላፌ ኬዚዳስ።

³ ያቆቤስ ባይራ ና ኦርቤሌ አቱማ ናይቲ ሄኖኬ፤ ፓሉ፤ ሄጺሮሜኔ ካርሚ ጌቲቲዛይታ።

⁴ ኢዩኤሌ ናይ ሻማኤ፤ ሻማኤ ናይ ጎጌ፤ ጎጌ ናይ ሸምኤ፤

⁵ ሸምኤ ናይ ሚኪያሳ፤ ሚኪያሳ ናይ ኤራኣዬ፤ ኤራኣዬ ናይ ባኣሌ፤

⁶ ባኣሌ ናይ ቤኤራ። ኦርቤሌ ቆሞስ ኮራፒኔ ጊዲዳ ቤኤራ አሶሬ ካዋ ቱሊጌሊቴሊፌሊሶሬይ ዲኢ ኤኪ ቢዳስ።

⁷ ባኤራ ዛሬቲ ባንታ ዩሌታ ማዝጋባን ጸፊቲዳ ኦርቤሌ ዜሬላታ ሃላቃቲ ዪኢኤሌ፤ ዛካራሳኔ ቤላ።

⁸ ቤላይ አዛዛ ና፤ አዛዚ ሸማኤ ና፤ ሸማኤይ ኢዩኤሌ ና፤ ኢዩኤሌ ዛሬቲ አርኤሬፔ ቢዲ ኔቦኔ ባኣሊ-ሜኦኔ ጋካናስ ዲንካኒ ኡቲዳ።

⁹ ኦርቤሌ ዛሬታ ሜሄይ ጋላኣዳን ጮራቲዳ ጊሻስ ኢስቲ ሄፔ አርሼይ ሞኪዛ ባጋን ዲዛ ኤፊራጺሴ ሻፋፔ ቢዲ ባዛስ ጋጸ ጋካናስ ዲንካኒ ኡቲዳ።

¹⁰ ሳኦሌ ካዋቴላ ላይላን አጋሪ ዛሬቲ ኦርቤሌ ዛሬታራ ኦሌቲን ኦርቤሌ ዛሬቲ ጸኒዳ፤ ሂስቲዲ ጋላኣዳፔ አርሼይ ሞኪዛ ባጋራ ዲዛ አጋሪ ዛሬታ ቢታን ዲንካኒ ኡቲዳ።

ጋዴ ናይታ ዛርኬ

11 ጋዴ ዛሬቲ ኦርቤሌ ዛሬታፔ ፑዳሃ ባጋራ ቢዲ ሳላካ ጋካናስ ዲዛ ባሳኔ ቢታን ዲንካኒ ኡቲዳ።

12 ኮይሮ ዜሬላታ ሃላቃይ ኢየኤሌ፤ ናሞኣንሉ ዜሬላታ ሃላቃይ ሻፋሜ፤ ቃሴካ ባሳኔን ዲንካኒ ኡቲዳይታ ሃላቃይ ያኢናዬኔ ሳፋጾ።

13 ሃንኮ አቲዳ ላፑን ዛርኬታ ሃላቃቲ፤ ሚካኤሌ፤ ማሹላሜ፤ ሼባኤ፤ ዮራዬ፤ ዩካኔ፤ ዚኣኔ ኤቦሬ።

14 ሃይቲ ኣቢኤሌ ናይቲ ቡዜ ዛሬታ፤ ቡዜይ ያሂዳ ዬሊዴስ፤ ያሂዳይ ዬሺሻዬ ዬሊዴስ፤ ዬሺሻዬይ ሚካኤሌ ዬሊዴስ፤ ሚካኤሌይ ጋላኣዴ ዬሊዴስ፤ ጋላኣዴይ ያርሃ ዬሊዴስ፤ ያርሃይ ሁሬ ዬሊዴስ፤ ሁሬይ ኣቢሃይሌ ዬሊዴስ።

15 ኢስታ ዛርኬታ ሃላቃይ ጉኔ ናዛ ኣቢኤሌ ና ኣሂ።

16 ሃይቲ ወሪካ ባሳኔኒኔ ጋላኣዴን ሄ ዴሬ ካታማታኒኔ ላሻርኔ ቢታ ሜሄ ሄሚዛሶሆ ኡባን ዲንካኒ ኡቲዳ።

17 ሃይታ ኡባታ ዜሬላቲ ዩሁዳ ካዎ ኢዮኣታሜ ዎዴኒኔ ኢስራኤሌ ካዎ ኢዮርባኣሜ ዎዴ ዛሬታ ማዝጋባን ጻፊቲዳ።

ዮርዳኖስ ሻፋፔ ኣርሼይ ሞኪዛ ባጋራ ኡቲዳ ቆሞታ

18 ኦርቤሌሲ፡ ጋዴ ቆሞታሲኔ ሚናሴ ቆሞፌ ባጋታስ 44,760 ሚኖ ኦላንቻቲ ዴቴስ፤ ኢስቲካ ጎንዳሌ ኦይሉ፤ ማሻ ኦይሌኔ ዎንዳፌን ኦሌቴላ ኤሪዛ ሚኖ ኦላንቻታ።

19 ሄይቲካ ኣጋሬታራ፤ ዩጹሬታራ፤ ናፊሻኔራኔ ናዳቤ ዴሬ ኣሳራ ኦሌታናስ ዎራጂዳ።

20 ባ ኣማኖ ጸሳ ቦላ ዬጊዲ ኢዚ ኢስታ ማዳና ማላ ጸሳ ዎሲዳ። ጸሲካ ኢስታ ዎሳ ሲዩዲ ኣጋሬታኔ ኢስታራ ዲዛ ሃራታ ኢስታ ኩሼን ኣሏ ኢሚዴስ።

21 ኢስቲ ባንታ ሞርኬታ ኩሼፔ 50,000 ጋሜላ፡ 250,000 ዶርሲኔ 2,000 ሃሬታ ዲኢዳ፤ ሄሳሶካ 100,000 ኣስ ዲኢ ኤኪዳ።

22 ኦላዚ ጸሳፌ ጊዲዳ ጊሻስ ዳሮቲ ሃይቂዳ፤ ጸኒዳይቲ ጉዬፔ ዲኤቴላ ላይሏ ዉራና ጋካናስ ሄ ኣሳታ ሶን ኡቲዳ።

ኣርሼይ ሞኪዛ ባጋራ ዲዛ ሚናሴ ቆሞታ

23 ሚናሴ ቆሞታፔ ባጋ ዛሬቲ ባሳኔፔ ዶሚዲ ባኣሊ-ሄርሞኔ፤ ሳኒሬኔ ሄርሞኔ ዙማ ጋካናስ ዲዛ ዴሬን ዲንካኒ ኡቲዳ፤ ኢስቲ ሄን ጮራቲ ጮራቲ ቢዳ።

24 ኢስታ ዛርኬታ ሃላቃቲ ኤፌሬ፣ ዩሺኤ፣ ኤልኤሌ፣ አዛሪኤሌ፣ ኤርማሳ፣ ሆዳዬኔ ያሂዳኤሌ፤ ሄይቲ ዉሪካ ባ ዛርኬን ዛርኬን ኤሬቲዳ አሳታ፣ ሃላቃታኔ ኦላ ቃራታ።

25 ጊዶ አቲን ኢስቲ ባንታ አዋታ ጸሳስ አማኔቲቤቴና፤ ጸሲ ኢስታ ሲንፋፌ ዳይሲዳ ሄ ቢታ አሳቲ ጎይኒዛ ኤቃ ጸሳታስ ጎይኖን ላይማቲዳ።

26 ሄሳ ጊሻስ ኢስራኤል ጸሳይ አሶሬ ካዎ ፑሌ ዎይኮ ቱሊጌሊቱሊፌሊሶሬ ዴንፉሊዲ ኦርቤሌ ቆሞታ፣ ጋዴ ቆሞታኔ ሚናሴ ቆሞታፔ ባጋ ዲኢ ኤፋና ማላ ኦሊዴስ፤ ኢዚ ሄይታንታ አላሄ፣ ሃሶሬ፣ ሃራኔ ጎዛኔ ሻፋ ሄራን ዴኣና ማላ ኦሊዴስ፤ ኢስቲ ሃቕ ጋካናስ ሄን ዴቲስ።

6

ሌዌ ናይታ ዛርኬ

1 ሌዌ ናይቲ ጌርሾኔ፣ ቃኣቴኔ ሜራሬ።

2 ቃኣቴ ናይቲ

አሚራሜ፣ ዩጺሃሬ፣

ኬብሮኔኔ ኡዚኤሌ።

3 አሚራሜ ናይቲ አሮኔ፣

ሙሴኔ ማራሞ።

አሮኔ አቱማ ናይቲ

ናዳቤ፣ አቢሁ፣

ኤልኤዜሬኔ ኢታማሬ።

4 ኤልኤዜሬይ ፊኒሃሴ ዩሊዴስ፤

ፊኒሃሴ አቢሹኣ ዩሊዴስ፤

5 አቢሹኣይ ቡቃ ዩሊዴስ፤

ቡቃይ ኡዜ ዩሊዴስ፤

6 ኡዜይ ዛራሂያ ዩሊዴስ፤

ዛራሂያይ ማራዮቴ ዩሊዴስ፤

7 ማራዮቴይ አማሪያ ዩሊዴስ፤

አማሪያይ አሂጹቤ ዩሊዴስ፤

8 አሂጹቤይ ሳዶቄ ዩሊዴስ፤

ሳዶቄይ አኪማሴ ዩሊዴስ፤

9 አኪማሴ አዛሪያሴ ዩሊዴስ፤

አዛሪያሴ ዮሃናኔ ዩሊዴስ፤

10 ዮሃናኔይ አዛሪያሴ ዩሊዴስ፤

- እዛሪያሲ ካዎ ሶሎሞን
 ዩሩሳላሜን ከዲሲዳ
 ጸሳ ከላን
 ቄሴቴላን አሊዳስ።
- 11 እዛሪያሲ አማሪያ ዩሊዳስ፤
 አማሪያይ ኣሂጹቤ ዩሊዳስ፤
 12 ኣሂጹቤ ሳዶቄ ዩሊዳስ፤
 ሳዶቄይ ሻሎሜ ዩሊዳስ፤
- 13 ሻሎሜይ ከልቂያሳ ዩሊዳስ፤
 ከልቂያሲ እዛሪያሴ ዩሊዳስ፤
- 14 እዛሪያሲ ሳራያ ዩሊዳስ፤
 ሳራያይ ኢዮሳዶቄ ዩሊዳስ።
- 15 ጎዳይ ዩሁዳ አሳኔ
 ዩሩሳላሜ አሳ
 ናቡካዳናጆን ዲኢሲዳ ዎዴ
 ኢዮሳዶቄይካ ኢስታራ
 ዲኤቲ ቢዳስ።
- 16 ሌዌ እቱማ ናይቲ ጌርሾን፥
 ቃእቲኔ ሜራሬ።
- 17 ጌርሾን ናይቲ
 ሊቢና ኸሞኤ፤
- 18 ቃእቲ ናይቲ
 አሚራሜ፥ ዩዲሃሬ፥
 ከብርኔኔ ኡዚኤሌ፤
- 19 ሜራሬ ናይቲ ማሂሌኔ ሙሹ፤ ባንታ አዋ ከላን ከላን
 ጸፊቲዳ ሌዌ ዛርኬቲ ሃይሳፊ ካሊ ዲዛይታ፤
- 20 ጌርሾን ዜሬላታ፤
 ጌርሾንይ ሊቢና ዩሊዳስ፤
 ሊቢናይ ያሃቲ ዩሊዳስ፤
 ያሃቲይ ዚማ ዩሊዳስ፤
 21 ዚማይ ዮኣሃ ዩሊዳስ፤
 ዮኣሂ ኢዶ ዩሊዳስ፤
 ኢዶይ ዛራሄ ዩሊዳስ፤
 ዛራሄይ ዩኣቲሬ ዩሊዳስ፤
- 22 ቃእቲ ዜሬላታ፤
 ቃእቲይ አሚናዳቤ ዩሊዳስ፤

አሚናዊቤይ ቆሬ ዩሊዴስ፤
 ቆሬይ አሲሬ ዩሊዴስ፤
 23 አሲሬይ ሂልቃና ዩሊዴስ፤
 ሂልቃናይ አቢያሳፌ ዩሊዴስ፤
 አቢያሳፌይ አሲሬ ዩሊዴስ፤
 24 አሲሬይ ታሃቲ ዩሊዴስ፤
 ታሃቲይ ኡርኤሌ ዩሊዴስ፤
 ኡርኤሌይ ኦዚያ ዩሊዴስ፤
 ኦዚያይ ሳኦሌ ዩሊዴስ።

25 ሂልቃና ዜሬላታ፤
 ሂልቃናይ አማሳዬኔ
 አሂሞቲ ዩሊዴስ፤
 26 አሂሞቲይ ሂልቃና ዩሊዴስ፤
 ሂልቃናይ ጸፋዬ ዩሊዴስ፤
 ጸፋዬይ ናሃቲ ዩሊዴስ፤
 27 ናሃቲይ ኤልያቤ ዩሊዴስ፤
 ኤልያቤይ ዩሮሃሜ ዩሊዴስ፤
 ዩሮሃሜይ ሂልቃና ዩሊዴስ።

28 ሳሜሊ ናሞኡ
 አቱማ ናይታ ዩሊዴስ፤
 ባይራዚ ኢዩኤሌ፤
 ኢዛ ካሎዚ አቢያ።

29 ሜራራ ዜሬላታ፤
 ሜራራይ ማሂሌ ዩሊዴስ፤
 ማሂሌይ ሊቢና ዩሊዴስ፤
 ሊቢናይ ሺሞኤ ዩሊዴስ፤
 ሺሞኤይ ኡዛሄ ዩሊዴስ፤
 30 ኡዛሄይ ሺሞኣ ዩሊዴስ፤
 ሺሞኣይ ሃጊያ ዩሊዴስ፤
 ሃጊያይ አሳያ ዩሊዴስ።

ጸሳ ኬላን ዩዲዛይታ

31 ዳዊቲ ጫቆ ቃላ ታቦታ ዩሩሳሌም ኤሂዳፔ ጉዬ ጎዳ ጸሳ
 ኬላን ዩላ ዩዲዛይታስ ሃላቃታ ሹሚዴስ።

32 ካዎ ለሎሞኔይ ዩሩሳላሜን ጎዳ ጸሳ ኩላ ኬጸናሼ ጋካናወ ጋይቶቴላ ዱንካኔ ፔንጌን ዩላ ዩዲሼ ጋሞኢዳ፤ ባሰ ኢሜቲዳ ኦሶ ማራን ማራን ኦሴ ፖሊሼ ዴኢዳ።

33 ባንታ ናይታራ ኢሲፌ ዩጸዛይቲ ሃይሳፌ ካሊ ጸፊቲዳይታ፤ ቃኣቴ ዛርኬታፔ ዩጸዛይ ሄማኔ፤

ሄማኔይ ኢዩኤሌ ና፤

ኢዩኤሌይ ሳሜላ ና፤

34 ሳሜሊ ሂልቃና ና፤

ሂልቃናይ ዩሮሃሜ ና፤

ዩሮሃሜይ ኤልኤሌ ና፤

ኤልኤሌይ ቶሃ ና፤

35 ቶሂ ዙፌ ና፤

ዙፌይ ሂልቃና ና፤

ሂልቃናይ ማሃቴ ና፤

ማሃቴ ኣማሳዬ ና፤

36 ኣማሳዬይ ሂልቃና ና፤

ሂልቃናይ ኢዩኤሌ ና፤

ኢዩኤሌይ ኣዛሪያሴ ና፤

ኣዛሪያሴ ሶፎናሳ ና፤

37 ሶፎናሴ ታሃቴ ና፤

ታሃቴይ ኣሲሬ ና፤

ኣሲሬይ ኣቢያሳፌ ና፤

ኣቢያሳፌ ቆሬ ና፤

38 ቆሬይ ዩጸሃሬ ና፤

ዩጸሃሬይ ቃኣቴ ና፤

ቃኣቴይ ሌዌ ና፤

ሌዌይ ኢሰራኤሌ ና።

39 ኤማኔ ዳቦ ኣሳፊይ ኢዛሰ ኡሻቻ ባጋራ ኤቂዲ ኦሌሰ፤ ኣሳፊይ ባራካዬ ና፤

ባራካዬይ ሺሞኣ ና፤

40 ሺሞኣይ ሚካኤሌ ና፤

ሚካኤሌይ ባኣሴያ ና፤

ባኣሴያይ ማልኪያ ና፤

41 ማልኪያይ ኤታኔ ና፤

ኤታኔይ ዛራሄ ና፤

ዛራሄይ ኣዳያ ና፤

42 ኣዳያይ ኤታኔ ና፤

ኤታኔይ ዚማ ና፤

ዚማይ ሺምኤ ና፤

43 ሺምኤይ ያሃቴ ና፤

ያሃቴይ ጌርሾማ ና፤

ጌርሾማይ ሌዌ ና።

44 ኢስታስ ሃዲርሳ ባጋራ ኢስታ ዳቦ ሜራሬ ዛርኬቲ ኤቄቴስ፤
ኤታኔይ ቂሻ ና፤

ቂሻ ኣቢዴ ና፤

ኣብዴይ ማሉኬ ና፤

45 ማሉኬይ ሃሻቢያ ና፤

ሃሻቢያይ ኣማሲያሳ ና፤

ኣማሲያሲ ኪልቂያሳ ና፤

46 ኪልቂያሲ ኣሞዜ ና፤

ኣሞዜይ ባኔ ና፤

ባኔይ ሼሜሬ ና፤

47 ሼሜሬይ ማሂሌ ና፤

ማሂሌይ ሙሽ ና፤

ሙሽይ ሜራሬ ና፤

ሜራሬይ ሌዌ ና።

48 ኢስታስ ኢሻጎታ ጊዲዳ ሃንኮ ሌዌ ቆሞቲ ጸሳ ኬላን
ጋይቶቴላ ዱንካኔን ኦሴቲዛ ሃራ ኦሳስ ዶሬቲዳ።

ኣሮኔ ናይታ ዛርኬ

49 ኣሮኔይኔ ኢዛ ናይቲ ጊዲኮ ጸሳ ኣይሌ ሙሴይ ኣዛዚዳ
ማላ ኢሰራኤሌ ዴራ ናጋራ ዉርሳናስ ኡባፌ ዲማቲዳ ጊዶ
ቆልኣን ኦሴቲዛ ኦሶታ ኡባስ፥ ያርሾ ያርሺዛሶዛ ቦላ ጹጌቲዛ
ያርሾ ያርሻናሲኔ ኤጸኔ ጨዋሲ ያርሺዛሶዛ ቦላ ኤጸኔ ጨዋሳናስ
ኢስታስ ኣዋቴሉ ኢማቲዴስ።

50 ኣሮኔ ናይታ ዛርኬቲ ሃይሳፌ ካሊ ጸፊቲዳይታ፤
ኣሮኔ ናይ ኤልኤዜሬ፤

ኤልኤዜሬ ናይ ፊኒሃሴ፤

ፊኒሃሴ ናይ ኣቢሹኣ፤

51 ኣቢሹኣ ናይ ቡቃ፤

ቡቃ ናይ ኡዜ፤

ኡዜ ናይ ዛራሂያ፤

52 ዛራሂያ ናይ ማራዮቴ፤

ማራዮቴ ናይ ኣማሪያ፤

ኣማሪያ ናይ ኣሂጹቤ፤

53 ኣሂጹቤ ናይ ሳዶቄ፤

ሳዶቄ ናይ ኣኪማሴ።

ሌዌ ቆሞቲ ዳና ማላ ኢሜቲዳ ሶሆታ

⁵⁴ ኣሮኔ ናይታሰ ኢሜቲዳ ዱሳ ሶሆቲ ሃይሳፌ ካሊ ጸፊቲዳ፤ ኮይሮ ሳማይ ቃኣቲ ባጋታሰ ኬዚዳሰ፤

⁵⁵ ኢስታሰ ዩሁዳ ቢታን ዲዛ ኬብሮኔኔ ኢዛ ሄራን ዲዛ ሜሄ ሄሚዛሶሆታ ኢሚዳ።

⁵⁶ ኬብሮኔ ዩሾን ዲዛ ጎሻ ጋዴቲኔ ሞላቲ ዮፌኔ ና ካሌቤሰ ኢሜቲዳ።

⁵⁷ ኣሮኔ ናይታሰ ሹምፖ ዋዲዳዴይ ባቃቲ ቢዲ ኣቲዛ ካታማታ፡ ኬብሮኔ፡ ዬቲሬ፡ ሊቢናኔ ሜሄ ሄሚዛሶሆታ፡ ኤሽታሞኣኔ ሜሄ ሄሚዛሶሆታ፡

⁵⁸ ሂሊኔኔ ሜሄ ሄሚዛሶሆታ፡ ዳቢሬኔ ሜሄ ሄሚዛሶሆታ፡

⁵⁹ ኣሻኔኔ ሜሄ ሄሚዛሶሆታ፡ ቤቲ-ሹሚሹኔ ሜሄ ሄሚዛሶሆታ ኢሚዳ።

⁶⁰ ቃሴ ቢኒያሜ ቆሞታ ጋዴፔ ጌባኔኔ ሜሄ ሄሚዛሶሆታ፡ ኣሌሜቲኔ ሜሄ ሄሚዛሶሆታ፡ ኣናቶቲኔ ሜሄ ሄሚዛሶሆታ ኢሚዳ፤ ኣሮኔ ናይታሰ ኢሜቲዳ ካታማቲ ሙሌራ ታማኔ ሄሻ።

⁶¹ ኣርሼይ ዉሊዛ ባጋራ ዲዛ ሚናሴ ዛርኬ ባጋቲ ኦይኪዳ ጋዴዛፔ 10 ካታማቲ ሃንኮ ኣቲዳ ቃኣቲ ዛርኬታሰ ኢሜቲዳ።

⁶² ዪሳቡዴ ዛርኬታ ቢታፌ፡ ኣሴሬ ዛርኬታ ቢታፌ፡ ኒፍታለሜ ዛርኬታ ቢታፌ፡ ባሳኔን ዲዛ ሚናሴ ዛርኬታ ቢታፌ 13 ካታማታ ጌርሹኔ ዛርኬታሰ ኢሚዳ።

⁶³ ኦርቤሌ ዛርኬታ ቢታፌ፡ ጋዴ ዛርኬታ ቢታፌ፡ ዛቢሎኔ ዛርኬታ ቢታፌ 12 ካታማታ ሜራሬ ዛርኬታሰ ሳማን ኢሚዳ።

⁶⁴ ሄሳሶ ኦሊዲ ኢሰራኤሌ ኣሳይ ሌዌታሰ ሃ ካታማታኔ ኢስታ ሄራን ዲዛ ሜሄ ሄንሳሶሆታ ኢሚዳ።

⁶⁵ ሃይሳፌ ቦላራ ሱንሳይ ኢስታሰ ጸይጌቲዳ ካታማታ ዩሁዳ ዛርኬታፔ፡ ሲሞና ዛርኬታፔ፡ ቢኒያሜ ዛርኬታፔ ሃራ ካታማታን ኦሶይሳ ማላ ሳማ ዬጌዲ ኢስታ ጋኪዳይሳ ገሻ ኢሚዳ።

⁶⁶ ቃኣቲ ዛርኬታ ጌዶፌ ኢሲ ኬላ ኣሳታሰ ኤፍሬሜ ዛርኬታ ጋኪዳ ቢታፌ ካታማታኔ ሜሄ ሄሚዛሶሆ ኢሚዳ።

⁶⁷ ኢስታሰ ሹምፖ ዋዲዳዴይ ባቃቲ ቢዲ ኣቲዛ ካታማታ፡ ኤፍሬሜ ዴሬን ጌዜ ቢታን ዲዛ ሴኬሜኔ ሜሄ ሄሚዛሶሆታ፡ ጌዜሬኔ ሜሄ ሄሚዛሶሆታ፡

⁶⁸ ዮቂማኣሜኔ ሜሄ ሄሚዛሶሆታ፡ ቤቲ-ሆሮኔኔ ኢዛ ሜሄ ሄሚዛሶሆታ፡

⁶⁹ ኣያሎኔኔ ሜሄ ሄሚዛሶሆታ፡ ጌት-ኤርሞኔኔ ሜሄ ሄሚዛሶሆታ ኢሚዳ።

70 ሚናሴ ዛርኬታ ባጋፌ አኔሬኔ ሜሄ ሄሚዛሶሆታኔ ባላማኔ ሜሄ ሄሚዛሶሆታ ኤኪዲ ቃኣቱ ዛርኬታፔ አቲዳይታሰ አሚዳ።

71 ሚናሴ ዛርኬታ ባጋፌ ባሳኔን ዲዛ ጎላኔኔ ሜሄ ሄሚዛሶሆታኔ አሰታሮቴኔ ሜሄ ሄሚዛሶሆታ ኤኪዲ ጌርሾኔ ዛርኬታሰ አሚዳ።

72 ቃሴ ዪሳኮሬ ዛርኬታፔ ቃዴሴኔ ሜሄ ሄሚዛሶሆታ፥ ዳቢራቴኔ ሜሄ ሄሚዛሶሆታ፥

73 ኤራሞቴኔ ሜሄ ሄሚዛሶሆታኔ አኔማኔ ሜሄ ሄሚዛሶሆታ ኤኪዲ ኢሰታሰ አሚዳ።

74 አሴሬ ዛርኬታፔ ማሻላኔ ሜሄ ሄሚዛሶሆታ፥ አብዶኔኔ ሜሄ ሄሚዛሶሆታ፥

75 ሁቆቄኔ ሜሄ ሄሚዛሶሆታኔ ኤራሆቤኔ ሜሄ ሄሚዛሶሆታ ኤኪዲ ኢሰታሰ አሚዳ።

76 ሄሳላካ ኒፍታሌሜ ዛርኬታፔ ጋለላን ዲዛ ቃዴሴኔ ሜሄ ሄሚዛሶሆታ፥ ሃሞኔኔ ሜሄ ሄሚዛሶሆታኔ ቂሪያታይሜኔ ሜሄ ሄሚዛሶሆታ ኤኪዲ ኢሰታሰ አሚዳ።

77 አቲዳ ሜራሬ ዛርኬታሰ ዛቢሎኔ ዛርኬታፔ አርሞኔኔ ሜሄ ሄሚዛሶሆታኔ ታቦሬኔ ሜሄ ሄሚዛሶሆታ ኤኪዲ አሚዳ።

78 ቃሴ ኦሮቤሌ ዛርኬታፔ ኢያርኮ ጊናን፥ ዮርዳዳሴፔ ሄ ፒንላን አርሼይ ዉሊዛ ባጋራ፥ ባዞን ዲዛ ባጸራኔ ሜሄ ሄሚዛሶሆታ፥ ያሃጼኔ ሜሄ ሄሚዛሶሆታ፥

79 ቂደሞቴኔ ሜሄ ሄሚዛሶሆታኔ ሜፋአቴኔ ሜሄ ሄሚዛሶሆታ ኤኪዲ ኢሰታሰ አሚዳ።

80 ጋዴ ዛርኬታፔ ጋላኣዴን ዲዛ ኤራሞቴኔ ሜሄ ሄሚዛሶሆታ፥ ማሃናይሜኔ ሜሄ ሄሚዛሶሆታ፥

81 ሃሴቦኔኔ ሜሄ ሄሚዛሶሆታኔ ኢያዜሬኔ ሜሄ ሄሚዛሶሆታ ኤኪዲ ኢሰታሰ አሚዳ።

7

ዪሳኮሬ ዛርኬ

1 ዪሳኮሬሰ ኦይዱ አቱማ ናይቲ ዴቴሰ፤ ሄይቲካ ቶላ፥ ፑዋ፥ ያሹቤኔ ሽሚሮኔ ጌቴቲዛይታ።

2 ቶላ ናይቲ ኤዜ፥ ኤራፋያ፥ ዪራኤሌ፥ ያሃማዬ፥ ዪቢሳሜኔ ሳሜላ፤ ኢሰቲካ ቶላ ዛርኬታ ሃላቃታ፤ ኢሰቲ ዋልቃማኔ ሚኖ ኦላንቻታ፤ ካዋ ዳዊቱ ዋዴ ኢሰታ ቆዳይ 22,600።

3 ኡዜይ ዪዚራሂያ ዬሊዳሰ፤ ዪዚራሂያይ ሚካኤሌ ዬሊዳሰ፤ ሚካኤሌይ አብዲዩ ዬሊዳሰ፤ አብዲዩይ ኢዩኤሌ ዬሊዳሰ፤ ኢዩኤሌይ ዪሺያ ዬሊዳሰ፤ ሃ ኢቻሻቲካ ባሶ አሳታሰ ሃላቃ።

4 ኢስታስ ዳሮ ማቼቲኔ ናይቲ ዲዛ ገሻስ ኢስታሶ ኣሳ ዛርኬታፔ ኦላስ ጋኪዳ ኦላንቻቲ ቆዳይ 36,000 ጊዲዳስ።

5 ዪሳኮሬ ዛርኬታፔ ኦላስ ጋኪዳ ኦላንቻቲ ማዘጋባን ቆዳቲዲ 87,000 ጊዲዳ።

ቢኒያሜ ዛርኬኔ ዳኔ ዛርኬ

6 ቢኒያሜስ ሄቹ ናይቲ ዳቴስ፤ ኢስቲካ ቤላ፥ ቤኬሬኔ ዪዲኤሌ።

7 ቤላ ናይቲ ኤጲቦኔ፥ ኡዜ፥ ኡዚኤሌ፥ ያርሞቴኔ ኢሬ፤ ሃ ኢቻሻቲካ ባሶ ኣሳታስ ሃላቃታ፤ ባ ዬሌታ ዛርኬታ ማዘጋባን 22,034 ዋልቃማኔ ሚኖ ኦላንቻቲ ማዘጋቢቲዳ።

8 ቤኬሬ ናይቲ ዘሚራ፥ ኢዮኣሳ፥ ኤልኤዜሬ፥ ኤልዮኤናዬ፥ ኦሚሬ፥ ያርሞቴ፥ ኣቢያ፥ ኣናቶቴኔ ኣሌሜቴ፤ ሃይቲ ኡባቲ ቤኬሬ ናይታ።

9 ኢስቲ ኡባይ ባሶ ኣሳታስ ሃላቃታ፤ ባ ዬሌታ ዛርኬታ ማዘጋባን 20,200 ዋልቃማኔ ሚኖ ኦላንቻቲ ማዘጋቢቲዳ።

10 ዪዲኤሌ ናይ ቢሊሃኔ፤ ቢሊሃኔ ናይቲ ያኡሹ፥ ቢኒያሜ፥ ኤሁዳ፥ ኪንኣኔ፥ ዜታኔ፥ ታርሴሴኔ ኣኪሻሆሬ፤

11 ሃይቲ ኡባቲ ዪዲኤሌ ናይታ፤ ኢስቲ ባሶ ኣሳታስ ሃላቃታ፤ ባ ዬሌታ ዛርኬታ ማዘጋባን 17,200 ዋልቃማኔ ሚኖ ኦላንቻቲ ማዘጋቢቲዳ።

12 ቩፊማይኔ ሁፒሜይ ኢሬ ዜሬላታ፤ ሁሺሜይ ኣሄሬ ዜሬላ።

ኒፍታሌሜ ናይታ ዛርኬ

13 ኒፍታሌሜ ናይቲ ያሂጾሌ፥ ጉኔ፥ ዬጲሬኔ ሻሎሜ፤ ሃይቲ ቢሊሃ ዜሬላታ።

ሚናሴ ናይታ ዛርኬ

14 ሚናሴ ዛሬቲ ሃይሳፊ ካሊ ጸፊቲዳይታ፤ ሚናሴይ ኣራሜ ቢታፊ ኤኪዳ ጋራዳያ ዬሊዳ ኣቱማ ናይቲ ኣሲራኤሌኔ ጋላኣዳ ኣዋ ማኪሬ።

15 ማኪሬይ ሁፒሜኔ ቩፊማ ባጋፊ ማኢኮ ማቾ ኤኪዳስ፤ ኢዛ ሚቹይ ሱንላካ ማኢኮ ጌቴቴስ፤ ማኪሬ ዛሬ ጲሎፋዳይ ማጫ ናይታ ጸላ ዬሊዳስ።

16 ማኪሬ ማቾ ማኢካይ ኣቱማ ናይታ ዬላዱስ፤ ባይራ ናዛ ፓሬሻ፥ ኢዛ ካሎዛ ሼሬሼ ጋ ሱንላዱስ። ፔሬሻ ናይቲ ኡላሜኔ ኤሬቁሜ።

17 ኡላሜ ናይ ባዳኔ፤ ሃይቲ ሚናሴ ና ማኪሬ ና ጋላኣዳ ዛሬታ።

18 ጋላኣዴ ሚቺያ ሃሞሌኬታ ኢሻዉ፥ ኣቢኤዜሬኔ ማሂሌ ዩላዲሱ።

19 ሻሚዳ ናይቲ ኣሂያኔ፥ ሴኬሜ፥ ሊቂሃኔ ኣንኣሜ።

ኤፍሬሚ ናይታ ዛርኬታ

20 ኤፍሬሚ ናይ ሹቱላ፤ ሹቱላ ናይ ባሬዴ፤ ባሬዴ ናይ ታሃቲ፤ ታሃቲ ናይ ኤልኣዴ፤ ኤልኣዴ ናይ ታሃቲ፤

21 ታሃቲ ናይ ዛባዴ፤ ዛባዴ ናይ ሹቱላ።

ኤፍሬሚ ና ኤዜሬይኔ ኤላዴይ ሚሄ ካይሳና ጌቲ ዴሬ ቢን ሄ ቢታ ኣሳቲ ኢሰታ ዎጲዳ።

22 ሄሳ ጊሻሰ ኢሰታ ኣዋ ኤፍሬሚይ ዳር ዎዴ ካዮቲዴሰ፤ ሂሰቲን ኢዛ ዳቦቲ ዩዲ ኢዛ ሚንፊሊዳ።

23 ሄሳፌ ጉዬ ኢዚ ባ ማቺይራ ጋይቲዴሰ፤ ሂሰቲን ኢዛ ሻራዳ ኣቱማ ና ዩላዲሱ፤ ኢዛ ኬላን ጋኪዳ ኢታ ሜቶዛ ጋሶን ናዛ ባሪሄ ጊ ሱንፊዴሰ።

24 ኤፍሬሚሰ ሸኢር ጌቲቲዛ ማጫ ናይ ዳወሰ፤ ኢዛካ ጉዴ ቤቲ-ሆርኔ፥ ዱጌ ቤቲ-ሆርኔኔ ኡዜን-ሸኢር ጌቲቲዛ ካታማታ ኤሳዲሱ።

25 ኤፍሬሚሰ ኤርፋሃ ጌቲቲዛ ሃራ ኣቱማ ናይ ዴሰ፤ ኤርፋሃ ናይ ኤሬሼፋ፤ ኤሬሼፋ ናይ ቲላሄ፤ ቲላሄ ናይ ታሃኔ፤

26 ታሃኔ ናይ ላዳኔ፤ ላዳኔ ናይ ኣሚሁዴ፤ ኣሚሁዴ ናይ ኤልሻማ፤

27 ኤልሻማ ናይ ናዌ፤ ናዌ ናይ ኢያሶ።

28 ኤፍሬሚ ዛሬታ ዱሳሶይኔ ኢሰታ ቢታይ ቤቲሌ ዩሾን ዲዛ ካታማታ፥ ኣርሼይ ሞኪዛ ባጋራ ናኢራኔ፥ ኣርሼይ ወሊዛ ባጋራ ጌዜሬ፥ ሴኬሜ፥ ኣዬኔ ኢሰታ ዩሾን ዲዛ ካታማታ።

29 ቃሴካ ሚናሴ ዛሬታ ቢታ ዛዋን ቤቲ-ሻኣኔ፥ ታኢናኬ፥ ማጊዶ፥ ዶሬኔ ኢሰታ ዩሾን ዲዛ ካታማታ፤ ኢሰራኤሌ ና ዮሴፌ ዛሬቲ ሃ ካታማታን ዴኢዳ።

ኣሴሬ ናይታ ዛርኬ

30 ኣሴሬ ናይቲ ዩሚኔ፥ ዩሺዌ፥ ዩሺዋኔ ባሪሄ፤ ኢሰታ ሚቻ ሴራሆ ጌቲታወሰ።

31 ባሪሄ ናይቲ ሄቤሬኔ ቢሪዛዋቲ ኣዋ ማልኪኤሌ።

32 ሄቤሬ ናይቲ ያፋሌዶ፥ ሾሜሬኔ ሆታዋ፤ ኢሰታ ሚቻ ሹኦ ጌቲታወሰ።

33 ያፋሌዶ ናይቲ ፓሳኬ፥ ቢሚሃሌኔ ኣሺዋቲ፤ ሃይቲ ያፋሌዶ ናይታ።

34 ያፋሌጾ ኢሻ ሾሜሬ ናይቲ ኣሂ፡ ኤሮሂጋ፡ ያሁቤኔ ኣራሜ።
 35 ኢዛ ኢሻ ሆታሞ ናይቲ ጸፋሃ፡ ዩሚኔ፡ ሼሌሼኔ ኣማሌ።
 36 ጸፋሃ ናይቲ ሱሃ፡ ሃርኔፊሬ፡ ሹኣሌ፡ ቤሬ፡ ዩሚሬ፡
 37 ቤጾሬ፡ ሆዳ፡ ሻማ፡ ሺላሼ፡ ዩቲራኔኔ ባኤራ።
 38 ዮቶሬ ናይቲ ዮፊኔ፡ ፒሰፓኔ ኣሬ።
 39 ኡሌ ናይቲ ኣራሂ፡ ሃንኤሌኔ ኤሪጺያ።
 40 ሃይቲ ኡባይ ኣሴሬ ዛሬታ፤ ኢስቲ ባሶ ኣሳታሰ ሃላቃታ፤
 ባ ዩሌታ ዛርኬታ ማዝጋባን 26,000 ዋልቃማኔ ሚኖ ኦላንቻቲ
 ማዝጋቤቲዳ።

8

ቢኒያሜ ናይታ ዛርኬ

1 ቢኒያሜስ ባይራ ናዚ ቤላ፤ ኢዛ ካሎቲ ኣሺቤሌ፡ ኣሂራሂ፡
 2 ኖሃ፡ ኤራፌ።
 3 ቤላ ዛሬቲ ኣዳሬ፡ ጌራ፡ ኣቢሁዳ፡
 4 ኣቢሹኣ፡ ናኢማኔ፡ ኣሆዋ፡
 5 ጌራ፡ ሻፋሜኔ ሁራሜ።
 6-7 ኤሁዳ ዛሬቲ ናኢማኔ፡ ኣካያኔ ጌራ፤ ኢስቲ ጌባን ዲዛ
 ባንታ ኬላ ኣሳታሰ ሃላቃታ፤ ሄሳፌ ጉዬ ኢስቲ ማናሃቲ ቢታ
 ዲኢቲ ቢዳ፤ ኦዛኔ ኣሂሁዳ ኣዋ ጌራይ ኢስታሰ ሃላቃ።
 8 ሻሃራይሜ ባ ማቹታ ሁሺሞኔ ባኢሮ ኣንጂ ዩዲዳፔ ጉዬ
 ሞኣቤ ቢታን ኣቲማ ናይታ ዩሊዳስ።
 9 ሻሃራይሜ ባ ማቹ ሆዴሺፔ ዮባቤ፡ ዚቢያ፡ ሜሹ፡ ማልካሜ፡
 10 ያኡጾ፡ ሳኪያኔ ሚርማ ዩሊዳስ፤ ኢዛ ናይቲ ኡባይ ባሶ
 ኣሳታሰ ሃላቃ ጊዲዳ።
 11 ቃሴ ባ ማቹ ሁሺሚፔ ኣሂጹቤኔ ኤልፓኤሌ ዩሊዳስ።
 12 ኤልፓኤሌ ናይቲ ኤቦሬ፡ ሚሻሚኔ ሾሜዳ፤ ሾሜዲ ኦኖ
 ካታማታ፡ ሎዳ ካታማታኔ ኢስታ ዩሽን ዲዛ ቄሪ ካታማታ
 ኤሲዳስ።
 13 ባሪሂይኔ ሾማኤይ ኣያሎኔ ካታማን ዲዛ ባንታ ኬላ ኣሳታሰ
 ሃላቃ ጊዲዳ፤ ኢስቲ ጌቲ ካታማን ዲዛ ኣሳ ዩዴሊዳ።
 14 ባሪሂ ዛሬቲ ኣሂዮ፡ ሻሻቄ፡ ያርሞቲ፡
 15 ዛባዲያ፡ ኣራዳ፡ ኤዳሬ፡
 16 ሚካኤሌ፡ ዩሺጳኔ ዮሃ ጌቲቲቲስ።
 17 ኤልፓኤሌ ዛሬቲ ዛባዲያ፡ ማሹላሜ፡ ሂዝቃ፡ ሄቤሬ፡
 18 ዩሺማራዬ፡ ዩዚላኤኔ ዮባቤ።
 19 ሺሞኤ ዛሬቲ ያቂሜ፡ ዚኪሬ፡ ዛብዳ፡

- 20 ኤልኤናዬ፥ ኤልናዬ፥ ኤልኤሌ፥
 21 ኣዳያ፥ ቢራዬን ሺሚራቴ።
 22 ሻሻቄ ዛሬቲ ዪሺጳ፥ ኤቦሬ፥ ኤልኤሌ፥
 23 ኣብደኔ፥ ዚኪሬ፥ ሃናኔ፥
 24 ሃናኒያ፥ ኤላሜ፥ ኣንቶቴያ፥
 25 ዪፊዳዬን ፓኑኤሌ።
 26 ዪሮሃሜ ዛሬቲ ሻሚሻራዬ፥ ሻሃሪያ፥ ኣታሊያ፥
 27 ያኢሬሽ፥ ኤላሳኔ ዚኪሬ።
 28 ሃይቲ ኡባቲ ባ ከፋ ኣሳታሰ ሃላቃታ፤ ባ ዜሬፋ ዛርኬቲ
 ጳፊቲ ዲዛ ዩሩሳላሜን ዴቲስ።
 29 ጌባኦኔ ኣዋ ዪኢኤሌይ ጌባኦኔ ካታማን ዴስ፤ ኢዛ ማቹይ
 ሱንሊካ ማኢኮ።
 30 ኢዛሰ ባይራ ናዚ ኣብደኔ ጌቴቲስ፤ ኢዛ ካሎቲ ጹሬ፥
 ቂሴ፥ ባኣሌ፥ ኔሬይ ናዳቤ፥
 31 ጋዶሬ፥ ኣሂዮ፥ ዜኩሬኔ
 32 ሺሜኤ ኣዋ ሚቂሎቴ፤ ሃይቲ ኡባቲ ባ ዳቦታ ማታን
 ዩሩሳላሜን ዴቲስ።

ሳኦሌ ዛርኬታ

- 33 ኔሬይ ቂሴ ዩሊዴስ፤
 ቂሴይ ሳኦሌ ዩሊዴስ፤
 ሳኦሊ ዮናታኔ፥ ማልኬሹኣ፥
 ኣቢናዳቤኔ
 ኤሺባኣሌ ዩሊዴስ።
 34 ዮናታኔ ናይ ማሪባ-ባኣሌ፤*
 ማሪባ-ባኣሌይ
 ሚኪያሳ ዩሊዴስ።
 35 ሚኪያሳ ኣቲማ ናይቲ ፒቶኔ፥ ሜሊኬ፥ ታሬኣኔ ኣካዜ።
 36 ኣካዜይ ያሆኣዴ ዩሊዴስ፤
 ያሆኣዴ ኣሌሜቴ፥
 ኣዚሞቴኔ ዚሚሬ ዩሊዴስ፤
 ዚሚሬይ ሞዛ ዩሊዴስ፤
 37 ሞዛይ ቢኒኤ ዩሊዴስ፤
 ቢኒኤይ ኤራፋዬ ዩሊዴስ፤
 ኤራፋዬይ ኤልኣሳ ዩሊዴስ፤
 ኤልኣሲ ኣኬሌ ዩሊዴስ።

* **8:34** ማሪባ-ባኣሌይ ሜምፊቦሰቴ ጌቴቲዴስ፤ 2ሳሜ 4:4 ጸላ።

38 አዜሌስ 6 አቱማ ናይቲ ዳቴስ፤ ሄይቲካ አዚርቃሜ፥ ቦኬሬ፥ ኢስማኤሌ፥ ሻኦሪያ፥ አብዲዩኔ ሃናኔ፤ ሃይቲ ኡባይ አዜሌ ናይታ።

39 አዜሌ አሻ ኤሼቄስ ሄሹ አቱማ ናይቲ ዳቴስ፤ ባይራዚ ኡላሚ ካሎቲ ያኡሼኔ ኤልፋሌዴ።

40 ኡላሚ ናይቲ ዋልቃሚኔ ሚኖ ኦላንቻታ፤ ኢስቲካ ዋንዳፌን ዱኮ ኤሪዛይታ፤ ኡላሚስ 150 አቱማ ናይቲኔ ናይታ ናይቲ ዳቴስ። ሃይቲ ኡባቲ ቢኒያሜ ዛሬታ።

9

ዲኤቲፋፌ ሲሚዳ ኢስራኤሌ አሳ

1 ኢስራኤሌ አሳይ ኡባይ ባዬሌታ ዛርኬን ዛርኬን ጸፊቲዳስ፤ ሃ ታሪኬይ ኢስራኤሌ ካዎታ ማጻፋን ጸፊቲ ኡቲዳስ።

ዩሁዳ አሳይ ባ ናጋራ ጋሶን ባቢሎኔ ቢታ ዲኤቲ ቢዳስ።

2 ዲኤቲ ቢዳሶፔ ኮይሮ ሲሚዳ ባንታ ቢታን ኡቲዳይቲ ቄሴታ፥ ለዌታ፥ ጸሳ ኬላን ዋልቃ ኦሶ ኦላዛይታኔ ኢስራኤሌ አሳፔ ጉላታ።

3 ዩሁዳ ዛሬታፔ፥ ቢኒያሜ ዛሬታፔ፥ ኤፍሬሜ ዛሬታፔኔ ሚናሴ ዛሬታፔ ጉላቲ ዬሩሳላሚን ዴኢዳ።

ዩሁዳ ናይታ ዛርኬ

4 ዩሁዳ ና ፓሪሴ ዛርኬፌ ኡታዬይ ዬሩሳላሚን ኡቲዳይታስ ሃላቃ፤ ኡታዬይ አሚሁዳ ና፤ አሚሁዳይ ኢሚሬ ና፤ ኢሚሬይ ባኔ ና።

5 ዩሁዳ ና ሴሎ ዛሬታፔ አሳያይኔ ኢዛ ናይቲ ዬሩሳላሚን ዲዛይታስ ሃላቃታ።

6 ዩሁዳ ና ዛራሄ ዛሬታፔ ዩኢኤሌይ ዬሩሳላሚን ዲዛይታስ ሃላቃ።

ዩሁዳ ዛሬቲ ቆዲን ሙሌራ 690።

ቢኒያሜ ናይታ ዛርኬ

7 ዬሩሳላሚን ዴኢዳ ቢኒያሜ ዛርኬ ሃላቃቲ ሃይሳፌ ካሊ ጸፊቲዳ፤

ሃላቃ ሳሉይ ማሹላሚ ና፤

ሃላቃ ማሹላሚይ

ሆዳዬ ና፤

ሃላቃ ሆዳዬይ ሃሳኑኤ ና።

8 ሃላቃ ዩቤናዬይ ዩሮሃሚ ና።

ሃላቃ ኤላይ ኡዜ ና፤

ኡዚ ሚኪሬ ና።

ሃላቃ ማሹላሜይ

ሻፋጺያ ና፤

ሻፋጺያ ኤራኤኤሌ ና፤

ኤራኤኤሌይ ዪቢናዬ ና።

⁹ ቢኒያሜ ዛሬታ ቆዳይ ሙሌራ 956፤ ሄይቲ ኡባይ ባ ኬላ አሳታሰ ሃላቃታ።

ዬሩሳላሜን ዴኢዳ ቄሴታ

¹⁰ ዬሩሳላሜን ዴኢዳ ቄሴቲ ሃይሳፌ ካሊዲ ጸፊቲዳይታ፤

ኢሰቲ ያዳያ፥ ዮሃሪቤ፥ ያኪኔኔ

¹¹ ጸሳ ኬላን

ሃላቃቲዳ አዛሪያሳ፤

አዛሪያሲ ኪልቂያሳ ና፤

ኪልቂያሲ ማሹላሜ ና፤

ማሹላሜይ ሳዶቄ ና፤

ሳዶቄይ ማራዮቲ ና፤

ማራዮቲይ አሂጹቤ ና።

¹² ሃራቲ ቃሴ ዪሮሃሜ ና አዳያኔ አዲኤሌ ና ማኢሳያ፤ ዪሮሃሜይ ፓሽኩሬ ና፤

ፓሽኩሬይ ማልኪያ ና።

አዲኤሌይ ያሂዜሬ ና፤

ያሂዜሬይ ማሹላሜ ና፤

ማሹላሜይ ማሺሊሚቲ ና፤

ማሺሊሚቲይ ኢሜሬ ና።

¹³ ባንታሶ አሳታሰ ሃላቃቲዳ ቄሴቲ 1,760፤ ሃይቲ ጸሳ ኬላን ኦሴቲዛ ኦሶሰ ጋኪዳ አሳታ።

ዬሩሳላሜን ዴኢዳ ሌዌታ

¹⁴ ዬሩሳላሜን ዴኢዳ ሌዌቲ ሃይሳፌ ካሊ ጸፊቲዳይታ፤

ሃሹቤ ና ሻማኤይ

ሜራሬ ዛርኬ፤

ሃሹቤይ አዚርቃሜ ና፤

አዚርቃሜይ ሃሻቢያ ና።

¹⁵ ባቂባቂሬ፥ ሄሪሹ፥ ጋላሌኔ ማታኒያ፤ ማታኒያይ ሚካ ና፤ ሚኪያሲ ዚኪሬ ና፤ ዚኪሬይ ኦሳፌ ና።

¹⁶ ሃራቲ ቃሴ ናጸፊታ ሞላታን ኡቲዳ አብዲዩኔ ባራካዬ። አብዲዩይ ሻማኤ ና፤

ሻማኤይ ጋላሌ ና፤

ጋላሌይ ኤዶታኔ ና።

ባራካዬይ አሳ ና፤
አሲ ሂልቃና ና።

ጸሳ ኬላ ፔንጌ ናጊዛ ዛቤታ

17 ጸሳ ኬላ ፔንጌ ናጊዛ ዛቤታ ሻሎሜ፥ አቁቤ፥ ጸልሞኔ፥ አሂማኔኔ ኢስታ ዳቦታ፤ ሻሎሜይ ኢስታስ ሃላቃ።

18 ሃ ዜሬላቲ አርሼይ ሞኪዛ ባጋራ ዲዛ ካዎ ፔንጌ ጌቲቲዛሶዛ ናጌቲስ፤ ሃይሳፌ ካሴ ኢስቲ ሌዌቲ ዲንካኒ ኡቲዳሶ ጌልሊዛ ፔንጌ ናጌቲስ።

19 ሻሎሜይ አቢያሳፌ ናዛ ቆሬ ና፤ ኢዚ ቆራሃ ዛርኬ አሳ። ቆሬ ዜሬላቲ ካሴ ጎዳ ጸሳ ዲንካኒ ናጊዳ ማላ ሻሎሜይኔ ቆራሃ ዛርኬ ጊዲዳ ኢዛ ዳቦቲ ጸሳ ኬላ ናጌቲስ።

20 ኤልኤዜሬ ና ፊኒሃሲ ቤኒ ዎዴ ቆራሃ ዛርኬታ ሃላቃ፤ ጎዳይ ኢዛራ ዴስ።

21 ቃሴካ ማሼሌሚያ ና ዛካራሲ ዲንካኒ ፔንጌ ናጌስ።

22 ፔንጋ ናጋናስ ዶሬቲዳይቲ ሙሌራ 212፤ ሃይታጎቲ ባጎታ ካታማን ካታማን ቆዴቲዲ ጸፌቲዳ፤ ኢስታ ዛሬታስ ሃ አዋቲላ አሚዳይ ካዎ ዳዊቲኔ ናቤ ሳሜላ።

23 ሄሳ ጊሻስ ኢስቲኔ ኢስታ ናይቲ ጸሳ ኬላ ዲንካኒ ፔንጌዛ ናጌቲስ።

24 ዛቤቲ አርሼይ ወሊዛ ባጋራ፥ ሞኪዛ ባጋራ፥ ፑዴሃ ባጋራኔ ዲጌሃ ባጋራ ኤቂዲ ናጌቲስ።

25 ሄ ካታማታን ዲዛ ኢስታ ዳቦቲ ላፑንላ ጋላስ ላሜቲ ላሜቲ ናጊሼ ኢስታ ማዳናስ ቤሴስ።

26 ፔንጌ ናጊዛ ዛቤታ ሃላቃታፔ ኦይዱ ሌዌቲ ጸሳ ኬላ፥ ኢዛ ጊዶን ዲዛ ኪፊሌታኔ ሚንጃ ኬላ አዋቲላን ናጌቲስ።

27 ጸሳ ኬላ ናጊዛይኔ ቃሴ ማላዶ ማላዶ ካሬ ዶይዛይቲ ኢስታ ጊዲዳ ጊሻስ ሄን አቁቲስ።

28 ኢስታፌ ጉላቲ ጸሳ ኬላ ኦሶስ ጎኤቲዛ ሚሻታ አዋቲላን ናጌቲስ፤ ሄ ሚሻታ ካሬ ኬሲዛ ዎዴኔ ሶ ጌልሊዛ ዎዴ ኢስቲ ቆዴቲስ።

29 ቃሴ ኢስታፌ ኢሶቲ ኢሶቲ ጸሳ ኬላ ጊዶን ጎኤቲዛ ሃራ ሚሻታ፥ ሊቆ ጳሌዛ፥ ዎይኔ ኡሻዛ፥ ዛይቲዛ፥ ኤጸኔዛኔ ሳዎታ አዋቲላን ናጌቲስ።

30 ጊዶ ኦቲን ቄሴታ ናይታፔ ኢሶቲ ኢሶቲ ሳዎዛ ጌዳሪ ጌዳሪ ዋላኬቲስ።

31 ቆሬ ዛርኬፌ ሻሎሜስ ባይራ ና ሌዌ ማቲቲያስ ያርሾ ኡኬላ ኡካናስ አዋቲሊ ዴስ።

32 ቃእቲ ዛርኬ ጌዲዳ ኢስታ ዳቦታፔ ጉላታሰ ሳሞባታን ሳሞባታን ጸራጴዛ ቦላ ዎሊዛ ያርሾ ገገሳና እዋቴሌ ዳሰ።

33 ሌዌ ዛሬታፔ እማርዳ ሃላቃቲ ጸሳ ኬላን ዩጲዛይታ፤ ኢስቲ እማርሲኔ ጋላሰ ኦሊዛ ገሻሰ ሃራ ኦሶ ኦሴቴና፤ ኢስቲ ጸሳ ኬላ ገቤ ገዶን ዲዛ ኬላታን ዴኤቴሰ።

34 ሃይቲ ኡባይ ሌዌ ቆሞታሰ ሃላቃቲ ባንታ ዛርኬን ዛርኬን ጸፊቲዲ ዩሩሳላሜን ዴቴሰ።

ካዎ ሳኦሌ ዩሌታ

(1ታሪ 8:29-38)

35 ጌባኦኔ እዋ ዩኢኤሌይ ጌባኦኔ ካታማን ዴኢዳሰ፤ ኢዛ ኬላ እዩይ ሱንሊ ማኢኮ።

36 ኢዛሰ ባይራ ናዚ ኣብዶኔ፤ ኢዛ ካሎቲ ጹሬ፥ ቂሴ፥ ባኣሌ፥ ኔሬ፥ ናዳቤ፥

37 ጋዶሬ፥ ኣሂዮ፥ ዛካራሳኔ ሚቂሎቴ።

38 ሚቂሎቴይ ሺሜኤ ዩሊዳሰ፤ ኢስቲካ ባንታ ዳቦታ ማታን ዩሩሳላሜን ዴኢዳ።

39 ኔሬይ ቂሴ ዩሊዳሰ፤

ቂሴይ ሳኦሌ ዩሊዳሰ።

ሳኦሌይ ዮናታኔ፥ ማልኬሹኣ፥ ኣቢናዳቤኔ

ኤሺባኣሌ ዩሊዳሰ፤

40 ዮናታኔ ናይ ማሪባ-ባኣሌ፤*

ማሪባኣሌይ ሚኪያሳ ዩሊዳሰ።

41 ሚኪያሳ ናይቲ ፒቶኔ፥ ሜሌኬ፥ ቴሬኣኔ ኣካዜ።

42 ኣካዜይ ያኢሬ ዩሊዳሰ፤

ያኢሬይ ኣሌሜቴ፥ ኣዚሞቴኔ ዚሚሬ ዩሊዳሰ፤

ዚሚሬይ ሞዛ ዩሊዳሰ፤

43 ሞዛይ ቢኒኤ ዩሊዳሰ፤

ቢኒኤይ ኤራፋያ ዩሊዳሰ፤

ኤራፋያይ ኤልኣሳ ዩሊዳሰ፤

ኤልኣሲ ኣዜሌ ዩሊዳሰ።

44 ኣዜሌሰ ኡሱፑን ኣቱማ ናይቲ ዴቴሰ፤ ሄይቲካ ኣዚርቃሜ፥ ቦኬሬ፥ ኢሰማኤሌ፥ ሻኣሪያ፥ ኣብዲዩኔ ሃናኔ፤ ሃይቲ ኡባይ ኣዜሌ ናይታ።

* 9:40 ማሪባ-ባኣሌይ ሜምፌቦሰቴ ጌቴቲዳሰ። 1 ሳሜ 4:4 ጴላ።

10

ካዋ ሳኦሌ ሃይቆ

(1ኛሜ 31:1-13)

¹ ፊሊስጶሜ አሳቲ ኢስራኤሌ አሳታራ ኦሌቲዳ፤ ኢስራኤሌ አሳቲ ፊሊስጶሜ አሳታ ሲንፋፌ ባቃቲዳ፤ ኢስራኤሌታፔ ዳሮቲ ጌልቦኦ ዙማ ሁኤን ሃይቂዳ።

² ፊሊስጶሜ አሳቲ ሳኦሌኔ ኢዛ ናይታ ዩዴፈ ጋኪዲ ኢዛ ናይታ ዮናታኔ፥ አቢናዳቤኔ ማልኬሹኦ ዋጂዳ።

³ ኦላይ ሳኦሌ ዩዩ ኦጂዲ ኡንኤፊዴስ፤ ኦላንቻቲ ኢዛ ዋንዳፌን ዱኪ ማዲንፊዳ።

⁴ ሳኦሊ ባ ኦላ ማሳራ ቶኪዛ ዋታዳራዛ፥ «ሃ ቃጸሬቶንታ ፊሊስጶሜ አሳቲ ዩዲ ታ ቦላ ካኦንታ ማላ ኔ ጌላ ማሻን ታና ዋጂ» ጌዴስ።

ጌዶ ኦቲን ኢዛ ኦላ ማሳራ ቶኪዛ ዋታዳራዛ ኬሂ ያዩዳ ጊሻስ ኢጲዴስ፤ ሂስቲን ሳኦሊ ባ ጌላ ማሻ ቦላ ኩንዲዲ ሃይቂዴስ።

⁵ ኢዛ ኦላ ማሳራ ቶኪዛይሲ ሳኦሊ ሃይቂዳይሳ ቤኢዳፔ ጉዬ ኢዚካ ባ ጌላ ማሻ ሳኦን ኤሲዲ ኢዛ ቦላ ኩንዲ ሃይቂዴስ።

⁶ ሄሳላ ሃኒዲ ሳኦሊ፥ ኢዛ ናይቲ ሄቸቲኔ ኢዛሶ አሳቲ ኡባይ ሄ ጋላስ ኢሲፌ ሃይቂዳ።

⁷ ዙሌዛን ዴኢዛ ኢስራኤሌ አሳቲ ኡባይ ባንታ ኦላንቻቲ ባቃቲዳይሳ፥ ሳኦሊኔ ኢዛ ናይቲ ሃይቂዳይሳ ቤኢዲ ኢስቲካ ባንታ ካታማታ አገዲ ጋንጊዳ፤ ፊሊስጶሜ አሳቲ ዩዲ ሄ ካታማታ ኦይኪዳ።

⁸ ዋንቴላ ጋላስ ፊሊስጶሜቲ ኦላ ማሳራታ ሃይቂዳይታ ቦላፌ ቃሪ ኤካናስ ዩዲ ሳኦሊኔ ኢዛ ናይቲ ጌልቦኦ ዙማ ሁኤን ሃይቂዳይሳ ዴሚዳ።

⁹ ሂስቲዲ ኢስቲ ሳኦሌ ሁኤ ቃንጸ ኤኪዲኔ ኢዛ ኦላ ማሳራ ቃሪ ኤኪዳ፤ ሄሳፌ ጉዬ ባንታ ኤቃ ጸሳታሲኔ ባንታ ዴራስ ሃ ጸኖ ሚሺራቸዛ አዋጃና ማላ ፊሊስጶሜ ቢታ ኡባስ ኦስ ከቲ ዩዲዳ።

¹⁰ ኢስቲ ሳኦሌ ኦላ ማሳራታ ባንታ ኤቃ ጸሳታ ኬላታን ዋሊዳ፤ ኢዛ ሁኤዛ ባንታ ኤቃ ጸሳ ዳጎኔ ኬላን ካቂዳ።

¹¹ ፊሊስጶሜ አሳቲ ሳኦሌ ቦላ ኦሊዳይሳ ኡባ ጋላኦዴን ዲዛ ያቡሴ ካታማ አሳቲ ሲዩዳ ዋዴ።

¹² ሚኖ አሳቲ ቢዲ ሳኦሌ ኦሃኔ ኢዛ ናይታ ኦሃ ኤኪዲ ያቡሴ ካታማ ኤሂዳ፤ ሂስቲዲ ያቡሴን ዲዛ ጌታ ሚላ ጋርሳን ሞጊዳ፤ ሄሳፌ ጉዬ 7 ጋላስ ጸሚዳ።

13 ሳኦሊ ጎዳስ አማኔቲቤና፤ ኢዛ ቃላካ ናጎንታ ኢጲዲ ሞይቲሌ ዴይጊዛይታ ዞሪ ኦይቺዳ ጊሻስ ሃይቂዳስ።

14 ሄሳ ጋሶን ጎዳይ ኢዛ ዋጂዲ ኢዛ ካዎቴላ ኢሴዬ ና ዳዊቴስ አላ ኢሚዴስ።

11

ዳዊቴ ካዎቴላ

(2ሳሜ 5:1-10)

1 ሄሳፌ ጉዬ ኢስራኤል አሳይ ኡባይ ኢሲፌ ዳዊቴኮ ኬብሮኔ ቢዲ፣ «ኑኒ ኢሲ አሾኔ ኢሲ ሜቄላ፤

2 ካሴ ሳኦሌ ካዎቴላ ዋጃካ ኢስራኤል አሳ ኦላስ ካሌሊዳይ ኔና፤ ጎዳ ኔ ጸሳይ ኔና፣ ታ ዴራ ኢስራኤል ኔኒ ሄማና፤ ኢስታ ቦላካ ኔኒ ካዎታና ጊዴስ» ጊዳ።

3 ሄሳ ጊሻስ ኢስራኤል ጨማቲ ኡባይ ካዎ ዳዊቴኮ ኬብሮኔ ካታማ ዪዳ፤ ኢዚ ኢስታራ ኬብሮኔን ጎዳ ሲንሳን ጫቄቲዴስ፤ ጎዳይ ሳሜላ ባጋራ ሃሳይዳ ቃላ ማላ ዳዊቴ ኢስራኤል ቦላ ካዎታና ማላ ቲይዳ።

ዳዊቴ ዬሩሳሌም ኦይኪዴስ

4 ዳዊቴኔ ኢስራኤል አሳይ ኡባይ ዬሩሳሌም ካታማ ቢዳ፤ ሄ ዋጃ ያቡሴ አሳቲ ሄን ዲዛ ጊሻስ ሄ ካታማያ ያቡሴ ጌቲታዉስ።

5 ያቡሴ አሳቲ ዳዊቴ፣ «ኔኒ ሃ ካታማ ሙሉካ ጌላካ» ጊዳ፤ ጊዲኮካ ዳዊቴ ጲዮኔን ዲዛ ኢስታ ሚጸ ኦይኪዴስ፤ ሂስቲን ኢዛ ዳዊቴ ካታማ ጌቲታዲስ።

6 ዳዊቴ፣ «ኮይሮቲ ቢዲ ያቡሴ አሳታ ሾጪዛዴይ ኦላ ጋዳዋ ጊዳና» ጊዴስ፤ ሂስቲን ጵሪያ ና ኢዮኦቤይ ኮይሮቲ ቢ ኦሊዳ ጊሻስ ኦላ ጋዳዋ ጊዲዴስ።

7 ዳዊቴ ሄ ሚጸዮ ባስ ዲሳሶ ሂስቲዳ ጊሻስ ሚጸያ ዳዊቴ ካታማ ጌቲታዲስ።

8 ዳዊቴ ሄ ካታማይ ዩሾን ኬቻታ ኬጪዲ ካታማዮ ዛሪ ኬጲዴስ፤ አቲዳ ካታማ ቃሴ ኢዮኦቤይ ዛሪዲ ኬጲዴስ። *

9 ኡባፌ ዋልቃማ ጎዳይ ኢዛራ ዲዛ ጊሻስ ዳዊቴ ሚኒ ሚኒ ቢዴስ።

10:14 ሊዋ 19:31፤ 20:6፤ 1ሳሜ 13:8-14፤ 15:1-24፤ 28:7-8 11:4 ኢያ

15:63፤ ዳና 1:21 * 11:8 ኬቻታ፣ ኬቻቲ ካታማ ገምቤይ ኩንዶንታ ማላ ናጌስ ጎኤቲስ።

ሚኖ ጊዲዳ ዳዊቱ ኦላንቻታ

(2ኛሜ 23:8-39)

10 ሚኖ ጊዲዳ ዳዊቱ ኦላንቻታ ሃይሳፌ ካሊዲ ጸፊቲዳ፤ ኢስቲካ ሃንኮ ኢሰራኤል አሳታራ ጊዲዲ ጎዳይ ኢዛስ ኢሚዳ ሂደታ ቃላ ማላ ኢዛ ካዎቴላይ አካና ማላ ኬሂ ማዲዳኔ ሚንሐሊዳ።

11 ሚኖ ጊዲዳ ዳዊቱ ኦላንቻታ፤ ኮይሮይሲ ሃኪሞኔ ዛርኬፌ ጊዲዳ ያሾቢአሜ፤ ኢዚ ኦላ ጋዳዋ ሄሻታስ ሃላቃ፤ ኢዚ ኢሲቶ ኦላን 300 እስ ዎጂዴስ።

12 ሄ ሄሹ ሚኖ ኦላንቻታ፤ ናሞኣንሐዚ አሂሆሄ ዛርኬፌ ዶዶ ና ኤልኤዘሬ።

13 ፊሊስጶሜ አሳቲ ኦሌታናስ ኤፍሲ-ዴሚሜ ጌቲቲዛሶ ሸቂዳ ዎዴ አላዛሬይ ዳዊቱራ ኢሲፌ ዴስ፤ ባንጋይ ኩሚዳ ጎሻ ጋዴ ጊዶን ኢሰራኤል ኦላንቻቲ ፊሊስጶሜታ ሲንላፌ ባቃቲዳ።

14 ጊዶ አቲን ኢዚኔ ኢዛ ካሊዛይቲ ሄን ሶሆ ኦይኪዲ ፊሊስጶሜ አሳታራ ኤቄቲዳ፤ ጎዳይ ኢስታስ ዎልቃማ ጾኖ ኢሚዴስ።

15 ፊሊስጶሜ ኦላንቻቲ ኤራፋይሜ ሾባን ዱንካኒ ዲዛ ዎዴ 30 ሃላቃታ፤ ሄሻቲ ዳዊቲ ዲዛሶ አዱላሜ ጎንጎሎ ማታን ዲዛ ዛላኮ ዎጂዳ።

16 ሄ ዎዴ ዳዊቲ ሚዳ ጊዶን ዴስ፤ ፊሊስጶሜ ኦላንቻታ ቡቲይ ቤቴሊሄሜን ዴስ።

17 ዳዊቲ ሃሐ ኤያናስ አሞቲዲ፡ «ቤቴሊሄሜ ካታማ ፔንጌ ላንቄን ዲዛ ፑልቶ ሃላፌ ታና ኦኔ ኡሻናይ!» ጊዴስ።

18 ሄሹ ሚኖ ዳዊቱ ኦላንቻቲ ፊሊስጶሜ አሳቲ ዱንካኒ ኡቲዳሶሆራ ካንሲ ቢዲ ቤቴሊሄሜ ካታማ ፔንጌን ዲዛ ፑልቶዛ፤ ሃሐ ዱቄዲ ዳዊቲስ ኤሂዳ፤ ጊዶ አቲን ዳዊቲ ኡዮንታ ኢጲዲ ሄ ሃላ ጎዳ ሲንላን ጉሲዴስ።

19 ሂስቲዲ፡ «ሃይሳ ማላ ኦሶፔ ታና ጸሲ ናን! ታ ሃይሳ ኡይኮ ባ ሼሞፖ ባይዚዲ ኤሂዳ አሳታ ሱሐ ኡሻ ማላ ጊዴኔ?» ጊዴስ፤ ሄሳ ጊሻስ ዳዊቲ ሄ ሃላ ኡዬቤና፤ ሄ ሄሹ ሚኖ ኦላንቻቲ ሄሳ ኦሊዳ።

20 ኢዮኣቤ ኢሻ አቢሳዬይ ሄሻታስ ሃላቃ፤ ኢዚ ባ ቶራን 300 አሳታ ኦሊ ዎጂዴስ፤ ሄሳ ጋሶን ኢዚካ ሄሻታ† ማላ ኤሬቲዴስ።

21 ኢዚ ሄሻታራ ቆዴቶንታ ኣጊኮካ ኢስታፌ አጂዳ ቦንቾ ዴሚዴስ፤ ኢስታስካ ሃላቃ ጊዲዴስ።

† 11:20 ሄሻታ ጊዛይሲ ሄሹ ታማታ ጌቲታና ዳንዳዬቴስ።

22 ቃብጺኤሌፔ ዪዳ ዮዳሄ ና ባናያይ ኤሬቲዳ ኦላንቻኔ ዋልቃማ ሚሽ ኦሊዳ አሳ፤ ኢዚ ናሞኡ ኤሬቲዳ ሞክቤ ቢታ አሳታ ዋዲዳስ፤ ቃሴ ሻቺ ዳሪዳ ኢሲ ጋላስ ጎንጎሎ ጊዶ ጌሊዳ ጋሞ ዋዲዳስ።

23 ባናያይ ኢዛስ ጌሳይ ኢቻሹ ዋዳ ጊዲዛ ጊብጼ ቢታ አስ ዋዲዳስ፤ ሄ ጊብጼ አዳዛ ኩሼን ሹማኔ ዋንዲራሹ ኬና ቶራይ ዳስ፤ ባናያይ ጊዲኮ ጉፌ ኦይኪ ቢዲ ኢዛ ኩሼን ዲዛ ቶራ ዳፊ ኤኪዲ ኢዛ ቶራን ኢዛ ዛሪ ዋዲዳስ።

24 ዮዳሄ ና ባናያይ ሃይታንታ ኦሊዳስ፤ ኢዚካ ሄዛታ ማላ ኤሬቲዳ አስ ጊዲዳስ።

25 ኢዚ ሄዛታራ ቆዴቶንታ አጊኮካ 30 ኦላንቻታፔ አዲ ቦንቹቲዳስ፤ ዳዊቲ ኢዛ ባና ናጊዛይታ ቦላ ሃላቃ ሂስቲ ሹሚዳስ።

26 አሳ ጊዶን ዲዛ ሚኖ ኦላንቻቲ ሃይሳፌ ካሊ ዲዛይታ፡ ኢዮአቤ ኢሻ አሳሄሌ፡

ቤቴሊሄሜ አስ

ዴዴ ና ኤልያኔ፡

27 ሃሮዴ አስ ሻሞቲ፡

ፒሎኔ አስ ሄሌጾ፡

28 ቱቁሄ አስ ኢቁሻ ና ኢራ፡

አናቶቲ አስ አቢኤዜሬ፡

29 ሁሼ አስ ሲቢካዬ፡

አሂሆሄ አስ ኤላዬ፡

30 ናጾፌ አስ ማሂራዬ፡

ናጾፌ አስ ባኣና ና ሄሌዴ፡

31 ቢኒያሜ ዛርኬፌ ጊቢኣ አስ

ኤሪባዬ ና ኢታዬ፡

ፒራቶኔ አስ ባና፡

32 ጋኣሼ ሾባ አስ ሁራዬ፡

አራቤ አስ አቢኤሌ፡

33 ባሂሩሜ አስ አዚሞቲ፡

ሻልቦኔ አስ ኤሊያሂቤ፡

34 ጊዞኔ አስ ሃሼሜ፡

ሃራሬ ዴሬ አስ

ሻጌ ና ዮናታኔ፡

35 ሃራሬ ዴሬ አስ

ሳካሬ ና አሂአሜ፡

ኡሬ ና ኤልፋሌ፡

- 36 ማኬሪ ዳሬ አስ ሄፌሬ፤
 ፒሎኔ ዳሬ አስ አካያ፤
 37 ቃርሜሎሴ አስ ሄዱሬ፤
 ኤዘባዬ ና ናኢራዬ፤
 38 ናታኔ ኢሻ አዩኤሌ፤
 አጋሬ ና ሚቢሃሬ፤
 39 አሞኔ አስ ዛላቃ፤
 ጹሪያ ና ኢዮኣቤ
 ኦላ ማሳራ ቶኪዛ
 ቢኦሮቴ አስ ናሂራዬ፤
 40 ያቲሬ አስ ኢራ፤
 ያቲሬ አስ ጋሬቤ፤
 41 ሂቴ አስ ኦሪዮ፤
 አሂላዬ ና ዛባዴ፤
 42 ኦሮቤሌ ዛርኬፌ
 ሺዛ ና አዲኔ፤
 ኢዚ ኦሮቤሌ ዛርኬታሲኔ
 ባናራ ኢሲፌ ዲዛ 30
 አሳታሰ ሃላቃ።
 43 ማኢካ ና ሃናኔ፤
 ሚታኔ አስ ኢዮሳፊዶ፤
 44 አሽታሮቴ አስ ኡዚያ፤
 አሮኤሬ ዳሬ አስ ሆታሞ
 ናይታ ሻሜኔ ዩኢኤሌ፤
 45 ሺሚሬ ና ዩዲኤሌኔ
 ኢዛ ኢሻ ቲዜቴ ዳሬ አስ ዮሃ፤
 46 ማሃዌ አስ ኤልኤሌ፤
 ኤልናሜ ናይታ
 ዩሪባያኔ ዮሻያ፤
 ሞኣቤ ዳሬ አስ ዩቲማ፤
 47 ኤልኤሌ፤ ኢዮቤዴኔ
 ጾቤ ዳሬ አስ ያኢሲኤሌ።

12

በኒያሜ ዛርኬፌ ዳዊቲኮ ዩዳ ኦላ አሳታ

1 ዳዊቲ ቂሴ ና ሳኦሌፕ ባቃቲዲ ጸጊላጌን ኡቲዳ ዎዴ ኢዛኮ
 ዩዳ አሳቲ ሃይሳፌ ካሊዛይታ፤ ኢሰቲካ ካሴ ኦላ ዎዴ ኢዛ
 ማዲዳ ኦላ ቃራታ ጊዶን ዴቲሰ።

2 ኢስቲ ኡሻቻ ኩሼኒኔ ሃዲርሳ ኩሼን ዋንዳፌ ዱካናሲኔ ያንባርሼ ጳይቃናሰ ዳንዳይዛ ኦላንቻታ፤ ኢስቲካ ቢኒያሜ ዛሬ ጊዲዳ ሳኦሌሰ አሾ ዳቦታ።

3 ኢስታ ሃላቃይ ጊቢአ አሰ ሻማኤ ና ኣሂኤዜሬኔ ኢዮአሳ።
ሃራቲ ቃሴ ኣዚሞቱ ና ዩዚኤሌኔ ፓሌጾ፥ ባራኬ፥ ኣናቶቴ አሰ ኢዩ፥

4 ኤሬቲዳ 30 ኦላንቻታሰ ሃላቃኔ ኤሬቲዳ ኦላንቻ ጌባኦኔ ዳሬ አሰ ዩሺማኤ፥ ኤርማሳ፥ ያሃዚኤሌ፥ ዮሃናኔ፥ ጋዴሬ ዳሬ አሰ ዮዛባዴ፥

5 ኤልኡዛዩ፥ ያርሞቱ፥ ባኣሊያ፥ ሻማሪያ፥ ሃሪፌ አሰ ሻፋጺያ፥

6 ቆሬ አሰ ሂልቃና፥ ዩሺያ፥ ኣዛሪኤሌ፥ ዮኤዜሬኔ ያሾቢአሜ፥

7 ጋዶሬ አሰ ዩሮሃሜ ና ዮኤሌኔ ዛባዲያ።

ጋዴ ዛርኬፌ ዳዊቲኮ ዪዳ ኦላ አሳታ

8 ዳዊቲ ባዘን ባቃቲ ኣቲዛሶን ዲዛ ዋዴ ጋዴ ዛርኬታፔ ኦላንቻቲ ኢዛኮ ዪዳ፤ ኢስቲካ ሚኖኔ ኦላሰ ጊጌቲዳ አሳታ፤ ቃሴካ ጎንዳሌኔ ቶራ ኦይሰ ዳንዳይዛይታ፤ ኢስታ ኣይፌሶይ ጋሞ ማላ ባቢሴሰ፤ ኢስቲ ዙማ ቦላ ጉፒዛ ጌኔሳ ማላ ፒላቴቲሰ።

9 ኢስታ ሃላቃይ ኮይሮይሲ ኤዜሬ፥

ናሞኣንሶዚ ኣብዲዩ፥

ሄሻንሶዚ ኤልያቤ፥

10 ኦይዳንሶዚ ሚሺማኔ፥

ኢቻሻንሶዚ ኤርማሳ፥

11 ኡሱፑንሶይ ኣታዬ፥

ላፑንሶዚ ኤልኤሌ፥

12 ኦሰፑንሶዚ ዮሃናኔ፤

ኡዲፋንሶዚ ኤልዛባዴ፤

13 ታማንሶዚ ኤርማሳ፤

ታማኔ ኢሲንሶዚ ማኪባናዬ።

14 ሃይቲ ጋዴ ዛርኬታ ጋርሳን ኦላንቻታ ሃላቃታ፤ ኢስታፌ ዳርቲ ሻላቃታ ማላ፥ ኣማርዳይቲ ማቶ ሃላቃታ ማላ ቆዴቲዳ።

15 ዮርዳኖሴ ሻፋይ ኪዳ ሳሎ ሼሞፒዳ ኮይሮ ኣጊናን ፒኒዲ ዙላፌ ኣርሼይ ሞኪዛ ባጋራኔ ኣርሼይ ዉሊዛ ባጋራ ዱንካኒ ኡቲዳ አሳ ኡባ ዬዳሊዳ።

ቢኒያሜ ዛርኬታፔኔ ዩሁዳ ዛርኬታፔ ዳዊቲኮ ቢዳ ኦላንቻታ

16 ቢኒያሜ ዛርኬታፔኔ ዩሁዳ ዛርኬታፔ ኣማርዳ አሳቲ ዳዊቲ ዲዛሶ ሚጻ ዪዳ።

17 ሂሰቲን ዳዊቲ ኢስታራ ጋይታና ከኢዲ፥ «ኢንቴ ታና ማዳናስ ሳርን ታኮ ዪዳ ጊዲኮ ታ ኢንቴና ኡፋይሳን ሞካ ኤካና፤ ጊዶ ኣቲን ኢንቴ ታና ታ ሞርኬታስ ኣሏ ኢማናስ ዪዳ ጊዲኮ ኑ ኣዋታ ጸሳይ ሃይሳ ቤኢዲ ፒርዶ!» ጊደስ።

18 ሄሳፌ ጉዬ 30 ኣሳታ ሃላቃ ኣማሳዬ ቦላ ጸሳ ኣያናይ ዋጂን ኢዚ፥ «ዳዊቲ! ኑኒ ኔይታ!
ኢሴዬ ና ዳዊቲ!
ኑኒ ኔናራ ኢሲፌ ዶስ!
ኔሲኔ ኔና ማዲዛይታስ
ሳርይ ጊዶ!
ኔ ጸሳይ ኔና
ማዳና» ጊደስ።

ሄሳ ጊሻስ ዳዊቲ ሞኪ ኤኪዲ ባ ኦላንቻታ ቦላ ሃላቃ ሂሰቲደስ።

ሚናሴ ዛርኬፌ ዳዊቲኮ ዪዳ ኣሳታ

19 ዳዊቲ ፊሊስጶሜታራ ኢሲፌ ጊዲዲ ሳኦሌ ኦላናስ ቢዳ ዋጂ ሚናሴ ዛርኬፌ ኣማርዳ ኣሳቲ ዳዊቲኮ ቢዲ ኢዛ ቆሚዳ፤ ጊዶ ኣቲን፥ «ዳዊቲኔ ኢዛ ኦላንቻቲ ኢስታ ካዋዛ ሳኦሌስ ኣሏ ኢማናኮ» ጊ ሂርጊዳ ጊሻስ ፊሊስጶሜ ኣሳቲ ኬሂ ዞሬቲዳፔ ጉዬን ኢስታ ጉዬ ጸጊላጌ ዛሪዳ።

20 ዳዊቲ ጸጊላጌ ካታማ ሲሚሺን ኢዛ ማዳናስ ሚናሴ ዛርኬታፔ ኬዚ ዪዳ ሻላቃቲ ኣዲናሄ፥ ዮዛባዴ፥ ዪዲኤሌ፥ ሚካኤሌ፥ ዮዛባዴ፥ ኤሊሁኔ ጸልታዬ።

21 ኢስቲ ኡባቲካ ኤሬቲዳ ሚኖ ኦላንቻታ ጊዲዳ ጊሻስ ዳዊቲ ኦላ ዋታዳራታ ቦላ ሃላቃታ ጊዲዳ፤ ዳዊቲ ሞርኬታ ኦሊዲ ኢዛ ማዲዳ።

22 ዳዊቲ ኦላንቻቲ ጸሳ ኦላንቻታ ማላ ጮራታና ጋካናስ ኢዛ ማዲዛ ኣሳይ ጋላስ ጋላስ ጉጃቲስ።

ኬብርኔን ዳዊቲ ቆሚዳ ኦላንቻታ ቆዳ

23 ጎዳይ ኢሚዳ ሂዶታ ቃላ ማላ ሳኦሌ ካዋቲሳ ዳዊቲስ ዛራናስ ዳዊቲኮ ኬብርኔ ዪዳ ኦላ ታማርዳ ዋታዳራታ ቆዳይ ሃይሳፌ ካሊዛይሳ፤

24 ጎንዳሌኔ ቶራ ኦይኪዲ ኦላስ ጊጌቲዳ ዩሁዳ ዛርኬቲ ኡሱፑን ሺያኔ ኦሰፑን ጾታ።

25 ሲሞና ዛርኬፌ ኦላስ ጊጊዳ ሚኖኔ ዋልቃማ ኦላንቻቲ ላፑን ሺያኔ ኢሲ ጾት።

26 ሊዌ ዛርኬፌ ኦይዱ ሺያኔ ኡሱፑን ጾት፥

27 ኣርኔ ዛርኬታ ሃላቃ ዮዳሂ ጉጂን ሄቩ ሺያኔ ላፑን ጾት።

28 ኤሬቲዳ ኦላንቻ ሳዶቄ ዳቦታ ጊደፌ ኢዛራ ጉጂን ናምኡ ታማኔ ናምኡ።

29 ቢኒያሜ ዛርኬፌ ሳኦሌ ዳቦቲ ሄቹ ሺያ።

ጊደ ኣቲን ቢኒያሜ ዛርኬፌ ዳሪዛ ባጋቲ ሳኦሌ ኬፋ ኣሳሰ ሄ ዎዴይ ጋካናሰ ኣማኔቲዛይታ።

30 ኤፍሬሜ ዛርኬፌ ባንታ ኣዋታ ኬፋን ኤሬቲዳ ሚኖቲ ናምኡ ታሙ ሺያኔ ኦሰቸን ጾት።

31 ዳዊቱ ካዎፋናሰ ደሬቲዳ ሚናሴ ዛርኬ ባጋፌ ታማኔ ኦሰቸን ሺያ።

32 ኢሰራኤሌ ኣሳይ ኣይ ኦፋናሰ ቤሲዛቦ ዎዴዛ ሻኪ ኤሪዛ ኣጵ ኤራንቻቲኔ ዪሳቦሬ ዛርኬ ሃላቃቲ ናምኡ ጾት፤ ኢሰታራ ዪዳ ኢሰታ ዳቦቲ ኡባይ ኢሰታሰ ኣዛዜቴቴሰ።

33 ኦላ ሜዜቲዳይቲ፥ ኦላ ማሳራ ኡባን ኦሌታናሰ ዳንዳይዛይቲኔ ዎዚናይ ባላቶንታ ዳዊቱ ማዳናሰ ዪዳ ዛቢሎኔ ባጋቲ ኢቻሽ ታሙ ሺያ።

34 ኒፍታሌሜ ዛርኬታሰ ኢሲ ሺያ ሃላቃቲ ዴቴሰ፤ ጎንዳሌኔ ቶራ ኦይኪዳ ሄቹ ታማኔ ላቸን ሺ ኣሳቲ ኢሰታራ ኢሲፌ ዴቴሰ።

35 ዳኔ ዛርኬፌ ኦላሰ ጊጌቲዳ ኣሳቲ ናምኡ ታማኔ ኦሰቸን ሺያኔ ኡሱቸን ጾት።

36 ኣሴሬ ዛርኬፌ ኦላ ሜዜቲዳ ጊጌቲዳ ኦላንቻቲ ኦይዱ ታሙ ሺያ።

37 ዮርዳኖሴ ሻፋፔ ኣርሼይ ሞኪዛ ባጋን ዲዛ ኦሮቤሌ ዛርኬታፔ፥ ጋዴ ዛርኬታፔኔ ሚናሴ ዛርኬ ባጋፌ ዲማ ዲማ ቆሞ ማሳራ ኦይኪዳ ዪዳ ኣሳቲ ጾታኔ ናምኡ ታሙ ሺያ።

38 ሃ ኦላሰ ጊጊዳ ኦላንቻቲ ኡባይ ዳዊቱ ኢሰራኤሌ ቦላ ካዎፋናሰ ባንታ ቆፋ ኢሲ ቦላ ቃቺዲ ኬብሮኔ ካታማ ዪዳ፤ ቃሴ ሃንኮ ኣቲዳ ኢሰራኤሌ ዴሬ ኡባይ ዳዊቱ ካዎፋናሰ ኢሲ ዎዚናን ጊዲዴሰ።

39 ኢሰታ ዳቦቲ ኢሰታሰ ኮሺዛይሳ ጊግሲ ዎሒዳ ጊሻሰ ሚሼኔ ኡዪሼ ዳዊቱኮን ሄቹ ጋላሰ ጋምኢዳ።

40 ኢሰራኤሌ ኣሳሰ ጊታ ኡፋይሰ ጊዲዛ ጊሻሰ ኢሰታ ሾሮፔ ደሚዲ ሃቦን ዲዛ ዪሳኮሬፔ፥ ዛቢሎኔፔኔ ኒፍታሌሜፔ ኣሳይ ኣቶንታ ካፉ፥ ዲሌ፥ ባላሴኔ ዛቢቤ ኮምፓ፥ ዎይኔ ኡሺኔ ዎጋራ ዛይቲ ሃሬን፥ ባቁሎን፥ ጋሜላኒኔ ቦራን ጫኒዲ ኤሂዴሰ፤ ቃሴካ ኢሰቲ ሹኪ ማና ማላ ሚዛታኔ ዶርሳታ ኤኪ ዪዳ።

13

ታቦታ ዛሪ ኤሆ
(2ሳሜ 6:1-11)

¹ ሄሳፌ ጉዬ ዳዊት ሻላቃታራ፥ ማቶ ሃላቃታራን ኦላንቻ ሃላቃታ ኡባታራ ዘራቲዳሰ።

² ሂሰቲዲ ኢሰራኤል አሳ ኡባሰ፥ «ኢንቴሰ ሎኦ ሚሳቲዛይሳ ጊዲኮን ጎዳ ኑ ጸሳ ሸን ጊዲኮ ኢሰራኤል ቢታን ማታኒን ሃኮን ዲዛ ኑ ኢሻቲ ቃሴካ ባንታ ካታማታኒን ባንታ ሜሄ ሄሚዘሶሆታን ዲዛ ቄሴቲን ለዌቲ ኦናራ ኢሲፌ ሸቃና ማላ አን ኪታ ዬዶሰ።

³ ሳኦሌ ካዎቴላ ዎዴ ኑኒ ዬጌ አጌዳ ኑ ጸሳ ታቦታ አን ዛሪዲ ኤሆሰ» ጊዳሰ።

⁴ ዳዊት ዮቲዳይሲ አማንፊዛዝ ጊዲዳ ጊሻሰ አሳይ ኢዛ ቆፋ ኤኪዳሰ።

⁵ ሄሳ ጊሻሰ ዳዊት ጸሳ ታቦታ ቂሪያቴ-ዪኦሪሜፔ ኤሃና ማላ ጊብጼ ዛዋፔ ዶሚዲ ሃማቴ ፑርዴ ጋካናሰ ዲዛ ኢሰራኤል አሳ ኡባ ሸሺዳሰ።

⁶ ዳዊትን ኢሰራኤል አሳይ ኡባይ ኪሩቤታፔ ጊደን ባ አራታ ቦላ ኡቲዳ ጎዳ ሱጎላን ጾይጌቲዳ ጸሳ ታቦታ ኤሃናሰ ዩሁዳ ቢታን ዲዛ ባኦላ ጌቲቲዛ ቂሪያቴ-ዪኦሪሜ ካታማ ቢዳ።

⁷ ጸሳ ታቦታዛ አቢናዳቤ ሶፔ ኦራላ ፓራ-ጋሬ ቦላ ዋፊ ኤሂዳ፤ ፓራ-ጋሬዛ ላጊዛይቲ ኦዛን አሂዮ።

⁸ ዳዊትን ኢሰራኤል አሳይ ኡባይ ዲላን ማሲንቆን፥ ካራቤን፥ ዳላኒን ጸሩሞባን ባንታ ኩሜላ ዋልቃን ጸሳ ሲጎላን ኡፋዬቲዲ ቦንቺዳ።

⁹ ኢሰቲ ኪዶና ጌቲቲዛሶን ዲዛ ካላ ባሌዛኮ ጋኪዳ ዎዴ ጫኒዳ ቦራቲ ባርጋጌ ቆጶቲን ኦዛይ ታቦታዛ አሻናሰ ኩሼ ዬዲዳሰ።

¹⁰ ኢዛ ኩሼይ ታቦታዛ ቦቺዳ ጊሻሰ ጎዳ ሃንቆይ ኦዛ ቦላ ኤጺ ኬዚዳሰ፤ ሄሳ ጊሻሰ ኢዚ ሄን ጎዳ ሲጎላን ሃይቂዳሰ።

¹¹ ጎዳይ ሃንቁቲዲ ኦዛ ዎጲዳ ጊሻሰ ዳዊት ካዮቲዳሰ፤ ሃቕ ጋካናሰ ሄ ሶሆይ ኦዛ ሜቆሶ ጌቲቲሰ።

¹² ሄ ጋላሰ ዳዊት ጸሳሰ ያዪዳ ጊሻሰ፥ «ጸሳ ታቦታ ታኮ ዎሰታ ኤሃናሰ ዳንዳያዚና?» ጊዳሰ።

¹³ ሄሳ ጊሻሰ ዳዊት ታቦታዛ ባናራ ኤፋናፔ ጌቲ ዴሬ አሰ አቢዳሬሶ ኤፊዳሰ።

14 ጸሳ ታቦታይ አቢዳሬሶን ኢዛሶ አሳታራ ሄዙ አገና ጋምኢዳስ፤ ጎዳይ ኢዛ ኬፋ አሳኔ ኢዛስ ዲዛ ሚሽ ኡባ አንጂዳስ።

14

ዩሩሳላሜን ዳዊቱ ኦሶታ

(2ሳሜ 5:11-16)

1 ጸረሴ ካዎ ሁራሜይ ዳዊቱስ ካዎ ኬል ኬጸና ማላ ኪታ አሳታ፡ ሹቶ ማሲዛይታኔ አናጾታ ዚጋ ሚላራ ዳዊቱኮ ዩዲዳስ።

2 ጎዳይ ኢሰራኤል ቦላ ኢዛ ካዎሊዳይሳኔ ባ አሳ ኢሰራኤል ጊሻስ ኢዛ ካዎቱፋ ጾቁ ሂስቲ ቦንቺዳይሳ ዳዊቱ አኬኪዳስ።

3 ሄሳፌ ጉዬ ዳዊቱ ዩሩሳላሜን ሃራ ማቼታ ጉጂ ኤኪዲ አቱማ ናይታኔ ማጫ ናይታ ዩሊዳስ።

4 ዳዊቱ ዩሩሳላሜን ዩሊዳ አቱማ ናይቲ ሻሙኤ፡ ሾባቤ፡ ናታኔ፡ ሶሎሞኔ፡

5 ኢያቤሄሬ፡ ኤልሹኤ፡ ኤልፓሌዬ፡

6 ኖጋሄ፡ ኔፌጌ፡ ናፊያ፡

7 ኤልሻማኤ፡ ቤኤልያዴኔ ኤልፋሌዬ። *

ፊሊስጶሜ አሳ ጸኔቴል

(2ሳሜ 5:17-25)

8 ዳዊቱ ኢሰራኤል ኡባ ቦላ ካዎ ጊዲዲ ተዩቲዳይሳ ፊሊስጶሜ አሳይ ሲዩዲ ኡባይ ዳዊቱ ኦይካናስ ኬኢዳስ፤ ዳዊቱ ሄሳ ሲዩዲ ኢሰታራ ኦሌታናስ ኬዚዳስ።

9 ፊሊስጶሜ አሳይ ኤራፋይሜ ዙሌዛ ዩዲ ዎራጂዳስ።

10 ዳዊቱካ፡ «ታኒ ባዳ ፊሊስጶሜታ ኦሎ? ኔኒ ኢሰታ ታ ኩሼን አሳ አማኔ?» ጊ ጸሳ ኦይቺዳስ።

ሂስቲን ጎዳይ ኢዛስ፡ «ኤ ባዳ ኦላ፤ ታኒ ኢሰታ ኔስ አሳ አማና» ጊዳስ።

11 ሂስቲን ዳዊቱኔ ኢዛራ ዲዛ አሳይ ባኣሊ-ፓራጶሜ ጌቴቲዛሶ ቢዲ ሄን ኢሰታ ኦሊ ጸኒዳ፤ ዳዊቱ፡ «ዲኦ ሃሊ ሾዲ ኤፊዛ ማላ ጸሲ ታ ሞርኬቲ ታ ኩሼን ሾዴታና ማላ ኦሊዳስ» ጊዳስ፤ ሄሳ ጊሻስ ሄ ሶሆዛ ሱንሊ ባኣሊ-ፓራጶሜ ጌቴቲዳስ።

13:14 1ታሪ 26:4-5 * 14:7 ዳዊቱስ ዩሩሳላሜን ዩሊቲዳ አቱማ ናይታ ሱንሊ 2ሳሜ 5:14-16፤ 1ታሪ 3:5-7ኔ 14:4-7 ጸፊቲዳስ፤ ጊዶ አቲን ኢብራዊታ ማጻፋን ኢሶታ ኢሶታ ሱንላይ ኡባሶን ኢሲ ማላ ጊዳና።

12 ፊሊስጴሚቲ ባንታ ኤቃ ጸሳታ ሄን ዬጊ ቢዳ። ሂስቲን ዳዊቲ ኢስታ ኤቃ ጸሳታ ታማን ጹጋና ማላ አዛዚደሰ።

13 ፊሊስጴሚ አሳይ ናምእንሉ ዪዲ ሄ ሾባ ዎራጂደሰ።

14 ዳዊቲ ጸሳ ናምእንሉ ዛሪ ኦይቹደሰ፤ ሂስቲን ጸሲ ኢዛሰ። «ኔኒ ኢስታ ቦላ ሲቲ ጋዳ ቦፓ። ኢስታ ጊዶላዳ ኤላ ሚላሰ ሲንላ ባጋራ ኢስታ ኦላናሰ ገጌታ።

15 ኤላ ሚላዛ ዳራን ሳልፌ ገሪሰ ኔኒ ሲዪዳ ዎዴ ኦላናሰ ኤሌ ኩዛ፤ ጋሶይካ ሂሲ ፊሊስጴሚ ኦላንቻታ ሾጫናሰ ጸሳይ ኔፔ ሲንላን ኩዚዳ ገሻሳ ጉሳ» ገደሰ።

16 ሄሳ ገሻሰ ጸሳይ አዛዚዳ ማላ ዳዊቲ ኦሊደሰ። ጌባኦፔፔ ቢዲ ጌዜሬ ጋካናሰ ኢስራኤሌ አሳይ ፊሊስጴሚ ኦላንቻታ ዲፒ ሂስቲደሰ።

17 ሄሳ ጋሶን ዳዊቲ ጎባቴሊ ቢታ ኡባን ናሹቲደሰ። ጎዳይ ካዎቴላቲ ኡባይ ዳዊቲሰ ያያና ማላ ኦሊደሰ።

15

ታቦታዛ ዬሩሳላሜ ኤሆ

1 ዳዊቲ ባ ሱንላን ዳይጌቲዳ ካታማን ባሰ ኩላታ ኬጲደሰ፤ ጸሳ ታቦታሲካ ሶሆ ገግሲዲ ዲንካኔ ኤሲደሰ።

2 ሄሳፌ ጉዬ ዳዊቲ፤ «ጸሳ ታቦታ ቶካናሲኔ ሜርናሰ ጸሳሰ ሃጋዛና ማላ ጎዳይ ዶሪዳ ሌዌታፔ ኣቲን ሃራ ኣሲ ኦኒካ ጸሳ ታቦታ ቶኮፎ» ገ አዛዚደሰ።

3 ዳዊቲ ጎዳ ታቦታሰ ገግሲዳ ሶሆ ታቦታዛ ኤሃና ማላ ኢስራኤሌ አሳ ኡባ ዬሩሳላሜን ሺሺደሰ።

4 ቃሴካ ኣርኔ ዛሬታኔ ሌዌታ ዳይጊ ሺሺደሰ፤

5 ቃኣቴ ዜሬላታፔ ሃላቃ ጊዲዳ ኡርኤሌኔ ኢዛ ዳቦታፔ ኢሲ ዴታኔ ናምኡ ታማ፤

6 ሜራሬ ዜሬላታፔ ሃላቃ አሳያኔ ኢዛ ዳቦታፔ ናምኡ ዴታኔ ናምኡ ታማ፤

7 ጌርሾኔ ዜሬላታፔ ሃላቃ ኢዩኤሌኔ ኢዛ ዳቦታፔ ኢሲ ዴታኔ ሄቩ ታማ፤

8 ኤልጻፋኔ ዜሬላታፔ ሃላቃ ሻማኤኔ ኢዛ ዳቦታፔ ናምኡ ዴታ፤

9 ኬብርኔ ዜሬላታፔ ሃላቃ ኤልኤሌኔ ኢዛ ዳቦታፔ ኦሰፑን ታማ፤

10 ኡዚኤሌ ዜሬጻታፔ ሃላቃ ኣሚናዳቤኔ ኢዛ ዳቦታፔ ኢሲ ዴታኔ ታማኔ ናምእ።

11 ሄሳፌ ጉዬ ዳዊቲ ቄሴታ ሳዶቄኔ ኣቢያታሬ፥ ቃሴ ሌዌታ ኡርኤሌ፥ ኣሳያ፥ ኢዩኤሌ፥ ሻማኤ፥ ኤልኤሌኔ ኣሚናዳቤ ዴይጊዴሰ።

12 ሂሰቲዲ ኢሰታሰ፥ «ኢንቲ ሌዌ ከፋ ኣሳታሰ ሃላቃታ ጊዲዳ ጊሻሰ ኢንቲና ጌሺቲ፤ ሄሳፌ ጎዳ ኢሰራኤሌ ጸሳ ታቦታ ታ ኢዛሰ ጊግሲዳሶ ኤሂቲ።

13 ካሴካ ኢንቲ ሌዌ ቆሞቲ ጸሳ ታቦታ ቶኮንታ ኣጊዳ ጊሻሲኔ ኑኒካ ኢዛ ዎጋ ማላ ዎስቲ ኤፋናኮ ጸሳ ኦይቸንታ ኣጊዳ ጊሻሰ ጎዳ ኑ ጸሳይ ኑና ቃጸይዴሰ» ጊዴሰ።

14 ሄሳ ጊሻሰ ጎዳ ኢሰራኤሌ ጸሳ ታቦታ ኤሃናሰ ቄሴቲኔ ሌዌቲ ባንታና ጌሺዳ።

15 ጎዳይ ሙሴ ባጋራ ካሴ ኣዛዚዳ ማላ ሌዌቲ ጸሳ ታቦታ ቶሆ ሚላራ ባንታ ሃሼን ቶኪዳ።

16 ሄሳፌ ጉዬ ዲሒኔ ማሲንቆ ዲጺሹ፥ ዳላ ቃሒሹ፥ ኡፋይሳ ማዛሙራ ዩጸና ማላ ሌዌታ ካሌሒዛይቲ ባንታ ዳቦታ ጋርሳፌ ኣሰ ዶራና ማላ ዳዊቲ ኣዛዚዴሰ።

17 ሄሳ ጊሻሰ ሌዌቲ ኢዩኤሌ ና ሄማኔ፥ ኢዛ ዳቦታፔ ባራካዬ ና ኣሳፌኔ ኢሰታ ኢሻንታፌ ሜራሬ ዛርኬ ቄሲያ ና ኤታኔ ሹሚዳ።

18 ቃሴ ናምእንላ ማራን ዛካራሳ፥ ያኢዚኤሌ፥ ሻሚራሞቲ፥ ዩሂኤሌ፥ ኡኔ፥ ኤልያቤ፥ ባናያ፥ ማኢሳያ፥ ማቲቲያ፥ ኤልፋሌሁ፥ ሚቄኔያኔ ፔንጌ ናጊዛይታ ኦቤድ-ኤዶሜኔ ዩኢኤሌ ሱንሒዳ።

19 ጸርቂማላ ዳላ ቶቄ ሂሰቲ ጊሪሲ ሲሳና ማላ ሄማኔ፥ ኣሳፌኔ ኤታኔ ሱንሒዳ።

20 ቃሴ ማሲንቆ ካኣና ማላ ዛካራሳ፥ ያኢዚኤሌ፥ ሻሚራሞቲ፥ ዩሂኤሌ፥ ኡኔ፥ ኤልያቤ፥ ማኢሳያኔ ባናያ ሱንሒዳ።

21 ዲሐ ኦርዴራ ሸጫና ማላ ማቲቲያ፥ ኤልፋሌሁ፥ ሚቄኔያ፥ ኦቤድ-ኤዶሜ፥ ዩኢኤሌኔ ኣዛዚያ ሱንሒዳ።

22 ሌዌታ ሃላቃ ካናኒያ ዩላሰ ኢሞታይ ኢዛሰ ዲዛ ጊሻሰ ዩጸዛይታ ታማርሳና ማላ ሱንሒዳ።

23 ባራካዬይኔ ሂልቃናይ ታቦታ ዱንካኔ ፔንጌ ናጋናሰ ዶሬቲዳ።

24 ቃሴ ቄሴቲ ሹባኒያ፥ ኢዮሳፊጾይ፥ ናቲናኤሌይ፥ ኣማሳዬይ፥ ዛካራሲ፥ ባናያይኔ ኤልኤዜሬይ ጸሳ ታቦታ ሲንላን ጸሩሞባ ፑናናሰ ዶሬቲዳ፤ ኦቤድ-ኤዶሜይኔ ዩሂያይ ታቦታ ናጋናሰ ዶሬቲዳ።

(2ሳሜ 6:12-22)

25 ሄሳፌ ጉዬ ዳዊቲ፥ ኢስራኤል ጨማቲኔ ሻላቃቲ ጎዳ ታቦታ ኦቤድ-ኤዶሜ ሶፔ ኤሃናስ ኡፋዬቲዲ ቢዳ።

26 ጫቆ ቃላ ታቦታ ቶኪዳ ለዌታ ጸሳይ ማዲዳ ጊሻስ ኢስቲ ላፑን ኮርማ ቦራታኔ ላፑን ቆርሾታ ያርሺዳ።

27 ዳዊቲ፥ ታቦታ ቶኪዳ ለዌቲ ኡባይ፥ ዬላ ዬጸዛይቲኔ ኢስታ ሃላቃ ካናኒያ ቃጨናፔ ዳዴቲዳ ላይኖ ማይኢዳ፤ ቃሴካ ዳዊቲ ሌኤ ቃጨናፔ ዳዴቲዳ ኤፋዴ ማይኢዴስ።

28 ሂስቲዲ ኢስራኤል ኡባይ ሆሞቦጨሽ ጸሩሞባኔ ዛዬ ፑኒሽ፥ ዳላ ጌሪሲሽ፥ ዲሊኔ ማሲንቆ ዲጸሺ ጎዳ ታቦታ ኤሂዳ።

29 ጫቆ ቃላ ታቦታይ ዳዊቲ ካታማ ጌሊሺን ካዎ ዳዊቲ ኡፋዬቲዲ ዱሪሺኒኔ ካኢሺን ሳኦሌ ናያ ሚልኮላ ማስኮቴራ ሞካ ጸላዳ ካዎ ዳዊቲ ባ ዎዚናራ ካቆዳስ።

16

1 ኢስቲ ጸሳ ታቦታ ኤሂዲ ዳዊቲ ታቦታ ዎላናስ ቶሊዳ ዲንካኔዛ ጊዶን ዎሊዳ፤ ሂስቲዲ ጸጌቲዛ ያርሾኔ ኢሲፌቲላ ያርሾ ጸሳስ ያርሺዳ።

2 ዳዊቲ ጸጌቲዛ ያርሾዛኔ ኢሲፌቲላ ያርሾ ያርሺዳፔ ጉዬ ጎዳ ሱንፋን ዴሬዛ እንጂዴስ።

3 ሄሳፌ ጉዬ ኢስራኤል አሳ ኡባስ፥ ማጫሳሲኔ አቲማሳስ፥ ሁኤን ሁኤን ኢሲ ኢሲ ጉላ ኡኬል፥ ኢሲ ኢሲ ቃንጾ አሾኔ ኢሲ ኢሲ ዛቢቤ ኮሞፓ * ጊሺዴስ።

4 ጎዳ ታቦታ ሲንፋን ኦላና ማላኔ ጎዳ ኢስራኤል ጸሳ ዎሳናስ፥ ሳባናሲኔ ጋላታናስ ዳዊቲ ለዌ ቆሞታፔ ጉላታ ሱንፋዴስ።

5 ለዌታ ሃላቃይ አሳፌ፤ ኢዛፔ ጋርሳራ ዛካራሳ፤ ዛካራሳራ ዲዛይቲ ዩኢኤሌ፥ ሻሚራሞቲ፥ ዩሂኤሌ፥ ማቲቲያ፥ ኤልያቤ፥ ባናያኔ ኦቤድ-ኤዶሜኔ ዩኢኤሌ፤ ሂይቲ ማሲንቆኔ ዲል ዲጸና ማላ ሱሚዳ፤ አሳፌ ጊዲኮ ዳላ ቃላናስ ሱሚዴስ። †

6 ቄሴ ባናያይኔ ያሃዚኤሌይ ጸሳ ታቦታ ሲንፋን ኡባ ዎዴ ዛዬ ፑናና ማላ ሱሚዳ።

ጋላታ ዬላ

(ማዛ 105:1-15፤ 96:1-13፤ 106:1፥47-48)

7 ሄ ጋላስ ዳዊቲ ካሴቲዲ አሳፌሲኔ ኢዛራ ኦሊዛ ላጌታስ ጎዳ ጋላቲዛ ዬላ ኢሚዴስ።

* 16:3 ኮሞፓ ጌቲቲዛይሲ ኢሲ ኢሲ ባጋ ጋሞላ ቃላን ዴቦ ዎይኮ ሊቻኮ ጌቲቲስ።

† 16:5 ዳላ ጊዛይሲ ጸናጸሌ ጊዛይሳ ቤሴስ።

- 8 ጎዳ ጋላቲቴ፤
 ኢዛ ሱንላ ጸይገቴ፤
 ኢዚ ኦሊዳ ኡባ
 ካዎቴላታስ የቲቴ።
- 9 ኢዛ ሳቢቴ፤
 ጋላታ ዬላካ ኢዛስ ዬጸቴ፤
 ኢዚ ኦሊዳ ማላሊሲዛ ኦሶ
 ኡባ የቲቴ።
- 10 ኢዛ ጌሻ ሱንላን
 ቦንቲቴ፤
 ጎዳ ኮይዛይታ
 ዎዚናይ ኡፋዬቶ።
- 11 ጎዳኔ ኢዛ ዎልቃ ጸዋሲቴ፤
 ኡባ ዎዴ ኢዛ ኮዪቴ።
- 12 ኢዚ ኦሊዳ ማላሊሲዛ ኦሶታ፤
 ማላታታኔ ኢዛ ፒርዳ ኣኬኪቴ።
- 13 ኢንቴኖ ጸሳ ኣይሌ
 ኢስራኤሌ ዜሬላቶ!
 ኢንቴኖ ዶሬቲዳ
 ያቆቤ ናይቶ!
- 14 ኢዚ ጎዳይ ኦ ጸሳ፤
 ኢዛ ፒርዳይ ኡባ ቦላና።
- 15 ባ ጫቂዳ ቃላ ሚርናስ፤
 ባ ኣዛዚዳይሳካ ሺ ዬሌታ
 ጋካናስ ቆፔስ።
- 16 ኣብራሃሚስ ጫቂዳ ጫቃ፤
 ዪሳቃስ ኢሚዳ ሂዶታ ቃላ፤
 17 ያቆቤስ ዋጋ ጊዳና ማላ፤
 ኢስራኤሌሲካ ሚርና ጫቆ
 ቃላ ጊዳና ማላ ሚንሒዴስ።
- 18 «ካናኔይ ኔስ
 ጸንጾ ጊዳና ማላ
 ታ ኔና ላቲሳና» ጊዴስ።
- 19 ኢስቲ ቆዳን ጉሐ ጊዲ ዲዛ ዎዴ፤
 ዴራሲካ ኢማሐ ጊዲ ዲዛ ዎዴ፤
 20 ኢሲ ዴሬፔ ሃራ ዴሬ፤

- ኢሲ ካዎቴላፌ
 ሃራ ካዎቴላ ቶይላቲዳ።
 21 እኒካ ኢስታ ኡንኤላና ማላ
 ኣሊ ኢሚቤና፤
 ኢስታ ጊሻሰ ካዎታ ቤሪዴሰ፤
 22 «ታ ቲይዳይታ ቦቾፍቴ፤
 ታ ናቤታ ቆሆፒቴ» ጊዴሰ።
 23 ቢታ ኡባይ ጎዳሰ ዩጺቴ፤
 ኢዚ ኣሺዛይሳ
 ሃቾ ሃቾ ዮቴቴ።
 24 ካዎቴላታሰ
 ኢዛ ቦንቾ ኣዎጂቴ፤
 ኢዚ ኦሊዳ ማላሊሲዛ
 ሚሻታ ዴሬ
 ኡባሰ ዮቴቴ።
 25 ጎዳይ ጊታ፤
 ኢዛሰ ቤሲዛ ጋላታይካ ቶቃ፤
 ጸሳታ ኡባፌ ኣጴሰ፤
 ኢዛሰ ያያናሰ ቤሴሰ።
 26 ኣይዛቤታ ጸሳቲ
 ኡባይ ኤቃ ጸሳታ፤
 ጎዳይ ጊዲኮ
 ሳሎታ ሜጲዳ ጸሳ።
 27 ቦንቾይን ቴማይ ኢዛሰ ዴሰ፤
 ሚኖቴሊኔ ኡፋይሲ
 ኢዛ ኬላን ዴሰ።
 28 ኢንቴኖ ኣሳ ዛሬ ኡባቶ!
 ጎዳ ሳቢቴ፤
 «ቦንቾይን ዎልቃይ
 ጎዳሳ» ጊ ዮቴቴ።
 29 ጎዳ ሱንላሰ ቤሲዛ
 ቦንቾ ኢሚቴ፤
 ያርሾ ኤኪዲ ኢዛ ሲንላ ሺቂቴ፤
 ኢዛ ጌሻቴላ ቦንቾ
 ጊሻሰ ጎዳሰ ጎይኒቴ።
 30 ቢታን ዲዛ ኣሰ ኡባይ

- ኢዛ ሲንላን ኮኮሪቲ፤
 ሳኦይ ሚኒ ኤቂዳሰ፤
 ሙሌካ ቃጾና።
 31 ሳሎቲ ኡፋዬቲቶ!
 ሳኦይካ ሃሹ ጎ!
 ካዎቲላታ ጊዶን ኢሰታስ፤
 «ጎዳይ ካዎቲዳሰ!» ጌቶ።
 32 ኣባይኔ ኢዛ ጊዶን ዲዛ
 ኡባይ ጉሜቶ፤
 ዴምባቲኔ ኢሰታ ቦላ ዲዛ
 ኡባቲ ኡፋዬቲቶ።
 33 ኢዚ ቢታ ቦላ ፒርዳናሰ ያና።
 ሄ ዎዴ ዎራ ሚላቲ
 ጎዳ ጸሳ
 ሲንላን ኡፋይሳን ዬጸና።
 34 ጎዳይ ኪያ፤
 ኢዛ ማርቲላይካ ሜርናሳ፤
 ሄሳ ጊሻሰ ጎዳ ጋላቲቴ።
 35 «ኣቤት ኑና ኣሺዛ ጎዳዉ!
 ኑና ኣሻ፤
 ኔ ጌሻ ሱንላ
 ኑ ጋላታና ማላ፤
 ኑ ኔና ጋላታን
 ቦንቻና ማላ
 ካዎቲላታ ጊዶፌ ኑና
 ሺሻዳ ኣሻ» ጊቴ።
 36 ጎዳ ኢሰራኤሌ ጸሳይ
 ሜርናፔ ሜርና ጋካናሰ ጋላቲቶ!
 ሄሳፌ ጉዬ ዳሬ ኡባይ፤ «ኣሚን» ጊዲ ጎዳ ጋላቲዳሰ።

ዩሩሳላሜኒኔ ጌባኦን ሃኒዳ ጎይኖ ማራ

37 ጎዳ ታቦታ ሲንላን ሃች ሃች ጎይኖሰ ኮሺዛዝ ኡባ ዎዴ
 ኢሰቲ ኦላና ማላ ዳዊቲ ኣሳፊኔ ኢዛ ዳቦታ ዎሊዳሰ።

38 ቃሴካ ኦቤድ-ኤዶሜኔ ኢዛ ዳቦታ ኡሱፑን ታማኔ ኦሰፑናታ
 ኢሰታራ ኦላና ማላ ዎሊዳሰ፤ ኤዶታኔ ና ኦቤድ-ኤዶሜኔ ሆሳ
 ዲርሳ ፔንጌ ናጋና ማላ ዎሊዳሰ።

39 ቄሴ ሳዶቄኔ ኢዛራ ኦሊዛ ቄሴቲ ጌባኦንን ጾቃሶሆን ዲዛ ጎዳ ዱንካኔዛ ሲንላን ኦላና ማላ ሄን ዋሊዴስ።

40 ጋሶይካ ጎዳይ ኢስራኤሌስ ኢሚዳ ዋጋ ማላ ኢስቲ ኡባ ዋዴ ጸጌቲዛ ያርሾይ ያርሼቲዛሶን ማላዶኔ ኦማርስ ጸጌቲዛ ያርሾ ያርሻናሳ።

41 ኢዛ ማርታይ ሜርናስ ጌዲዳ ጌሻስ ጎዳ ጋላታና ማላ ሄማኔ፣ ኤዶታኔ፣ ዶሬቲዳ ሃራታ ዳዊቲ ኢስታራ ኢሲፌ ኤሲዴስ።

42 ሄማኔሲኔ ኤዶታኔስ ጸሩምባ ፑናናስ፣ ዳላ ጌሪሳናሲኔ ዬላ ዬጸሼ ጎኤቲዛ ሃራ ማሳራታ ቦላ አዋቲሊ ኢስታስ ኢሜቲዴስ፤ ኤዶታኔ ናይቲ ዲርሳ ፔንጌ ናጋና ማላ አላፌቲሊ ኢሜቲዴስ።

43 ሄሳፌ ጉዬ ኡባ አሳይ ባሶ ባሶ ቢዴስ፤ ዳዊቲካ ባሶ አሳ አንጃናስ ሶ ሲሚዴስ።

17

ናታኔ ባጋራ ጸሲ ዳዊቲስ ዮቲዳ ቃላ
(2ሳሜ 7:1-17)

1 ዳዊቲ ባ ካዋቲላ ኬላን ዴኢሼ፣ ናቤ ናታኔስ፣ «ታኒ ዚጋፔ ኬጾቲዳ ኬላን ዴኢይስ፤ ጌዶ ኣቲን ጸሳ ጫቆ ቃላ ታቦታይ ጌዲኮ ዱንካኔ ጌዶን ዴስ» ጌዴስ።

2 ናታኔይ ቃሴ ዳዊቲስ፣ «ኦላናስ ኔ ዋዚናን ኔ ቆፒዲይሳ ኡባ ኦላ፤ ጸሲ ኔናራ ዴስ» ጌዴስ።

3 ጌዶ ኣቲን ሄ ጋላሳ ኦማርስ ጸሳ ቃላይ ናታኔኮ ዩዲ፣

4 «ባ፤ ባዳ ታ አይሌ ዳዊቲስ ጎዳይ ኔስ ጌዛይሲ ታ ኢዛን ዴኣና ኬላ ኬጸናይ ኔና ጌዳካ።

5 ታኒ ኢስራኤሌታ ጌብጾፔ ኬሲዳ ጋላሳፌ ዶማዳ ሃቕ ጋካናስ፣ ዱንካናፔ ዱንካኔን፣ ቃሴ ኢሲ ሶሆፔ ሃራ ሶሆ ዩያዳ ዴኢይስ ኣቲን ኬላን ዴኢቤኬ።

6 ታኒ ኢስራኤሌ አሳ ኡባራ ዩዩዳ ሶሆ ኡባን ታ ዴራ ሄማናስ ታኒ ኣዛዚዳ ኢስራኤሌ ዳናታፔ ኦናስካ፣ «ታስ ዚጋ ሚላፌ ኬላ ኣይስ ኬጸቤኬቲ?» ጋዳ ኦይቹዳ ዋዴይ ዲዜ?

7 «ሄሳ ጌሻስ ሃኢካ ኔኒ ታ አይሌ ዳዊቲስ፣ ኡባፌ ዋልቃማ ጸሲ ኔና፣ «ታ ዴራ ኢስራኤሌ ኣይሳና ማላ ኔኒ ዶርሳ ሄሚዛሶሆፔ ታ ኔና ዴንሳ ኤካዲስ።

8 ኔኒ ቢዳ ሶሆ ኡባን ታኒ ኔናራ ኢሲፌ ጌዳዲስ፤ ኔ ሞርኬታ ኡባ ኔ ሲንላፌ ዲጋዲስ፤ ሃኢካ ታኒ ሃ ሳኣን ኤሬቲዳ ጌታ አሳታ ሱንላ ማላ ኔ ሱንላ ጌታሳና።

9 ታሪ ታ አሳ ኢስራኤል ለደረሰህ ኢማናኝ፤ ኢስታሰ ዲሳሶሆ አሟዳ፤ ጌዬ ኢስቲ ቃጸንታ ማላ ታ ኦላና፤ ኢታ አሳቲ ካሴ ኢስታ ኡንኤሊዲሳላ ሃይሳፊ ጌዬ ኢስታ ኡንኤሊቲና።

10 ሃይሳፊ ካሴ ታ ዴራ ኢስራኤል ካሌሊዛይታ ታ ሱንሊዳ ዋዴ ካሴ ኢታቲ ኡንኤሊዲሳላ ሃይሳፊ ጌዬ ኡንኤሊቲና፤ እንቲ ሞርኬታ ኡባ ታ ካወሻና፤ ታሪ ጸሳይ ኔስ ኬል ኬጸናይሳ ዮታይሰ።

11 ኔ ጨማዳ ካሴ ሃይቂዳ ኔ አዋታን ጋይቲዛ ዋዴ ታሪ ኔ ናይታፔ ኢሳ ዴንላዳ ኔ ሶሆን ካዋላና፤ ኢዛ ካዋቲላ ታ ሚንላና።

12 ታሰ ኬል ኬጸናይ ኢዛ፤ ታሪ ኢዛ ካዋቲላ አራታ ሜርናስ ሚንላ ኤሳና።

13 ታሪ ኢዛስ አዋ ጊዳና፤ ኢዚካ ታሰ ና ጊዳና፤ ኔፔ ካሴ ካዋቲዳ ሳኦሌፔ ታሪ ታ ማርቲላ ዴንሊዳ ማላ ኢዛፔ ሙሊካ ዴንሊኬ።

14 ታሪ ኢዛ ታ አሳ ቦላኔ ታ ካዋቲላ ቦላ ሜርናስ ሱንላና፤ ኢዛ ካዋቲላ አራታይካ ሜርናስ ሚኒ ኤቃና፤ ጋዳ ዮታ» ጊዴሰ።

15 ናታኔይ ጸሳይ ኢዛስ አጁታን ቆንጨሲዳ ቃላ ኡባ ዳዊቲስ ዮቲዴሰ።

ዳዊቲ ዋሳ

(2ሳሜ 7:18-29)

16 ሄሳፊ ጌዬ ካዋ ዳዊቲ ዴንካኔን ጌሊዲ ጎዳ ሲንላን ኡቲዴሰ፤ ሂሰቲዲ፡ «አቤት ጎዳዉ፤ ጸሳዉ! ኔኒ ሃይሳ ኡባ ታሰ ኦላናስ ታሪ ኦኔ? ታሶ አሳይካ አዜ?»

17 አቤት ጸሳዉ! ሃይሲ ኔ አይፊ ሲንላን ጉላ ሚሳቲን ኔ አይሌ ዛሬቲ ሲንላፊ ያና ላይላታን ሃናናይሳ ዮታዳሳ፤ ኔኒ ታና ጌታ አሳታፔ ጶቁ ሂስታ ጸላዳሳ።

18 ኔኒ ታና ኔ አይሌዛ ቦንቹዳ ጊሻስ ታሪ ዳዊቲ ሃይሳፊ ቦላራ አይ ጋና ዳንዳያዚና? ኔኒ ታና ኔ አይሌዛ ኤራሳ።

19 አቤት ጎዳዉ! ኔ አይሌዛ ጊሻስ ኔ ዋዚና ቆፋ ማላ ሃ ጌታ ሚሻታ ኡባ ኦላዳ ሃ ጌታቲላ ኡባ ታና ኤሪሳዳሳ።

20 «አቤት ጎዳዉ! ኔ ማላይ ሃራይ ባዋ፤ ኦኒ ኦ ሃይላን ሲዱዳ ማላ ኔፔ አቲን ሃራ ጸሲ ዴና።

21 ኔኒ ጸሲ ጌብጾ ቢታፊ ኬሲዳ ኔ ዴራ ሲንላፊ ካዋቲላታ ጎዳዳ ጌታኔ ያሺሲዛ ሚሽ ኔ ሱንላስ ኦላና ማላ፤ ዴራካ ኔስ ዋዛና ማላ ኔ ኢስታሰ ኡሊዲሳላ ኔ ዴሬ ኢስራኤል ማላ ዴሬይ ቢታ ቦላ ሃራይ ዲዜ?»

22 ኔኒ ኔ ዴራ ኢሰራኤል ሜርናስ ኔስ ሂስታዳሳ፤ አቤት ጎዳዉ ኔኒካ ኢስታ ጸሳ ጊዳዳሳ።

23 «አቤት ጎዳዉ! ኔኒ ኔ አይሌዛሲኔ ኢዛ ዜሬፋታስ ኢሚዳ ሂደታ ሜርናስ ሚንፋ፤ ኔኒ ኢሚዳ ሂደታ ቃላካ ፖላ።

24 ሄሳ ኔ ኦፋናይ ኔ ሱንሊ ሚኒ ዳና ማላኔ ሜርናስ ጊታ ጊዳና ማላሳ፤ ሄሳፌ ጉዬ አሳይ፥ ሓባፌ ዋልቃማ ጸሳይ ቱሙካ ኢሰራኤል ጸሳ፤ ጋና ጌስ፤ ኔ አይሌ ዳዊቱ ዛሬቲ ኔ ሲንፋን ሚኒ ኤቃና።

25 «አቤት ታ ጸሳዉ፥ ሓኒ ታስ ኔ አይሌዛስ ኬል ኬጸና ጋ ዮታዳሳ፤ ሄሳ ጊሻስ ታኒ ኔ አይሌይ ኔና ዋሳናስ ጸላዲስ።

26 አቤት ጎዳዉ! ኔኒ ቱሙ ጸሳ፤ ሃ ሎኦ ሂደታ ቃላ ኔ አይሌዛስ ኢማዳሳ።

27 ኔ ሲንፋን ሜርናስ ዳና ማላ ኔ አይሌዛ ኬል አንጃናስ ኔ ኮያዳሳ፤ አቤት ጎዳዉ! ኔኒ አንጃዳይ ሜርናስ አንጃቲዳዴ ጊዳና፤ ጊ ዋሴስ» ጊዴስ።

18

ዳዊቲ ጸኒዳ ጸኖታ (2ሳሜ 8:1-18)

1 ሄሳፌ ጉዬ ዳዊቲ ፊሊስጾሜታ ጸኒ ሃሪዴስ፤ ሂስቲዲ ጌቱ ካታማኔ ኢዛ ዩሾን ዲዛ ሞፋታ ፊሊስጾሜ አሳታ ኩሼፔ ዋላ ኤኪዴስ።

2 ሂስቲን ሞኣቤ ዴሬ አሳይ ኢዛስ ሃሪቲዲ ጊራ ኤሂዴስ።

3 ሄሳፌ ጉዬ ዳዊቲ ኤፊራዲሴ ሻፋ ሄራን ዲዛ ዴሬታ ኦይካና ቢዳ ዋዴ ጸባ ካዋ ሃዳዲኤዜሬ ኦሊ ጸኒዲ ሃማቱ ጋካናስ ዲዛ ቢታ ኦይኪዴስ።

4 ዳዊቲ ሃዳዲኤዜሬፔ 1,000 ፓራ-ጋሬታ፥ 7,000 ቶጋ አሳታኔ 20,000 ቶሆን ቢ ኦሊቲዛ ዋታዳራታ ዲኢዴስ፤ ዳዊቲ 100 ጋሬታስ ጊዲዛ ፓራታ አሺዲ ሃራ ፓራታ ኡባስ ጋዴ ጸጾ ጊልዳይዴስ።

5 ዳማስቆ ካታማን ዲዛ አራሜ አሳቲ ጸባ ዴሬ ካዋ ሃዳዲኤዜሬ ማዳናስ ዩዳ ዋዴ ዳዊቲ ኢስታፌ 22,000 አስ ዋዲዴስ።

6 ሄሳፌ ጉዬ አራሜ ቢታን ዳማስቆ ካታማን ኦላንቻቲ ዲንካኒ ኡታናሶ ጊግሲዴስ፤ ሂስቲን አራሜ ዴሬ አሳቲ ዳዊቲስ ሃሪቲዲ ጊራዳ፤ ዳዊቲ ቢዳሶ ኡባን ጎዳይ ኢዛስ ጸኖ ኢሚዴስ።

7 ካዋ ዳዊቲ ሃዳዲኤዜሬ ኦላንቻታ ሃላቃቲ ኦይኪዳ ዋርቃ ጎንዳሌታ ዋሊ ኤኪዲ ዬሩሳላሜ ኤፊደስ።

8 ቃሰካ ዳዊቲ ሃዳዲኤዜሬይ ሃሪዛ ጸባሃነፔኔ ኩና ካታማፔ ኬሂ ዳሮ ጸርቂማላ ኤኪደስ፤ ሶሎሞንይ ሄ ጸርቂማላታ ጌታ ጋባቱ፥ ቱሳታኔ ዱማ ዱማ ሚሻታ ሜዲሲደስ።

9 ዳዊቲ ጸባ ዴሬ ካዋ ሃዳዲኤዜሬ ኦላንቻታ ኡባ ጸኒዳይሳ ሃማቴ ካዋ ቶኡዬ ሲዬደስ።

10 ሂስቲዲ ባናራ ኦሌቲሼ ጋምኢዳ ሃዳዲኤዜሬ ዳዊቲ ኦሊ ጸኒዳ ጌሻስ ኢዛ ሃሹ ጋናሲኔ ሳሮካናስ ቶኡዬ ባ ናዛ ሃዶራሚ ካዋ ዳዊቲ ከቲደስ፤ ሃዶራሚይ ዋርቃፊ፥ ቢራፔኔ ጸርቂማላፔ ኦሌቲዳ ሚሻታ ኢዛስ ኤኪ ዬደስ።

11 ካዋ ዳዊቲ ኤዶሜፔ፥ ሞአቤፔ፥ አሞኔ አሳታፔ፥ ፊሊስጶሜታፔኔ አማላቄ አሳታፔ ዲኢ ኤኪዳ ቢራኔ ዋርቃ ሃ ሚሻታራ ኢሲፊ ጋሊ ጎዳስ ዱማሲደስ።

12 ጹሪያ ና አቢሳዬይ ኤዶሜ አሳፔ 18,000 አስ ማጸኔ ሾባን ዋዲደስ።

13 ሄሳፌ ጉዬ ዳዊቲ ኤዶሜን ኦላንቻቲ ዱንካኒ ኡታናሶ ገባሲደስ፤ ሂስቲን ሄ ቢታ አሳቲ ኡባይ ዳዊቲስ ሃሬቲዲ ጌሪ አቂዳ፤ ዳዊቲ ቢዳሶ ኡባን ጎዳይ ኢዛስ ጸዮ ኢሚደስ።

ዳዊቲ ሹሚዳ አሳታ

14 ዳዊቲ ኢስራኤል ዴራ ኡባ ቦላ ካዋቲደስ፤ ዴራ ኡባ ጸሎቴላኒኔ ሱሬ ፒርዳን አይሲደስ።

15 ጹሪያ ና ኢዮኣቤይ ኦላ ጋዳዋ፤ አሂሉዴ ና ኢዮሳፊዶይ ማዘጋባ ኬላ አላፊ።

16 አሂጹቤ ና ሳዶቄይኔ አቢያታሬ ና አቢሜሌኬይ ቄሴ፤ ሱሳሃይ ዋና ጳፌ፤

17 ዮዳሄ ና ባናያይ ኬሊቴታሲኔ ፔሊቴታስ ሃላቃ፤ ካዋ ዳዊቲ አቱማ ናይቲ ኢዛ ካዋቴላን ቶቃ ሹሜታ።

19

ሶሪያታ ጸኔቴስ

(2ሳሚ 10:1-19)

1 ሄሳፌ ጉዬ አሞኔታ ካዋ ናኦሴይ ሃይቂን ኢዛ ናዚ ኢዛሶሆን ካዋቲደስ።

2 ዳዊት፡ «ኢዛ ነዋ ናኑሴይ ታሰ ሎኦ ኦሊዳ ማላ ታኒ ኢዛ ና ሃኖኔሰ ሎኦ ኦላና» ጊ ቆፒደሰ፤ ሄሳ ጊሻሰ ኢዛ ነዋ ሃይቆዛ ጊሻሰ ኢዛ ሚንፊላናሰ ዳዊት ኣሰ ከቲደሰ።

ዳዊት ከቲዳይቲ ሃኖኔ ሚንፊላናሰ ኣሞኔ ቢታ ጋኪዳ ዎዴ፡

3 ኣሞኔ ዴሬ ሹሜቲ ሃኖኔ፡ «ዳዊት ሃ ኣሳታ ከቲዳይ ኔ ኣዋ ቦንቹዲ ኔና ሚንፊላናሰ ሚሳቲዜ? ኢዚ ሃ ኣሳታ ከቲዳይ ቢታዮ ጸሞሲ ጴላናሲኔ ኦሊ ኦይካናሳ» ጊዳ።

4 ሂሰቲን ሃኖኔይ ዳዊት ከቲዳ ኣሳታ ኦይኪዲ ኢሰታ ቡቻ ሜዲደሰ፤ ኢሰታ ማይኦካ ኢሰታ ካሎይ ቤታናሺ ጋካናሰ ዳኪዲ ኢሰታ ዴሬ ዛሪ ዬዲደሰ።

5 ኢሰቲ ኬሂ ዬላቲዳ ጊሻሰ ዳዊት ሄሳ ሲዬዲ ኢሰታራ ጋይታና ማላ ሃራ ኣሰ ኢሰታኮ ከቲዲ፡ «ኢንቲ ቡቹ ዲጫና ጋካናሰ ኢያርኮ ካታማን ዴኢሺቲ፤ ሄሳፌ ጉዬ ሃ ዩቲ» ጊደሰ።

6 ኣሞኔቲ ዳዊት ማታን ባ ኢጴቲዳይሳ ኤሪዳ ዎዴ ሃኖኔይኔ ኣሞኔቲ ሜሰጴጸሚያፔ፡ ኣራሜ ዴሬ ማኢካፌኔ ጸባፌ ፓራ-ጋሬታኔ ቶጋንቻታ ቃጸራናሰ 34,000 ከሎ ጊራሜ ጊዲዛ ሳቂሌ ቢራ ዬዲዲ።

7 ሂሰቲዲ 32,000 ፓራ-ጋሬታ፡ ቶጋ ኣሳታ፡ ማኢካ ካዎኔ ኢዛ ኦላንቻታ ቃጸሪዳ፤ ኢሰቲካ ዬዲ ሜዴባን ዲንካኒ ኡቲዳ፤ ቃሴ ኣሞኔቲ ባንታ ካታማታፔ ሺቄቲዲ ኦላሰ ኬዚዳ።

8 ዳዊት ሄሳ ሲዬዲ ኢዮኣቤኔ ኦላንቻታ ኡባ ዬዲደሰ።

9 ኣሞኔቲ ካታማ ፔንጌን ኬኢዲ ኦላሰ ያዲዳ፤ ኢሰታ ማዳናሰ ዬዳ ካዎቲካ ባሰ ሶሆ ኦይኪዲ ዴሞባን ዲንካኒዳ።

10 ኢዮኣቤይ ኦላይ ሲንላራኔ ጉዬራ ዶዲ ኡቲዳይሳ ቤኢዲ ኢሰራኤሌ ኣሳ ኡባፌ ኤሬቲዳ ኦላ ቃራታ ዶሪ ኤኪዲ ኣራሜ ዴሬ ኦላንቻታ ሲንላን ሳልፊሲደሰ።

11 ኦቲዳ ኣሳታ ኢዛ ኢሻ ኣቢሳዬይ ካሌላና ማላ ኣዛዚዲ ኣሞኔታ ሲንላን ሳልፊሲደሰ።

12 ኢዮኣቤይ ባ ኢሻ ኣቢሳዬሰ፡ «ኣራሜ ኣሳቲ ታ ቦላ ሚኒኮ ኔኒ ያዳ ታና ማዳ፤ ኣሞኔ ኣሳቲ ኔ ቦላ ሚኒዛ ጊዲኮ ታኒ ያዳ ኔና ማዳና።

13 ሃኢ ኔኒ ሚና! ኦ ዴራ ጊሻሲኔ ኦ ጸሳ ካታማታ ጊሻሰ ኣኔ ሚኒ ኦሌቶሰ፤ ጎዳይ ባና ሎኦይሳ ኦሉ» ጊደሰ።

14 ሄሳፌ ጉዬ ኢዮኣቤይኔ ኢዛራ ዲዛ ኦላንቻቲ ኣራሜ ዎታዳራታራ ኦሌታናሰ ቢን ኣራሜ ዎታዳራቲ ኢሰታ ሲንላፌ ባቃቲዳ።

15 አራም ዋታዳራቲ ባቃቲዳይሳ አሞኔ ዋታዳራቲ ቤኢዳ ዋዴ ኢስቲካ ኢዛ እሻ ኣቢሳዬ ሲንፋፌ ጉዬ ባቃቲዳ ካታማ ጌሊዳ፤ ሄሳፌ ጉዬ ኢዮኣቤይ ዩሩሳላሚ ሲሚዴስ።

16 አራም ኣሳቲ ኢስራኤል ኣሳታን ጸኔቶይሳ ኤሪዳ ዋዴ ቃስታኔ ከቲዲ ኤፊራዲሴ ሻፋፔ ሄ ፒንፋን ዲዛ አራም ኣሳታ ኤሂሲዳ፤ ጸባ ካዋ ሃዳዲኤዜሬስ ኦላ ጋዳዋ ጊዲዳ ሾባኬይ ኢስታ ካሌሌስ።

17 ዳዊቲ ሄሳ ሲዩዳ ዋዴ ኢስራኤል ኦላንቻታ ኡባ ሺሺዲ ዮርዳኖስ ሻፋ ፒኒዲ አራም ኣሳታራ ኦሌታናስ ኢስታ ሲንፋን ሳልፊዴስ፤ ሂስቲን ኢስቲ ኢዛራ ኦሌቲዳ።

18 ጊዶ ኣቲን አራም ኣሳቲ ኢስራኤሌታ ሲንፋፌ ባቃቲዳ፤ ዳዊቲ 7,000 ፓራ-ጋሬታኔ 40,000 ቶሆን ቢ ኦሌቲዛ ዋታዳራታ ዋዲዴስ፤ ኢስታ ኦላ ጋዳዋ ሾባኬካ ዋዲዴስ።

19 ሃዳዲኤዜሬ ኣሳይ ኢስራኤሌታን ጸኔቲዳይሳ ኤሪዲ ዳዊቲራ ሲጌቲዲ ኢዛስ ሃሬቲዴስ፤ ሄሳፌ ሲሚን አራም ኣሳይ አሞኔ ኣሳ ማዳናስ ዶሲቤና።

20

ዳዊቲ ኤራባ ካታማ ኦሊ ኦይል

(2ሳሚ 12:26-31)

1 ኦፊንፋን ካዋቲ ኦላስ ኬዚዛ ዋዴ ኢዮኣቤይ ኦላንቻታ ካሌል ቢዲ አሞኔ ዴሬ ዳይሲዴስ፤ ኤራቤ ካታማካ ዶዲ ኡቲዴስ፤ ጊዶ ኣቲን ዳዊቲ ዩሩሳላሚን ታኪዴስ፤ ኢዮኣቤይ ኤራባ ካታማ ኦሊ ላሊዴስ።

2 ሄሳፌ ጉዬ ዳዊቲ ዩዲ ኢስታ ካዋዛ ሁኤፔ ዋርቃ ካላቻ ኤኪዴስ፤ ካላቻዚ 34 ኪሎ ጊራሚ ጊዲዴስ፤ ኢዛ ጊዶን ኢንቁ ጌቲቲዛ ኣልኦ ሹቺ ዴስ፤ ሄ ካላቻ ኤኪዲ ዳዊቲ ሁኤን ጎጺዳ፤ ቃሴ ዳዊቲ ሄ ካታማፔ ኬሂ ዳር ሚሽ ዲኢ ኤኪዴስ።

3 ሄን ዴኢዛ ዴራ ኬሲዲ ማጋዜ፥ ጸይሌኔ ካልታ ኦይል ኦሲሲዴስ፤ አሞኔን ዲዛ ሃራ ካታማታን ዲዛ ኣሳታካ ዳዊቲ ሄሳል ኦሲሲዴስ፤ ሄሳፌ ጉዬ ዳዊቲኔ ኢዛ ኦላንቻቲ ኡባይ ዩሩሳላሚ ሲሚዳ።

ፊሊስጶሚ ኣሳታራ ኦሌቲዳ ኦላ

(2ሳሚ 21:15-22)

4 ሄሳፌ ሲሚን ፊሊስጶሜ አሳታራ ጌዜሬን ኦላይ ዳንዲዴስ፤ ሄ ዋዴ ሁሼ ዴሬ እስ ሲቢካዬይ ኤራፋይሜ ዜሬ ጊዲዳ ሲፋዬ ዋዲዴስ፤ ሂስቲን ፊሊስጶሜቲ ጸኔቲዳ።

5 ሄሳፌ ጉዬ ፊሊስጶሜታራ ሃራ ኦላይ ዳንዲዴስ፤ ሄ ዋዴ ኢዚ ኦይኪዛ ቶራ ቶማይ ሻማኔ ዋንዲራሼ ኬና ጊዲዳ ጌቲ ካታማፔ ዪዳ ጎልያዴ ኢሻ ላሂሜ ያኢሬ ና ኤልያኔይ ዋዲዴስ።

6 ቃሴካ ሃራ ኦላይ ጌቲ ካታማን ዳንዲዴስ፤ ሄን ኢዛስ ኩሼኒኔ ቶሆን ኡሱፑን ኡሱፑን ቢራዴቲ ኢሲ ቦላ 24 ቢራዴቲ ዲዛ ኤራፋዬ ዜሬላፌ ጊዲዳ ጉባኔ ጌሳ አዲሳ እሲ ዴስ።

7 ሄ አዴዚ ኢስራኤሌታ ቦላ ኤቄቲዳ ዋዴ ዳዊቲ ኢሻ ሺምአ ና ዮናታኔይ ኢዛ ዋዲዴስ።

8 ሃይታንቲ ጌቲ ካታማን ዲዛ ኤራፋዬ ዛሬታ፤ ኢስቲ ኡባይ ዳዊቲ ኩሼኒኔ ኢዛ አሳ ኩሼን ሃይቂዳ።

21

ኢስራኤሌ ዴራ ዳዊቲ ቆዲሴስ
(2ኛሜ 24:1-25)

1 ጸላኤይ ኢስራኤሌ አሳ ቦላ ሜቶ ኤሃናስ ኮዪዲ ዳዊቲ ኢስራኤሌ አሳ ቆዳና ማላ ዴንፌሊዴስ።

2 ዳዊቲ ኢዮኣቤኔ ኦላንቻታ ሃላቃታ፤ «ዳኔፔ ቢዲ ቤርሳቤሄ ጋካናስ ዲዛ ኢስራኤሌ አሳ ቆዲቲ፤ ሂስቲዲ አሳ ቆዳይ አፑናኮ ታና ኤሪሱቴ» ጊዴስ።

3 ኢዮኣቤይ ጊዲኮ ኢዛስ፤ «ጎዳይ ሃኢ ዲዛ ኢስራኤሌ አሳ ቦላ ጾቱ ኩሼ ጉጀ! ታ ጎዳ ካዎ! ኢስቲ ኡባይ ታ ጎዳ አይሌታ ዴቲኔ? ታ ጎዳይ ሃይሳ ማላ ኦላናስ አይስ ኮዪዴ? ኢስራኤሌ ካዎቲላ አይስ ሞራንቻ ኬሲዜ?» ጊዴስ።

4 ጊዶ አቲን ካዎዛ ቃላይ ኢዮኣቤ ጸኒዴስ፤ ሂስቲን ኢዮኣቤይ ኬዚ ኢስራኤሌ ቢታ ኡባ ዩዪ አዲ ዩሩሳላሚ ሲሚዴስ።

5 ኢዮኣቤይ ቆዲዳ አሳ ቆዳ ዳዊቲስ ኢሚዴስ፤ ኢስራኤሌፔ 1,100,000 ዩሁዳፔ 47,000 ኦላናስ ዳንዳይዛይታ ዴሚዴስ።

6 ኢዮኣቤይ ካዎዛ አዛዘን ሃራሴቲዳ ጊሻስ ለዌታ ቆሞታኔ ቢኒያሚ ቆሞታ ቆዲቤና።

7 ሄ አዛዘዚ ጸሳ ማታን ኢታ ጊዲዳ ጊሻስ ጸሲ ኢስራኤሌ አሳ ቃጸይዴስ።

8 ሄሳፌ ጉዬ ዳዊቲ ጸላሰ፡ «ታኒ ሃ ኦሶዛን ነና ኬሃ ቆሃዲሰ፤ ታኒ ባላ ኦሊዳ ገሻሰ ታና ኔ ኣይሌዛ ቆሆ ኣቶ ጋና ማላ ታ ነና ዋሳይሰ» ገዴሰ።

9 ጎዳይ ዳዊቲ ናቤ ጋዴሰ፡

10 «ባዳ ዳዊቲ፡ ጎዳይ ነና ታኒ ኔ ዶራና ማላ ኔ ሲንላን ሄሹ ሚሻታ ዋላዲሰ፤ ታኒካ ኔ ዶሪዳይሳ ኦላና» ገዴሰ። ጋዳ ዮታ።

11 ሂሰቲን ጋዴይ ዳዊቲኮ ቢዲ፡ «ጎዳይ ኔ ሲንላን ዋላይሳፌ ኢሳ ዶራ፤

12 ሄሹ ላይላ ኮሻ፡ ዋይኮ ሄሹ ኣገና ኩሜል ኔ ሞርኬታን ጎዴቱል፡ ዋይኮ ሄሹ ጋላሰ ኢታ ሃርጌ ኤሂዛ ጸላ ማሻይ ቢታ ቦላ ዪን ኢሰራኤል ኡባ ቦላ ሃይቆ ኤሂዛ ጸላ ኪታንቻ ዩሰ፡ ሄሳ ገሻሰ ታና ኪቲዳ ጸላሰ ታ ኣይ ዛራ ዮታናኮ ሄይታንታፌ ኔ ዶሪይሳ ታሰ ዮታ» ገዴሰ።

13 ዳዊቲ ጋዴሰ፡ «ታ ዶራናሰ ኬሃ ሜቶታዲሰ፤ ገዲኮካ ጎዳ ጸላ ማርታይ ኬሂ ጌታ ገዲዳ ገሻሰ ኣሳ ኩሼን ኩንዳናፔ ጸላ ኩሼን ኩንዴል ታሰ ሎኦ» ገዴሰ።

14 ሄሳ ገሻሰ ጎዳይ ኢታ ሃርጌ ዬዲን ኢሰራኤልፔ 70,000 ኣሲ ሃይቁዴሰ።

15 ሄሳፌ ጉዬ ጎዳይ ዬሩሳላሜ ቆይሳናሰ ኪታንቻ ኪቲዴሰ፤ ጊዶ ኣቲን ኪታንቻዚ ዬሩሳላሜ ቆይሳናሰ ሸቂ ኡቲዳሺን ጎዳይ ቤኢዲ ሚሼቲዴሰ፤ ቆይሳና ዪዳ ኪታንቻ፡ «ኣጋ! ኢሰታ ቦላ ጋኪዳ ባሻይ ጊዳና» ገዴሰ። ሄ ዋዴ ጎዳ ጸላ ኪታንቻይ ያቡሴ ዴሬ ኣሰ ኦርና ባሌ ማታን ኤቁዴሰ።

16 ኪታንቻዚ ባ ጊላ ማሻ ኩሼን ኦይኪዲ ዬሩሳላሜ ቆይሳናሰ ሳሎፔኔ ሳኣፔ ጊዶን ኤቁዳይሳ ዳዊቲ ጶቁ ጊ ቤኢዴሰ፤ ሄሳፌ ጉዬ ዳዊቲኔ ጨማቲ ማቃ ማይኢዲ ቢታ ቦላ ጉፋኒዳ።

17 ዳዊቲ ጸላሰ፡ «ኣሳይ ቆዴታና ማላ ኦሊዳይ ታና ገዲኪና? ናጋራ ኦሊዳይኔ ቆሂዳይ ታና፤ ሂሰቲን ሃይቲ ዶርሳቲ ኣይ ኦሊዶ? ኣቤት ታ ጎዳ ጸላዉ! ኔ ኩሼይ ታ ቦላኔ ታ ኬላ ኣሳ ቦላ ጊዶ ኣቲን ሃ ቦሻዛ ኔ ዴራ ቦላ ዬዶፋ» ገዴሰ።

18 ሄሳፌ ጉዬ ጎዳ ጸላ ኪታንቻይ ጋዴሰ፡ «ዳዊቲ ፑዴ ያቡሴ ዴሬ ኣሰ ኦርና ባሌ ቢዲ ጎዳ ጸላሰ ያርሾ ያርሺዛሶ ኦላና ማላ ዮታ» ገ ኣዛዚዴሰ።

19 ዳዊቲ ጋዴይ ጎዳ ጸላ ሱንላን ዮቶይሳላ ኦላናሰ ቢዴሰ።

20 ሄ ዋዴ ኦርናይኔ ኢዛ ናይቲ ባሌን ገሰቲ ቡኪሼ ጉዬ ሲሚ ጴሊዲ ኪታንቻ ቤኢዳ፤ ሂሰቲዲ ኢዛራ ዲዛ ኦይዱ ኣቲማ ናይቲ ቆቲቲዳ።

21 ዳዊት ኦርናኮ ዪን ኦርናይ ኢዛ ቤኢዲ ባሌዛፔ ጋጸ ኬኢዲ ዳዊቱስ ዘጊደሰ።

22 ሄሳፌ ጉዬ ዳዊት ኦርናስ፡ «ዴራ ቦላ ዪዳ ቦሻይ ኪቻና ማላ ታኒ ጎዳ ጸሳስ ያርሾ ያርሺዛሶ ኦፋናስ ኔ ባሌዛ ታስ ባይዘርኪ! ታኒ ኔስ ኩሜላ ዋጋ ቃንጻና» ጊደሰ።

23 ሂስቲን ኦርናይ ዳዊቱስ፡ «ኔስ ኤካ፤ ታ ጎዳይ ካዎይ ባና ኡፋይሲዛይሳ ኦፋ፤ ሄኮ ጽጌቲዛ ያርሾስ ቦራታ፡ ኤሶስ ካል ቡኪዛ ሎዳታ፡ ካላ ያርሾ ጊዳና ማላ ጊስቲ ኢማና፤ ሃይታ ኡባታካ ታ ኔስ ኢማና» ጊደሰ።

24 ጊዳ ኣቲን ካዎ ዳዊት ኦርናስ፡ «ሂሲ ሃኔና! ታኒ ኩሜላ ዋጋ ቃንጻዳ ሻማና፤ ታኒ ኔይሳ ጮ ሜላ ኤካዳ ጎዳ ጸሳስ ያርሾ ሺሺኬ፤ ቃሴ ታ ሻሞንታ ሚሽ ጽጌቲዛ ያርሾ ኦላ ሺሺኬ» ጊደሰ።

25 ሄሳ ጊሻስ ዳዊት ሄ ባሌዛስ 600 ዋርቃፌ ኦሴቲዳ ቢራ ኢሚደሰ።

26 ሄሳፌ ጉዬ ዳዊት ሄን ጎዳ ጸሳስ ያርሾ ያርሺዛሶ ኦሊዲ ጽጌቲዛ ያርሾኔ ኢሲፌቱላ ያርሾ ሺሺደሰ፤ ኢዚ ጎዳ ጸሳ ዋሲን ጽጌቲዛ ያርሾ ያርሺዛሶዛ ቦላ ሳሎፔ ታማ ዬዲዲ ኢዛ ኦይሻ ዛሪደሰ።

27 ሂስቲን ጎዳይ ኪታንቻ ኣዛዚን ኪታንቻዚ ባ ጊላ ማሻ ኮሃን ጌልሊደሰ።

28 ዳዊት ጎዳይ ያቡሴ ዴሬ ኣስ ኦርና ካላ ባሌን ኢዛስ ዛሪዳይሳ ቤኢዲ ሄን ያርሾ ሺሺደሰ።

29 ሙሴይ ባዞን ጊግሲዳ ጎዳ ጸሳ ዱንካኔይኔ ጽጌቲዳ ያርሾ ያርሺዛሶዚ ጌባኦኔ ዙምቡላ ቦላ ደሰ።

30 ዳዊት ጸሳ ኪታንቻይ ኦይኪዳ ጊላ ማሻስ ያዪዳ ጊሻስ ሄ ቢዲ ጎዳ ኦይቻናስ ዳንዳይቤና።

22

1 ሄሳ ጊሻስ ዳዊት፡ «ጎዳ ጸሳ ኬሊኔ ኢሰራኤሌ ኣሳይ ጽጌቲዛ ያርሾ ያርሺዛሶይ ሃይሳን ደስ» ጊደሰ።

ጸሳ ኬል ኬጻናስ ጊጌቱል

2 ካዎ ዳዊት ኢሰራኤሌ ቢታን ዲዛ ሃራ ዴሬ ኣሳይ ኢሲ ቦላ ሺቃና ማላ ኣዛዚደሰ፤ ኢስታ ጊዶፌ ጸሳ ኬል ኬጻናስ ማሴቲዳ ሹቶ ጊጊሳናስ ሹቶ ቂሪዛይታ ጊግሲደሰ።

3 ዳዊት ጊምባ ፔንጌታስ ሚሲማሬኔ ማጻፋ ጊዳና ማላ ዳር ቢራታኔ ሜዛኔፔ ቦላ ጊዲዳ ኬሂ ዳር ጳርቂማላ ጊግሲደሰ።

4 ሲደና አሳይኔ ጸረሴ አሳይ ዳሮ ዚጋ ሚላ ኤሂዛ ገሻሰ ቆዳይ ባይንዳ ኬሂ ዳሮ ዚጋ ሚላ ገግሲዴሰ።

5 ዳዊቲ፡ «ታ ና ሶሎሞን ይላጋኔ ኦሳራ ሜዜቶንታይሳ፤ ጎዳ ጸሳስ ከጼታና ከላይ ቢታ ኡባን ኤሬቲዳ ሎኦኔ ፑላ ከላ ገዳናሰ ቤሴስ፤ ሄሳ ገሻሰ ኢዛሰ ኮሺዛይሳ ታኒ ገረሳና» ገዴሰ፤ ዳዊቲ ሃይቃናፔ ሲንላን ዳሮ ሚሽ ገግሲዴሰ።

6 ሄሳፌ ጉዬ ዳዊቲ ባ ና ሶሎሞን ጴይጊዲ ጎዳ ኢሰራኤሌ ጸሳ ከላ ከጸና ማላ አዛዚዴሰ።

7 ዳዊቲ ሶሎሞን፡ «ታ ናዙ፡ ታኒ ጎዳ ታ ጸሳ ቦንሻሰ ከሌ ከጸናሰ ታ ዋዚናን ቆፓዲሰ።

8 ገደ አቲን ጎዳ ጸሳ ቃላይ ታና፡ ሄኒ ዳሮ ሱላ ጉሳዳሳ፤ ዳሮ ኦላካ ኦሌታዳሳ፤ ኔኒ ሳኦ ቦላ ታ ሲንላን ዳሮ ሱላ ጉሲዳ ገሻሰ ኔኒ ታሰ ከሌ ከጸና ማላ ኮይኬ» ገዴሰ።

9 ገዲኮካ፡ ሳሮኒኔ ዋፓን አይሲዛ ና ኔ ይላና፤ ኡባ ባጋራ ዲዛ ሞርኬታፔ ታ ኢዛ ሺሞፒሳና፤ ኢዛ ሱንሊካ ሶሎሞን ጌቲታና፤ ኢዛ ካዋቲላ ላይላ ኡባን ታኒ ኢሰራኤሌሰ ሳሮኔ ዋፓ አማና።

10 ኢዚ ታ ቦንሻሰ ከሌ ከጸና፤ ኢዚ ታሰ ና ገዳና፤ ታኒካ ኢዛሰ አዋ ገዳና፤ ኢዛ ካዋቲላ አራታይ ኢሰራኤሌ ቦላ ሜርናሰ ሚኒ ዳና» ገዲ ሂዶታ አሚዴሰ።

11 «ሃኢካ ታ ናዙ! ጎዳይ ኔናራ ገደ፤ ኢዚ ኔሰ አሚዳ ሂዶታ ቃላ ማላ ጎዳ ኔ ጸሳ ከሌ ከጸናሲኔ ፖላናሰ ኔና ጋላ።

12 ጎዳይ ኔና ኢሰራኤሌ ቦላ ካዋሊዳ ዋዴ ጎዳ ኔ ጸሳ ዋጋ ኔኒ ናጋና ማላ ጸሲ ኔሰ አጼ ኤራቴሊኔ አኬካ አሞ።

13 ጎዳይ ሙሴ ባጋራ ኢሰራኤሌሰ አሚዳ ዋጋኔ ማራ ኔ ናጊኮ ኡባይካ ኔሰ አንጄ ገዳና፤ አይኮይ ባ፡ ያዮፋ፡ ሚና፡ ሙርታ፡ ሂዶታ ቃንጸፋ።

14 «ታኒ ታ ዋልቃይ ጋሊዳ ማላ ጎዳ ጸሳ ከሌ ከጸናሰ 3,400 ከሎ ገራሜ ገዲዛ ዋርቃኔ 34,000 ከሎ ገራሜ ገዲዛ ቢራ ሸሻዲሰ፤ ቃሴካ ኬሂ ዳሮ ጸርቂማላኔ ቢራታ፡ ሚሊኔ ሹቕ ገረሳዲሰ፤ ሄሳ ቦላ ጉጂሲዛይሳ ኔኒ ጉጃ።

15 ኔ ማታን ዱማ ዱማ ኦሶ ኤሪዛ ሂላቲ ዴቲሰ፤ ሹቕ ቂሪዛይቲኔ ማሲዛይቲ፡ አናጼቲኔ ኡባ ኦሶ ኦላናሰ ዳንዳይዛ ሂላቲ ዴቲሰ።

16 ዋርቃ፡ ቢራ፡ ጸርቂማላኔ ቢራታ ኦሶን ኤሬቲዳ ዱማ ዱማ ሂላቲ ኔሰ ዴቲሰ፤ ሃኢ ኔኒ ኦሶዛ ዶማ፤ ጎዳይ ኔናራ ገደ» ገዴሰ።

17 ዳዊት ኢስራኤል ዴራ ካሌሊዛይታ ኡባ ባ ና ሶሎሞን ማዳና ማላ፡

18 «ጎዳ አንቴ ጸሳይ ሃይሳ ጋካናሰ አንቴናራ ዴሰ ጊዴን? ኢዚ አንቴና ኡባሶራ ሼምፒሲቤን? ሃ ቢታን ዲዛ አሳ ኢዚ ታ ኩሼን አሊ ኢሚዳ ጊሻሰ ሃ ቢታያ ጎዳ ጸሳሲን ኢዛ ዴራሰ ሃሬታዲሰ፡፡

19 ሄሳ ጊሻሰ ጎዳ አንቴ ጸሳ ኮያናሰ አንቴ ዎዚናን አንቴ ሼምፖ ኢሚቴ፤ ጎዳ ጸሳ ቦንቾሰ ኬጾቲዳ ኬላን ጸሳ ታቦታን ጸሳሰ ዲማቲዳ ሚሻታ ኤሂዲ ዎላና ማላ አንቴ ዴንዲዲ ጎዳ ኬሌ ኬጲቴ» ጊ አዛዚዴሰ፡፡

23

1 ዳዊት ጨጌዳ ዎዴ ባ ና ሶሎሞን ኢስራኤል ቦላ ካዎሊዴሰ፡፡

ሌዌታ ኦሶ

2 ዳዊት ኢስራኤል ካሌሊዛ ኡባታ፡ ቄሴታን ሌዌታ ኢሲፌ ሺሺዴሰ፡፡

3 ኢስታሰ ላይላይ ሄቹ ታማን ሄሳፌካ ቦላራ ጊዲዳ አቱማ አሳታ ሌዌታፔ ቆዲዴሰ፤ ኢስታ ቆዲይ ኩሜሕ 38,000 ጊዲዴሰ፡፡

4 ሃይታንታፌ 24,000 ጸሳ ኬላ ኦሶ ካሌቲ ጽላና ማላ አዎቴሕ ኢስታሰ ኢሚዴሰ፤ ቃሴ 6,000 አሳታሰ ሹሜታን ፒርዳ ዳናታ ሂሰቲ ዎሊዴሰ፡፡

5 ኦይዲ ሺያታሰ ጊምቤዛ ፔንጌ ናጋና ማላ አዎቴሕ ኢሚዴሰ፤ አቲዳ ኦይዲ ሺያታሰ ባ ኦሊዳ ዬላ ማሳራታን ጎዳ ጸሳ ጋላታና ማላ ሱንሊዴሰ፡፡

6 ዳዊት ሌዌይ ዬሊዳ አቱማ ናይታ ጌርሾን፡ ቃኣቴን ሜራሬ ኢስታ ዛርኬን ዛርኬን ሄቹ ኬሲ ሻኪዴሰ፡፡

7 ጌርሾንይ ዬሊዳ አቱማ ናይቲ ላዳን፤ ሺምኤ፡፡

8 ላዳን አቱማ ናይቲ ሄቫ፤ ኢስቲካ ዪሂኤሌ፡ ዜታሜን ኢዩኤሌ፡፡

9 ሺምኤ አቱማ ናይቲ ሄቫ፤ ኢስቲካ ሻሎሚቴ፡ ሃዚኤሌን ሃራን፤ ሄይቲ ላዳን ዛርኬታሰ ሃላቃታ፡፡

10 ሺምኤ አቱማ ናይቲ፡ ያሃቴ፡ ዚና፡ ያኡሼን ባሪሄ፡፡

11 ባይራዚ ያሃቱ፥ ካሎዚ ዚና፤ ያኡሽሲኔ ባሪሄሰ ዳሮ ኣቱማ ናይቲ ባይንዳ ጊሻሰ ኢሲ ኩፋ ኣሳ ማላ ቆዴቲዳ።

12 ቃኣቴሰ ኦይዱ ኣቱማ ናይቲ ዴቴሰ፤ ሄይቲካ ኣሚራሜ፥ ዪዲሃሬ፥ ኩብሮኔኔ ኡዚኤሌ።

13 ኣሚራሜ ኣቱማ ናይቲ ኣሮኔኔ ሙሴ፤ ኣሮኔይኔ ኢዛ ዜሬፋቲ ጸሳ ኩፋን ጎኡቲዛ ሚሻታ ሜርናሰ ዱማሳና ማላ፥ ጸሳሰ ያርሾ ሺሻና ማላ፥ ጸሳ ሲንፋን ሃጋዛና ማላኔ ኢዛ ሱንፋን ዴራ ሜርናሰ ኣንጃና ማላ ዱማቲዳ።

14 ጸሳ ኣሰ ሙሴ ኣቱማ ናይቲካ ሌዌ ቆሞታ ማላ ቆዴቲዳ።

15 ሙሴ ናይቲ ጌርሾሜኔ ኤልኤዜሬ።

16 ጌርሾሜ ናይታሰ ሃላቃይ ባይራ ናዛ ሹባኤሌ።

17 ኤልኤዜሬሰ ኢሲ ኣቱማ ናይ ጸላ ዴሰ፤ ኢዚካ ኤራሃቢያ፤ ኤራሃቢያሰ ጊዲኮ ዳሮ ኣቱማ ናይቲ ዴቴሰ።

18 ዪዲሃሬ ናይታሰ ሃላቃይ ባይራ ናዛ ሻሎሚቲ።

19 ኩብሮኔ ናይታፔ ባይራዚ ዪሪያ፥ ናምኣንፋዚ ኣማሪያ፥ ሄሻንፋዚ ያሃዚኤሌ፥ ኦይዳንፋዚ ዮቂማኣሜ።

20 ኡዚኤሌ ኣቱማ ናይታፔ ባይራዚ ሚኪያሳ፥ ካሎዚ ዪሺያ።

21 ሜራሬ ኣቱማ ናይቲ ማሂሌኔ ሙሼ፤ ማሂሌ ኣቱማ ናይቲ ኤልኤዜሬኔ ቂሴ።

22 ኤልኤዜሬይ ማጫ ና ጸላ ዩሊዲ ኣቱማ ና ዩሎንታ ሃይቂዴሰ፤ ሄሳ ጊሻሰ ኢሰቲ ባንታ ኣዋ ኢሻ ቂሴ ናይታ ጌሊዳ።

23 ሙሼ ኣቱማ ናይቲ ሄሻ፤ ሄይቲካ ማሂሌ፥ ኤዴሬኔ ያርሞቲ።

24 ሃይታንቲ ኡባይ ባሶ ኣሳታኒኔ ባ ዛርኬታን ጴይጌቲዳ፤ ሌዌ ዛሬቲ ኢሶይ ኢሶይ ባ ሱንፋን ማዘጋቤቲዳ፤ ኢሰታሰ ላይፋይ ናምኡ ታማኔ ሄሳፌ ቦላ ጊዲዳይቲ ጸሳ ኩፋን ኦፊቴሰ።

25 ዳዊቲ፥ «ኢሰራኤሌ ጎዳ ጸሲ ባ ኣሳ ሽምፒሲዴሰ፤ ዩሩሳላሚን ሜርናሰ ዴኣና።

26 ሃይሳፌ ጉዬ ሌዌቲ ዱንካኔዛኔ ኢዛ ጊዶን ጎኡቲዛ ሚሻታ ቶካናሰ ቤሴና» ጊዴሰ።

27 ዳዊቲ ዉርሴፋን ኢሚዳ ኣዛዞ ማላ ኢሰታሰ ላይፋይ ናምኡ ታማኔ ሄሳፌ ቦላራ ጊዲዳ ሌዌቲ ቆዴቲዳ።

28 ሌዌታ ኦሶይ ጸሳ ኩፋን ኣሮኔ ዜሬፋታ ኦሶን ኦሊ ማዶ፥ ጸሳ ኩፋ ጊዶዛኔ ጊቤዛ ሎኤሊ ናጎ፥ ጸሳ ኩፋ ኦሶሰ ዱማቲዳ ሚሻታ ሎኤሊ ኦይሊኔ ጸሳ ኩፋን ዲዛ ሃራ ኦሶታካ ሎኤሊ ኦሶ።

29 ቃሴካ ጸሳ ሲንፋን ዋሊዛ ኡኬፋሰ፡ ካፋ ያርሾሰ ሺሺዛ ጲሌሰ፡ ሙኑቃናሰ፡ ኢርሾይ ባይንዳ ኡኬቲዛ ኡኬላ ኡካናሰ፡ ማኪዛዛሲኔ ማዛኒዛዛሰ አላፌቴላ ኢሰታሰ ኢሜቲዴሰ።

30 ሄሳፉካ ኢሰቲ ኡባ ጋላሰ ማላዶኔ ኦማርሰ ጎዳ ጸሳ ሲንፋን ኤቂዲ ጋላታናሲኔ ቦንቻናሰ፡

31 ሳሞባታ ጋላሰ፡ አገናይ ዶሚዛ ኮይሮ ጋላሳታን፡ ባኣሌ ጋላሳታን ዋጋ ቆዳ ማላ ጎዳ ጸሳ ሲንፋን ኡባ ዋዴ ጸጌቲ ሺቂዛ ያርሾ ሺሻናሰ፡

32 ጋይቶቴላ ዱንካኔኔ ጸሳ ኬላ ናጋናሰ፡ ኢዛ ጊዶን ኦሴቲዛ ጎይኖ ዋጋታ ፖሊሺን ባ ዳቦ ኣሮኔ ዜሬላታ ማዳናሰ ኣዋቴላ ኢሜቲዴሰ።

24

ቄሴታ ኦሶ

1 ኣሮኔ ናይታ ጩጋይ ሃይሳፌ ካሊዛይሳ፤ ኣሮኔ ናይቲ ናዳቤ፡ ኣቢሁ፡ ኤልኤዜሬኔ ኢታማሬ።

2 ናዳቤይኔ ኣቢሁይ ና ዩሎንታ ባ ኣዋቴ ካሴቲ ሃይቂዳ፤ ሄሳ ጊሻሰ ኤልኤዜሬይኔ ኢታማሬይ ቄሴ ጊዲዳ።

3 ዳዊቲ ኤልኤዜሬ ዛርኬፌ ሳዶቄኔ ኢታማሬ ዛርኬፌ ኣሂሜሌኬራ ጊዲዲ ኣሮኔ ዛሬታ ኢሰታ ኦሶን ኦሶን ማዳና ማላ ሻኪ ዋሊዴሰ።

4 ኤልኤዜሬ ዛሬ ሃላቃቲ ኢታማሬ ዛሬ ሃላቃታቴ ዳር ጊዲዳ ጊሻሰ ኤልኤዜሬ ዛሬቲ ታማኔ ኡሱፑን ጩጋን ሻኬቲን፡ ኢታማሬ ዛሬቲ ኦሰፑን ጩጋን ሻኬቲዳ።

5 ጸሳ ኬላ ካሌሊዛይቲኔ ጸሳ ጪማቲ ኤልኤዜሬ ዛሬታ ጊዶኒኔ ኢታማሬ ዛሬታ ጊዶን ዲዛ ጊሻሰ ኦናካ ማዶንታ ኦሶዛ ሳማን ሻኪዳ።

6 ለዌ ዛሬ ናቲናኤሌ ና ጸፌዚ ሻማኤይ ካዋዛ ሲንፋኒኔ ኢዛ ሹሜታ ሲንፋን፡ ቄሴ ሳዶቄ ሲንፋኒኔ ኣቢያታሬ ና ኣሂሜሌኬ ሲንፋን፡ ቄሴን ሲንፋኒኔ ለዌታሶ ኣሳ ሃላቃታ ሲንፋን ኢሰታ ሱንፋ ጸፌዴሰ፤ ሂሰቲን ኤልኤዜሬ ኬላ ኣሳታ ሃላቃታቴ ኢሶይኔ ኢታማሬ ኬላ ኣሳታ ሃላቃታቴ ኢሶይ ባንታ ታራን ታራን ሳማ ኬሲዳ።

7 ሃ ኣሳቲ ሳማ ኬሲን
ኮይሮ ሳማይ ዮሃሪቤ ጋኪዴሰ፤
ናሞኣን፡፡

- ያዳያ ጋኪዴሰ፤
 8 ሄሻንሶዚ
 ሃሪሜ ጋኪዴሰ፤
 ኦይዳንሶዚ
 ሳኦሪሜ ጋኪዴሰ።
 9 ኢቻሻንሶዚ
 ማልኪያ ጋኪዴሰ፤
 ኡሱፑንሶዚ
 ሚያሚኔ ጋኪዴሰ፤
 10 ላፑንሶዚ
 ሃቆጼ ጋኪዴሰ፤
 ኦሰፑንሶዚ
 ኣቢያ ጋኪዴሰ፤
 11 ኡዱፋንሶዚ
 ኢያሶ ጋኪዴሰ፤
 ታማንሶዚ
 ሻካኒያ ጋኪዴሰ፤
 12 ታማን ኢሲንሶዚ
 ኤልያሼቤ ጋኪዴሰ፤
 ታማን ናሞኣንሶዚ
 ያቂሜ ጋኪዴሰ፤
 13 ታማን ሄሻንሶዚ
 ሁፓ ጋኪዴሰ፤
 ታማን ኦይዳንሶዚ
 ያሼባኣቤ ጋኪዴሰ፤
 14 ታማን ኢቻሻንሶዚ
 ቢልጋ ጋኪዴሰ፤
 ታማን ኡሱፑንሶዚ
 ኢሜሪ ጋኪዴሰ፤
 15 ታማን ላፑንሶዚ
 ሄዚሬ ጋኪዴሰ፤
 ታማን ኦሰፑንሶዚ
 ሃፊጼጼ ጋኪዴሰ፤
 16 ታማን ኡዱፋንሶዚ
 ፓታያ ጋኪዴሰ፤
 ናሞኡ ታማንሶዚ
 ሄዚቄላ ጋኪዴሰ፤
 17 ናሞኡ ታማን ኢሲንሶዚ

- ያከኔ ጋኪዳስ፤
 ናሞኡ ታማን ናሞኣንሶዚ
 ጋሙሌ ጋኪዳስ፤
- 18 ናሞኡ ታማን ሄቫንሶዚ
 ዳላያ ጋኪዳስ፤
 ናሞኡ ታማን ኦይዳንሶዚ
 ማኣዚያ ጋኪዳስ።
- 19 ኢሰራኤል ጎዳይ ኢስታ ኣዛዚዳ ማላኔ ካሴ ኢስታ ኣዋ
 ኣሮኔይ ኢስታሰ ዋሒዳ ዋጋ ማላ ኢስቲ ጸሳ ኬል ጌሊዛ ዋዴ
 ኦላና ማላ ኢሜቲዳ ዋጋይ ሃይሳ።
- ኣቲዳ ሃራ ሌዌታ ኦሶ
- 20 ኣቲዳ ሃራ ሌዌ ዛሬቲ
 ኣሚራሜ ናይታፔ ሼቡኤሌ፥
 ሼቡኤሌ ናይታፔ ዩሂዳዬ።
- 21 ኤራሃቢያ ናይታፔ ባይራ ናዛ ዪሺያ።
- 22 ዪዲሃሬታፔ ሻሎሚቲ፤
 ሻሎሚቲ ናይታፔ ያሃቲ።
- 23 ኬብሮኔ ናይታፔ ኮይሮዚ ዪሪያ፥ ናሞኣንሶዚ ኣማሪያ፥
 ሄቫንሶዚ ያሃዚኤሌ፥ ኦይዳንሶዚ ዮቂማኣሜ።
- 24 ኡዚኤሌ ናይታፔ ሚኪያሳ ና ሻሚሬ።
- 25 ሚኪያሳ ኢሻ ዪሺያ ናይታፔ ዛካራሳ።
- 26 ሜራሬ ኣቱማ ናይቲ ማሂሌ፥ ሙሼኔ ያኢዜ።
- 27 ያኢዜ ኣቱማ ናይቲ ቤኖ፥ ሾሃሜ፥ ዛኩሬኔ ኢቢሬ።
- 28 ማሂሌ ኣቱማ ናይቲ ኤልኤዜሬኔ ቂሴ፤ ኤልኤዜሬሰ ኣቱማ
 ናይ ዴና።
- 29 ቂሴሰ ዬራሂሞኤሌ ጌቲቲዛ ኢሲ ኣቱማ ናይ ዴሰ።
- 30 ሙሼሰ ማሂሌ፥ ኤዴሬኔ ያርሞቲ ጌቲቲዛ ሄቭ ኣቱማ ናይቲ
 ዴቲሰ።
- ሃይታንቲ ባሶ ኣሳን ኣሳን ቆዴቲዳ ሌዌ ዛሬታ።
- 31 ኢስታ ኢሻ ኣሮኔ ናይቲ ኦሶይሳ ካዋ ዳዊቲ ሲንላን፥ ሳዶቂ
 ሲንላን፥ ኣሂሜሌኬ ሲንላን፥ ሂሳሶካ ቄሴታሶ ኣሳታ ሃላቃቲኔ
 ሌዌታሶ ኣሳታ ሃላቃቲ ዲዛሶን ሳማ ዬጌዳ፤ ባይራዛፔ ቢዲ
 ወርሴል ጋካናሰ ዲዛይታሰ ኢሲ ጌና ሳማ ዬጌዳ።

25

ጸሳ ኬላን ዬዲዛይታ

¹ ዳዊቲኔ ኦላ ጋዳዋቲ አሳፌ ናይታፔ፡ ሄማኔ ናይታፔኔ ኤዶታኔ ናይታፔ ማሲንቆን፡ ዲላኒኔ ዳላን አዋጂሽ ቲንቢቲ ዮቲዛይታ ዶሪ ዋሊዳ፤ ሃይሳ ሃ ኦሶዛ ኦላና ማላ ዶሬቲዳ አሳታ ሱንሊ ሃይሳፌ ካሊ ዲዛይሳ።

² አሳፌ ናይታፔ ዛኩሬ፡ ዮሴፌ፡ ናታኒያኔ አሼርኤሌ፤ ሃይቲ አሳፌ ናይቲ ካዎይ አዛዚን ቲንቢቲ ዮቲዛ አሳፌፔ ጋርሳራ አዛዜቲቲሰ።

³ ኤዶታኔ ናይታፔ ጎዶሊያሳ፡ ጼሬ፡ ዬሻኢያ፡ ሸምኤ፡ ሃሻቢያኔ ማቲቲያ፤ ሃ ኡሱፑናቲ ማሲንቆን ጎዳ ጋላቲሼኔ ቦንቺሽ ቲንቢቲ ዮቲዛ ባ አዋ ኤዶታኔፔ ጋርሳራ አዛዜቲቲሰ።

⁴ ሄማኔ ናይታፔ ቡቂያ፡ ማታኒያ፡ ኡዚኤሌ፡ ሹባኤሌ፡ ያርሞቲ፡ ሃናኒያ፡ ሃናኔ፡ ኤልአታ፡ ጊዶልቲ፡ ኤሮማሞቲ-ኤዜሬ፡ ዮሻባቃሹ፡ ማሎታ፡ ሆቲሬኔ ማሂዚኦቲ።

⁵ ሃይቲ ኡባቲካ ካዎዛሰ ቲንቢቲ ዮቲዛ ሄማኔ ናይታ፤ ጸሳይ ኢዛሰ ኢማና ጊዳ ማላ ሄማኔ ቶቁ ቶቁ ሂሰታናሰ ሃ 14 አቲማ ናይታኔ 3 ማጫ ናይታ ኢዛሰ ኢሚዴሰ።

⁶ ሃይቲ ኡባይ ጎዳ ኬላን ዳላ ጊሪሲሹ፡ ማሲንቆኔ ዲል ዲጸሺ ባንታ አዋፔ ጋርሳራ ጸሳ ኬላን ኦሴቲሰ።

አሳፌይ፡ ኤዶታኔይኔ ሄማኔይ ካዎዛፔ ጋርሳራ አዛዜቲሹ ዴቲሰ።

⁷ ሃይቲ ባ ዳቦታራ ጊዲዲ ጎዳ ሲንላን ሸቂዛ ዬላ ታማር ሎሂዳይታ፤ ኢሰታ ቆዳይ ሙሌራ ናሞኤ ጴታኔ ኦሰፑን ታማኔ ኦሰፑና።

⁸ ኢሰቲ ባንታ ኦሶ ሻኪ ኤራናሰ ጨማኔ ና፡ አሰታማሬኔ ታማሬ ጊ ሻኮንታ ኢሲ ጊና ሳማ ዬጊዳ።

⁹ ኮይሮ ሳማይ

አሳፌ ባጋፌ ጊዲዳ

ዮሴፌ ናይታሲኔ

ኢዛ ዳቦታሰ ኬዚዴሰ፤

ኢሰታሰ ቆዳይ 12፤

ናሞኦንሶ

ሳማይ ጎዶሊያሳሰ፡

ኢዛ ናይታሲኔ

ኢዛ ዳቦታሰ ኬዚዴሰ፤

ኢሰታሰ ቆዳይ 12።

¹⁰ ሄሻንሶ

ሳማይ ዛኩሬሰ፡

ኢዛ ናይታሲኔ

ኢዛ ዳቦታሰ ኬዚዴሰ፤
ኢሰታሰ ቆዳይ 12።

- 11 ኦይዳንሶ
ሳማይ ዩጲሬሰ፤
ኢዛ ናይታሲኔ
ኢዛ ዳቦታሰ ኬዚዴሰ፤
ኢሰታሰ ቆዳይ 12።

- 12 ኢቻሻንሶ
ሳማይ ናታኒያሰ፤
ኢዛ ናይታሲኔ
ኢዛ ዳቦታሰ ኬዚዴሰ፤
ኢሰታሰ ቆዳይ 12።

- 13 ኡሱፑንሶ
ሳማይ ቡቂያሰ፤
ኢዛ ናይታሲኔ
ኢዛ ዳቦታሰ ኬዚዴሰ፤
ኢሰታሰ ቆዳይ 12።

- 14 ላፑንሶ
ሳማይ ኣሼርኤሌሰ፤
ኢዛ ናይታሲኔ
ኢዛ ዳቦታሰ ኬዚዴሰ፤
ኢሰታሰ ቆዳይ 12።

- 15 ኦሰፑንሶ
ሳማይ ዩሻኢያሰ፤
ኢዛ ናይታሲኔ
ኢዛ ዳቦታሰ ኬዚዴሰ፤
ኢሰታሰ ቆዳይ 12።

- 16 ኡዲፋንሶ
ሳማይ ማታኒያሰ፤
ኢዛ ናይታሲኔ
ኢዛ ዳቦታሰ ኬዚዴሰ፤
ኢሰታሰ ቆዳይ 12።

- 17 ታማንሶ
ሳማይ ሺምኤሰ፤
ኢዛ ናይታሲኔ
ኢዛ ዳቦታሰ ኬዚዴሰ፤
ኢሰታሰ ቆዳይ 12።

- 18 ታማኔ ኢሲንሶ
ሳማይ ኣዛሪኤሌሰ፤

- ኢዛ ናይታሲኔ
 ኢዛ ዳቦታሰ ኬዚዴሰ፤
 ኢስታሰ ቆዳይ 12።
- 19 ታማኔ ናምኣንሖ
 ሳማይ ሃሻቢያሰ፤
 ኢዛ ናይታሲኔ
 ኢዛ ዳቦታሰ ኬዚዴሰ፤
 ኢስታሰ ቆዳይ 12።
- 20 ታማኔ ሄሻንሖ
 ሳማይ ሸቡኤሌሰ፤
 ኢዛ ናይታሲኔ
 ኢዛ ዳቦታሰ ኬዚዴሰ፤
 ኢስታሰ ቆዳይ 12።
- 21 ታማኔ ኦይዳንሖ
 ሳማይ ማቲቲያሰ፤
 ኢዛ ናይታሲኔ
 ኢዛ ዳቦታሰ ኬዚዴሰ፤
 ኢስታሰ ቆዳይ 12።
- 22 ታማኔ ኢቻሻንሖ
 ሳማይ ያርሞቴሰ፤
 ኢዛ ናይታሲኔ
 ኢዛ ዳቦታሰ ኬዚዴሰ፤
 ኢስታሰ ቆዳይ 12።
- 23 ታማኔ ኡሱፑንሖ
 ሳማይ ሃናኒያሰ፤
 ኢዛ ናይታሲኔ
 ኢዛ ዳቦታሰ ኬዚዴሰ፤
 ኢስታሰ ቆዳይ 12።
- 24 ታማኔ ላፑንሖ
 ሳማይ ዮሺባቃሼሰ፤
 ኢዛ ናይታሲኔ
 ኢዛ ዳቦታሰ ኬዚዴሰ፤
 ኢስታሰ ቆዳይ 12።
- 25 ታማኔ ኦስፑንሖ
 ሳማይ ሃናኒሰ፤
 ኢዛ ናይታሲኔ
 ኢዛ ዳቦታሰ ኬዚዴሰ፤
 ኢስታሰ ቆዳይ 12።
- 26 ታማኔ ኡዱፋንሖ

- ሳማይ ማሎታስ፥
 ኢዛ ናይታሲኔ
 ኢዛ ዳቦታስ ኬዚዳስ፤
 ኢስታስ ቆዳይ 12።
- 27 ናሞኡ ታማንሶ
 ሳማይ ኤልኣታስ፥
 ኢዛ ናይታሲኔ
 ኢዛ ዳቦታስ ኬዚዳስ፤
 ኢስታስ ቆዳይ 12።
- 28 ናሞኡ ታማኔ ኢሲንሶ
 ሳማይ ሆቲሬስ፥
 ኢዛ ናይታሲኔ
 ኢዛ ዳቦታስ ኬዚዳስ፤
 ኢስታስ ቆዳይ 12።
- 29 ናሞኡ ታማኔ ናሞኣንሶ
 ሳማይ ጊዳልቴስ፥
 ኢዛ ናይታሲኔ
 ኢዛ ዳቦታስ ኬዚዳስ፤
 ኢስታስ ቆዳይ 12።
- 30 ናሞኡ ታማኔ ሄቫንሶ
 ሳማይ ማሂዚኦቴስ፥
 ኢዛ ናይታሲኔ
 ኢዛ ዳቦታስ ኬዚዳስ፤
 ኢስታስ ቆዳይ 12።
- 31 ናሞኡ ታማኔ ኦይዳንሶ
 ሳማይ ኤሮማሞቴ-ኤዜሬስ፥
 ኢዛ ናይታሲኔ
 ኢዛ ዳቦታስ ኬዚዳስ፤
 ኢስታስ ቆዳይ 12።

26

ጸሓ ኬላ ፔንጌ ናጊዛይታ

- 1 ጸሓ ኬላ ፔንጌ ናጊዛይቲ ሃይሳፌ ካሊዛይታ።
 ቆሬ ባጋፌ ኣሳፌ ናይታ ጋርሳን ቆሬ ና ማሼሌሚያ።
- 2 ማሼሌሚያ ናይቲ፥
 ኮይሮይ ዛካራሳ፥
 ናሞኣንሶዚ ዪዲኤሌ፥
 ሄቫንሶዚ ዛባዲያ፥

ኦይዳንሉ ያተንኤሌ፥

³ ኢቻሻንሉ ኤላሜ፥

ኡሱፑንሉ ዪሆሃና፥

ላፑንሉ ኤልሆኤናዬ።

⁴ ጸሲ ኦቤድ-ኤዶሜ

ኢንጂዳ ጊሻሰ

ኢዚ ኦስፑን አቱማ ናይታ ዩሊዴስ፤

ኮይርዚ ሻማኤ፥

ናምኣንሉ ዪሆዛባዴ፥

ሄቫንሉ ዮኣሃ፥

ኦይዳንሉ ሳካሬ፥

ኢቻሻንሉ ናተናኤሌ፥

⁵ ኡሱፑንሉ ኣምኤሌ፥

ላፑንሉ ዪሳኮሬ፥

ኦስፑንሉ ፒላቴ።

⁶ ቃቤ ኦቤድ-ኤዶሜ ና ሻማኤይካ አቱማ ናይታ ዩሊዴስ፤
ኢስቲ ኤሬቲዳ ሚኖ ኣሰ ጊዲዳ ጊሻሰ ባንታ ኣዋ ኬላን ሃላቃ
ጊዲዳ።

⁷ ሻማኤ ናይቲ ኦቲ፥ ኤራፋኤሌ፥ ኢዮቤዴኔ ኤልዛባዴ፤ ኢስታ
ኢሻቲ ኤሊሁይኔ ሳማኬይ ኤሬቲዳ ሚኖ ኣሳታ።

⁸ ሃይቲ ኡባቲ ኦቤድ-ኤዶሜ ዛሬታ፤ ኢስታስ፥ ኢስታ ናይቲ፥
ኢስታ ዳቦቲ ኦሶስ ኬሂ ሚኖ ኣሳታ፤ ኦቤድ-ኤዶሜ ዛሬቲ ሙሌራ
ኡሱፑን ታማኔ ናምኣ።

⁹ ማሼሌሚያሰ ኤራቴሊ ኩሚዳ ሚኖ ናይቲ፥ ዳቦቲ ዴቴስ፤
ኢስቲ ሙሌራ ታማኔ ኦስፑና።

¹⁰ ሜራሬ ባጋፌ ጊዲዳ ሆሳሰካ አቱማ ናይቲ ዴቴስ፤
ኢሶይ ሺሚሬ፤ ኢዚ ባይራ ጊዶንታ ኣጊኮካ ኢዛ ኣዋይ ኢዛ
ባይራሲዴስ።

¹¹ ናምኣንሉ ኪልቂያሳ፥

ሄቫንሉ ጸባሊያ፥

ኦይዳንሉ ዛካራሳ፤

ሆሳ ናይቲ፥ ኢዛ ዳቦቲ

ሙሌራ ታማኔ ሄቫ።

¹² ጸሳ ኬላ ፔንጌ ናጊዛይቲ ባንታ ኬላ ኣሳ ሃላቃታ ጋርሳን
ጩጋን ጩጋን ሻኬቲዲ ኢስታ ዳቦቲ ኦሶይሳ ጸሳ ኬላ ኦሶ
ኦሳናሰ ባ ታራን ታራን ኡቲዳ።

13 ፔንጌታ ኡባ ናጋናሰ ባንታ ኩላን ኩላን ጨማኔ ዮጋ ጎንታ ኢሲ ቦላ ሳማ ኬሲዳ።

14 ኣርሼይ ሞኪዛ ባጋራ ዲዛ ፔንጌዛ ናጋናሰ ሳማይ ሼሌሚያሰ ኬዚዳሰ፤ ፑዳሃ ባጋራ ዲዛ ፔንጌዛ ናጋናሰ ሳማይ ሎኦ ዘሪዛ ኢዛ ና ዛካራሳሰ ኬዚዳሰ።

15 ዱጌሃ ባጋራ ዲዛ ፔንጌዛ ናጋናሰ ሳማይ ኦቤድ-ኤዶሜሰ ኬዚዳሰ፤ ሚንጃ ኬላ ናጋናሰ ሳማይ ኢዛ ናይታ ጋኪዳሰ።

16 ኣርሼይ ወሊዛ ባጋራ ዲዛ ፔንጌዛኔ ጋና ኦጌ ባጋራ ዲዛ ሼሌኬቴ ፔንጌ ናጋናሰ ሳማይ ሹፊሚሲኔ ሆሳሰ ኬዚዳሰ።

17 ኢሲ ባጋራ ናጊዛ ዛቤታ ጊናራ ሃራ ዛቤይ ዴሰ፤ ሃቕ ሃቕ ኣርሼይ ሞኪዛ ባጋራ ኡሱፑን ዛቤቲ፣ ፑዳሃ ባጋራ ኦይዱ ዛቤቲ፣ ሚንጃ ኬላ ናጋናሰ ናምኡ ዛቤቲ።

18 ኣርሼይ ወሊዛ ባጋራ ዲዛ ዱቡሻ ዴምባን ናምኡ ዛቤ ቃሰካ ኦጌ ቦላ ኦይዱ ዛቤ ጊዲዲ ናጌቲሰ።

19 ቆሪ ዛሬታሲኔ ሜራሬ ዛሬታሰ ፔንጌ ናጋናሰ ኢሜቲዳ ኢሰታ ኦሶ ጊሻይ ሄሳ።

ጸሓ ኬላን ኦሊዛ ሃራ ሹሜታ

20 ለዌ ባጋሬ ኣካያይ ጸሓ ኬላ ጊዶን ዲዛ ሚንጃ ኬላኔ ጸሓሰ ዱማሲ ዋሊዳ ኢሞታታ ናጋናሰ ኣዋቲሊ ኢዛሰ ኢሜቲዳሰ።

21 ዪሂኤሌ ኣዋ ላዳኔይ ጌርሹኔ ባጋሬ ጊዲዳ ኢዛ ናይቲ ባሶ ኬላ ኣሳታሰ ሃላቃታ።

22 ዪሂኤሌ ና ዜታሜሲኔ ኢዛ ኢሻ ኢዩኤሌሰ ጸሓ ኬላ ጊዶን ዲዛ ሚንጃ ኬላ ናጋናሰ ኣዋቲሊ ኢሜቲዳሰ።

23 ኣሚራሜ ዛሬታሰ፣ ዪዲሃሬ ዛሬታሰ፣ ኬብሮኔ ዛሬታሲኔ ኡዚኤሌ ዛሬታሰ ኢሰታ ጊሻ ኦሶይ ኢሜቲዳሰ።

24 ሙሴ ና ጌርሹሚ ዛሬፔ ጊዲዳ ሹባኤሌሰ ሚንጃ ኬላ ናጊዛይታ ቦላ ኣላፊቲሊ ኢሜቲዳሰ።

25 ኢዚ ጌርሹሚ ኢሻ ኤልኤዜሬ ባጋራ ሻሎሚቲሰ ዳቦቲሰ፤ ኤልኤዜሬይ ኤራሃቢያ ዩሊዳሰ፤ ኤራሃቢያይ ዩሻኢያ ዩሊዳሰ፤ ዩሻኢያይ ኢዮራሜ ዩሊዳሰ፤ ኢዮራሜይ ዚኪሬ ዩሊዳሰ፤ ዚኪሬይ ሻሎሚቲ ዩሊዳሰ።

26 ካዎ ዳዊቲ፣ ኢዛሶ ኣሳታ ሃላቃቲ፣ ሻላቃቲ፣ ማቶ ሃላቃቲኔ ኦላ ጋዳዋቲ ጸሓሰ ዱማሲ ዋሊዳ ሚሻታ ኡባ ናጋናሰ ሻሎሚቲሲኔ ኢዛ ዳቦታሰ ኣዋቲሊ ኢሜቲዳሰ።

27 ካሴ ኦላን ዲኢ ኤሂዳ ሚሻፊ ባጋ ጸሓ ኬላ ጊጊሳናሰ ዱማሲ ዋሊዳ።

28 ቃሴ ናቤ ሳሜሊ፥ ቂሴ ና ሳኦሊ፥ ኔሬ ና ኣቢኔሪኔ ጹሪያ ና ኢዮኣቤይ ካሴ ዱማሲ ዋሊዳ ሚሽ ኡባኔ ሃራ ጸሳ ኬላ ሚሻታ ኡባ ሻሎሚቲይኔ ኢዛ ዳቦቲ ናጌቴሰ።

29 ዪጸሃሬ ዛሬታፔ ካናኒያሲኔ ኢዛ ናይታሰ ጸሳ ኬላፌ ካሬ ባጋራ ዲዛ ኦሶታን ኢሰራኤሌ ኣሳ ኣሳናሲኔ ኢሰታ ቦላ ፒርዳናሰ ኣዋቴሊ ኢሜቲዴሰ።

30 ኬብሮኔ ዛሬፔ ሃሻቢያይኔ ኢዛ ዳቦቲ 1,700 ሚኖ ኣሳቲ ዮርዳናሴ ሻፋፔ ሄ ፒንላን ኣርሼይ ዉሊዛ ባጋራ ዲዛ ኢሰራኤሌ ኣሳ ቦላ ጎዳ ኦሶሲኔ ካዋ ኦሶሰ ሹሜቲዳ።

31 ኬብሮኔ ዛሬታፔ ኢሰታሶ ኣሳ ማዘጋቤዛን ጸፊቲዳ ማላ ዪሪያይ ኢሰታሰ ሃላቃ ጊዲዴሰ፤ ካዋ ዳዊቲ ካዋቲዳ ኦይዱ ታማንላ ላይላን ማዘጋቤ ፒልጊ ጼሊሺን ጋላኣዴ ዴሬን ኢያዜሬ ጌቴቲዛሶን ኬብሮኔ ኣሳታፔ ሚኖ ኣሳቲ ቤቲዳ።

32 ዪሪያሰ ሚኖኔ ሶ ኣሳታሰ ሃላቃ ጊዲዳ 2,700 ዳቦቲ ዴቴሰ፤ ካዋ ዳዊቲ ኢሰቲ ጸሳ ኦሶ ኦላናሲኔ ካዋ ኦሶ ኦላና ማላ ኦርቤሌ ቆሞታ ቦላ፥ ጋዴ ቆሞታ ቦላኔ ሚናሴ ቆሞታፔ ባጋታ ቦላ ሹሚዴሰ።

27

ኢሰራኤሌ ኦላንቻታ ካሌሊዛይታ

1 ባንታ ቡቴን ቡቴን ላይላ ኩሜላ ኣጊናን ኣጊናን ካዋዛሲኔ ዴራሰ ታራን ታራን ኦሊዛ ኢሰራኤሌ ኬላ ኣሳታ ሃላቃቲ፥ ሻላቃቲኔ ማቶ ሃላቃቲ፥ ኦላ ጋዳዋቲ ሃይሳፌ ካሊዛይታ፤ ኢሲ ኢሲ ቡቴን 24,000 ኣሲ ዴሰ።

2 ኮይሮ ኣጊናን ኦሊዛ ቡቴዛሰ ኣላፌይ ዛብዲኤሌ ና ያሾቢኣሜ፤ ኢዛ ቡቴዛን 24,000 ኣሲ ዴሰ።

3 ያሾቢኣሜይ ፓሬሴ ዛሬ፤ ኢዚ ኮይሮ ኣጊናን ኦላሰ ኬኢዛ ሃላቃታሰ ጋዳዋ።

4 ናሞኣንሶ ኣጊናን ኦሊዛ ቡቴዛሰ ኣላፌይ ኣሂሆሄ ዴሬ ኣሰ ዶዴያ፤ ኢዛ ቡቴዛን 24,000 ኣሲ ዴሰ፤ ሃ ቡቴዛ ኢዛፔ ጋርሳራ ካሌሊዛይ ሚቂሎቴ።

5 ሄሻንሶ ኣጊናን ኦሊዛ ቡቴዛሰ ኣላፌይ ቂሴ ዮዳሄ ና ባናያ፤ ኢዛ ቡቴዛን 24,000 ኣሲ ዴሰ።

6 ባናያይ 30 ኣሳታፔ ኣፂ ኤሬቲዳ ሚኖ ኣሰ ጊዲዳ ጊሻሰ ኢዚ ኢሰታ ቦላ ሃላቃ ጊዲዴሰ፤ ኢዛ ና ኣሚዛባዴይ ኢዛፔ ጋርሳራ ኣዛዚዛዴ ጊዲዴሰ።

7 ኦይዳንሉ አገናን ኦሲዛ ቡቴዛሰ አላፌይ ኢዮኦቤ ኢሻ አሳሄሌ፤ ኢዛ ቡቴዛን 24,000 ኣሲ ዴሰ፤ ኢዛሰሆን አላፌቲዳይ ኢዛ ና ዛባዲያ።

8 ኢቻሻንሉ አገናን ኦሲዛ ቡቴዛሰ አላፌይ ዩጺራ ኣሰ ሻሚሁቴ፤ ኢዛ ቡቴዛን 24,000 ኣሲ ዴሰ።

9 ኡሱፑንሉ አገናን ኦሲዛ ቡቴዛሰ አላፌይ ቱቁሄ ኣሰ ኢቁሻ ና ኢራ፤ ኢዛ ቡቴዛን 24,000 ኣሲ ዴሰ።

10 ላፑንሉ አገናን ኦሲዛ ቡቴዛሰ አላፌይ ኤፍሬሚ ዛሬፔ ፒሎኔ ዴሬ ኣሰ ሄሌዴ፤ ኢዛ ቡቴዛን 24,000 ኣሲ ዴሰ።

11 ኦሰፑንሉ አገናን ኦሲዛ ቡቴዛሰ አላፌይ ሁሼ ኣሰ ሲቢካዬ፤ ኢዛ ዛራሄ ዛሬፔ ዩዴሰ፤ ኢዛ ቡቴዛን 24,000 ኣሲ ዴሰ።

12 ኡዲፋንሉ አገናን ኦሲዛ ቡቴዛሰ አላፌይ ቢኒያሚ ዛሬፔ ኣናቶቴ ኣሰ ኣቢኤዜሬ፤ ኢዛ ቡቴዛን 24,000 ኣሲ ዴሰ።

13 ታማንሉ አገናን ኦሲዛ ቡቴዛሰ አላፌይ ዛራሄ ዛሬፔ ናጾፌ ዴሬ ኣሰ ማሂራዬ፤ ኢዛ ቡቴዛን 24,000 ኣሲ ዴሰ።

14 ታማኔ ኢሲንሉ አገናን ኦሲዛ ቡቴዛሰ አላፌይ ኤፍሬሚ ዛሬፔ ፒራቶኔ ኣሰ ባናያ፤ ኢዛ ቡቴዛን 24,000 ኣሲ ዴሰ።

15 ታማኔ ናሞኣንሉ አገናን ኦሲዛ ቡቴዛሰ አላፌይ ኦቲንኤሌ ዛሬፔ ናጾፌ ዴሬ ኣሰ ሄልዳዬ፤ ኢዛ ቡቴዛን 24,000 ኣሲ ዴሰ።

ኢሰራኤሌ ኣሳ ጋርሳን ቆሞታ ቆሞታ ካሌሲዛ ኦላ ጋዳዋታ

16 ኢሰራኤሌ ኣሳ ጋርሳን ቆሞታ ቆሞታ ቦላ ሹሜቲዳ ኦላ ጋዳዋቲ ሃይሳፌ ካሊዲ ጸፊቲዳይታ።

ኦርቤሌ ቆሞ ቦላ

ሱሚዳይ ዚኪሬ ና ኤልኤዜሬ።

ሲሞና ቆሞ ቦላ ሱሚዳይ

ማኢካ ና ሻፋጺያ።

17 ሌዌ ቆሞ ቦላ ሱሚዳይ

ቃሙኤሌ ና ሃሻቢያ።

ኣርኔ ዛርኬ ቦላ

ሱሚዳይ ሳዶቄ።

18 ዩሁዳ ቆሞ ቦላ ሱሚዳይ

ዳዊቴ ኢሻ ኤሊሁ።

ዩሳኮሬ ቆሞ ቦላ

ሱሚዳይ ሚካኤሌ

ና ኦሚሬ።

19 ዛቢሎኔ ቆሞ ቦላ

ሱሚዳይ ኣብዲዩ

ና ይሸማኤ።
 ኒፍታሌሜ ቆሞ ቦላ
 ሱሚዳይ አዛሪኤሌ
 ና ያርሞቲ።

20 ኤፍሬሜ ቆሞ ቦላ
 ሱሚዳይ አዛዚያ
 ና ሆሴኤ።

ዮርዳኖሴ ሻፋፔ አርሼይ ወሊዛ ባጋን ዲዛ ሚናሴ ቆሞ
 ባጋታ ቦላ ሱሚዳይ ፓዳያ ና ኢዩኤሌ።

21 ዮርዳኖሴ ሻፋፔ አርሼይ ሞኪዛ ባጋን ጋላኣዴን ዲዛ
 ሚናሴ ቆሞ ባጋታ ቦላ ሱሚዳይ ዛካራሳ ና ኢዶ።

በኒያሜ ቆሞ ቦላ ሱሚዳይ አበኔሬ ና ያኢሲኤሌ።

22 ዳኔ ቆሞ ቦላ ሱሚዳይ ዪሮሃሜ ና አዛሪኤሌ።

ሃይቲ ኢሰራኤሌ አሳ ጋርሳን ቆሞታ ቆሞታ ካሌዲዛ ኦላ
 ጋዳዋታ።

23 ጎዳይ፥ «ታኒ ኢሰራኤሌ አሳ ሳሎ ጸለንቲ ማላ ጮራሳና»
 ጌዲ ሂዶታ ቃላ አሚዳ ጌሻሰ ዳዊቲ ናምኡ ታማኔ ሃሳፌ ጋርሳራ
 ጌዲዳ አሳ ቆዲቤና።

24 ጹሪያ ና ኢዮኣቤይ አሳ ቆዳ ዶሚዴሰ ሺን ፖሊቤና፤ አሳ
 ቆዲዳ ጋሶን ጎዳይ ኢሰራኤሌ አሳ ቦላ ሃንቄቲዴሰ፤ ሃሳ ጌሻሰ
 ኢስታ ቆዳይ ካዎ ዳዊቲ ታሪኬ ማዘጋባን ጸፊቲቤና።

ካዎ አቆታ ቦላ አዋቲላን ሱሚዳይታ

25 ካዎ ኬላን ቡቁራ ዋሊዛ ሚንጃ ኬላ አላፌይ አዲኤሌ ና
 አዚሞቲ። ጋጸሬታን፥ ካታማታን፥ ሞላታኒ ና ጌሶ ሚጸታን ዲዛ
 ሚንጃ ኬላታ አላፌይ ኦዚያ ና ዮናታኔ።

26 ጎሻንቻታ አላፌይ ካሉቤ ና ኤዚሬ።

27 ዎይኔ ሚላ ቶኪዛሶሆታ አላፌይ ኤራማቲ ዴሬ አሰ ሺምኤ፤
 ዎይኔ ኡሹ ሚንጃዛሶታ አላፌይ ሻፋሜ ዴሬ አሰ ዛብዴ።

28 ሻራ ሚንጃታን ዙሞቡላታ ጸጸን ዲዛ ዎጋራ ሚሊኔ ዎላ
 ሚላታ ናጋናሰ አላፌቲላ ጋዴሬ ዴሬ አሰ ባኣሊ-ሃናኔሰ ኢሜቲዴሰ፤
 ዛይቲ ሚንጃዛ ኬላ አላፌቲላ ኢዮኣሳሰ ኢሜቲዴሰ።

29 ላሻርኔ ዴምባን ሄሜቲዛ ወዴ ሜሄታ አላፌቲላ ሳርኔ አሰ
 ሺዲራያሰ ኢሜቲዴሰ፤ ሾባን ሄሜቲዛ ወዴ ሜሄታ አላፌቲላ
 አዲላያ ና ሳፋጾሰ ኢሜቲዴሰ።

30 ጋሜላታ ቦላ አላፌቴሉ ኢስማኤል አስ ኦቢላስ ኢሜቲዴስ። ሃሬታ ቦላ አላፌቴሉ ሜርኖቴ አስ ዩሂዳዬስ ኢሜቲዴስ።

31 ዶርሳ ዉዴታኔ ዴይሻ ዉዴታ ናጋና አላፌቴሉ አጋሪ ዛሬ፤ ጊዲዳ ያዚዜስ ኢሜቲዴስ፤ ሃይቲ ኡባይ ካዎ ዳዊቲ አቆታ ናጋናስ አላፌቴሉ ኤኪዳ።

ካዎ ዳዊቲ ዞሪዛይታ

32 ዳዊቲ አዋ ኢሻይ ዮናታኔይ ጸፌ፡ አኬካንቻ አሳኔ ዞሪዛ አሳ፤ ሃኪሞኔ ና ዩሂኤሌይ ካዎ ናይታ ዲቺዛዴ።

33 አክጾፌሌይ ቃሴ ካዎዛ ዞሪዛዴ፤ አርኬ ዴሬ አስ ሁሼይ ካዎስ ሲቆ ላጌ።

34 አክጾፌሌ፤ ጉዬ ባናያ ና ዮዳሄይኔ አቢያታሬይ ካዎ ዞሪንቻ ጊዲዳ፤ ኢዮአቤይ ካዎ ኦላንቻታ ሃላቃታስ ጋዳዎ ጊዲዴስ።

28

ዳዊቲ ጸሳ ኬላ ኬጸናስ ኬሲዳ ሃልኝ

1 ኢስራኤል ቦላ አላፌቴሉ ዲዛ አሳቲኔ ኤሬቲዳ አሳቲ ኡባይ ዬሩሳላሜን ሺቃና ማላ ካዎ ዳዊቲ አዛዚዴስ፤ ሃሳ ጊሻስ ኦላ አሳ ቆሞን ቆሞን ካሌሊዛ ሃላቃቲ፡ ካዎ ኦላንቻታ ካሌሊዛ ኦላ ጋዳዋቲ፡ ሻላቃቲ፡ ማቶ ሃላቃቲ፡ ካዎ አቆታኔ ሜሄታ፡ ኢዛ ናይታ አቆታኔ ሜሄታ ቦላ አላፌቴሉ ዲዛይቲ፡ ካዎ ኬላ ሹሜቲ፡ ኤሬቲዳ ኦላ ቃራቲኔ ጊታ አሳቲ ኡባይ ዬሩሳላሜን ሺቁዳ።

2 ሂስቲን ካዎ ዳዊቲ ዴንዲ ኤቂዲ፡ «ታ ኢሻንቶ፡ ታ አሳቶ፡ ሲዩቴ! ኦ ጎዳ ታቦታይ ኡቲዛሶኔ ኦ ጸሳ ቶሆይ ሸምፒዛሶ ጸሳ ኬላ ኬጸናስ ታ ዎዚናን ቆፓዳ ሃልኝ ኬሳዲስ፤ ኬጸናስ ኮሺዛ ሚሻታካ ጊጊሳዲስ።

3 ጊዶ አቲን ጸሳይ ታና፡ ሳኒ ኦላንቻኔ ሱላ ጉሲዳ አስ ጊዲዳ ጊሻስ ታ ሱጎሳስ ኬላ ኬጸካ» ጊዴስ።

4 ታኒ ኢስራኤል ቦላ ሜርናስ ካዎታና ማላ ጎዳ ኢስራኤል ጸሳይ ታ አዋ ኬላ አሳ ኡባፌ ታና ዶሪዴስ፤ ካሌላና ማላ ኮይሮ ዩሁዳ ቆሞ ዶሪዴስ፤ ዩሁዳ ቆሞፌ ታ አዋ ሶ አሳ ዶሪዴስ፤ ታ አዋ ናይታ ጊዶፌ ታና ዶሪዲ ኢስራኤል ኡባ ቦላ ታ ካዎታና ማላ ኢዛስ ሼኔ ጊዲዴስ።

5 ጎዳይ ታስ ጮራ ናይታ ኢሚዴስ፤ ታ ናይታ ኡባፌ ጎዳ ጸሳ ካዎታ አራታን ኡቲዲ ኢስራኤል ቦላ ካዎታና ማላ ታ ና ሶሎሞኔ ዶሪዴስ።

6 «ቃሴካ ጎዳይ ታና፥ ሩታ ኬላ ኬጸናይኔ ታ ዛጎዛ ገረሳናይ ኔ ና ሶሎሞን፤ ኢዚ ታሰ ና ገዳና ማላ ታ ኢዛ ዶራዲሰ፤ ታኒካ ኢዛሰ እዋ ገዳና።

7 ኢዚ ሃኢ ኦሊዛይሳሉ ሲንላፊካ ታ አዛዞኔ ታ ዋጋ ሚኒ ናገሶ ታ ኢዛ ካዋቲላ ሜርናሰ ሚንላና፤ ገዳሰ።

8 «ሄሳ ገሻሰ ሃኢካ ጎዳ ዴሬ ዱላታይ፥ ኢሰራኤል አሳይ ኡባይ ቤኢሸኒኔ ኑ ጸሳይ ሲዩሸን፥ ኢንቲ ጎዳ አዛዞ ኡባ ኢንቲ ሚንሊዲ ናጋና ማላ ታኒ ኢንቲሰ ዮታይሰ፤ ሂሰቲኮ ኢንቲ ሃ ሎኦ ቢታ ላታናኔ ኢንቲ ናይታካ ሜርናሰ ላቲሳና።

9 «ታ ና ሶሎሞን፥ ኔ እዋ ጸሳ ኤራ! ኔኒ ኩሜላ ዋዚናኒኔ ሎኦ ቆፋን ኢዛሰ አላ፤ ጎዳይ ዋዚና ኡባ ፒልጊ ጸሌሰ፤ ገዶ ቆፋ ኡባ ኢዚ ኤሬሰ፤ ኔኒ ኢዛ ኮይኮ ኢዚ ኔሰ ቤታና፤ ገዶ አቲን ኔ ኢዛ አገዛ ገዲኮ ኢዚካ ኔና ሜርናሰ አጋጋና።

10 ጸሳ ኬላ ኬጸናሰ ጎዳይ ኔና ዶሪዳይሳ ዶጎፓ፤ ሚናዳ ኦሶዛ አላ» ገዳሰ።

11 ሃይሳፊ ጉዬ ዳዊቲ ባ ና ሶሎሞን ጸሳ ኬላ ኬጸናሰ ገግሲዳ ሃልቸዛ ኢሚዴሰ፤ ዳራንቻ፥ ቡቁራ ዋሊዛ ሚንጃ ኬላ፥ ፖቄዛኔ ገዶ ኪፊሌታ፥ ናጋራ ዉርሲዛሶዛ ዋሰቲ ኬጸናኮ ቤሲዛ ሃልቸዛ ኢሚዴሰ።

12 ቃሴካ ዳዊቲ ባ ዋዚናን ዲዛ ቆፋ ጸሳ ኬላ ዛጎ፥ ኢዛ ዩሸን ዲዛ ኪፊሌታ፥ ጸሳ ኬላ ቡቁራ ሚሻታ ዋሊዛ ሚንጃ ኬላታ ሃልቸዛ ኢሚዴሰ።

13 ሄሳላካ ዳዊቲ ቄሴታ ገሻ ኦሶኔ ሊዌታ ገሻ ኦሶ፥ ጸሳ ኬላን ኦሊዛ ኦሶታሰ ጎኤቲዛ ሚሻታ ዋሰቲ ጎኤታናኮ ቤሲዛ አዛዞ ኢሚዴሰ።

14 ቃሴካ ዳዊቲ ዱማ ዱማ ሚሻታ ሜጻናሰ አይ ኬና ዋርቃኔ አይ ኬና ቢራ ኮሺዛኮ ጸፊዲ ሶሎሞን ኢሚዴሰ።

15 ሄይቲካ ዋርቃ ጸምፔታ ዋሊዛ ባላኔ ዋርቃ ጸምፔታ፥ ቢራ ጸምፔታ ዋሊዛ ባላኔ ቢራ ጸምፔታ፥

16 ጸሳ ሲንላን ኡኬላ ዋሊዛ ዋርቃ ጸራጴዛታ፥ ቢራ ጸራጴዛታ፥

17 ዋርቃ ቃጴታ፥ ዋርቃ ኬሬታ፥ ዋርቃ ዋንጫታ፥ ዋርቃ ጸሮታ፥ ቢራ ጸሮታ፤

18 ኤጸኔ ጨዋሳናሰ ሙሩታ ዋርቃ፥ ጎዳ ታቦታ ቦላ ባንታ ቄፌ ሚጨዲ ካሚዛ ኪሩቤታ ዋሊዛ ዋርቃ ጋሬ ቤሲዛ ሃልቸ ኢሚዴሰ።

19 ዳዊት፡ «ጎዳይ ባ ኩሼ ታ ቦላ ዋሊዲ ሃ ጻፌቲዳ ሃልቾ ኡባ ታና ኤሪሲዴስ» ጌዴስ።

20 ሃይሳፌ ጉዬ ዳዊት ባ ና ሶሎሞን፡ «አይኮይ ባዋ ሚና! ኦሶዛ ዶማ! ጎዳ ታ ጸሳይ ኔናራ ዲዛ ጊሻስ ያዮፋ፤ ሂደታካ ቃንጾፋ! ጸሳ ኬላ ኦሶይ ፖሌታና ጋካናስ ጸሳይ ኔና ዬጌናኔ አጌና።

21 ጸሳ ኬላ ኦሶስ ቄሴቲኔ ሌዌቲ ጊጌቲ ኡቲዳ፤ ኡባ ሂላቴሐ ኤሪዛ አሳቲ ኔና ኦሶ ኡባን ማዳና፤ ሹሜቲኔ አሳይ ኡባይ ኔስ ኡባ ሚሻንካ አዛዜታና» ጌዴስ።

29

ጸሳ ኬላ ኬጸናስ ኢሜቲዳ አሞታ

1 ሃይሳፌ ጉዬ ካዋ ዳዊት ሸቂዳ አስ ኡባስ፡ «ጸሳይ ዶሪዳይ ታ ና ሶሎሞን፤ ኢዚ ዬላጋኔ ኦሶስ አማላ፤ ሃ ኬጾታና ኬላይ አሳ ኬሐ ጊዶንታ ጸሳ ኬሐ ጊዲዳ ጊሻስ ኦሶዚ ዴጾ።

2 ታኒ ታስ ዲዛ ዋልቃ ኬና ታ ጸሳ ኬላስ ዋርቃን ኦሴታናይሳስ ዋርቃ፡ ቢራን ኦሴታናይሳስ ቢራ፡ ጸርቂማላን ኦሴታናይሳስ ጸርቂማላ፡ ቢራታን ኦሴታናይሳስ ቢራታኔ ሚላን ኦሴታናይሳስ ሚሐ ጊጊሳ ዋላዲስ፤ ቃሴ ማርጊዴ፡ አምኔበሬዴ፡ ዲማ ዲማ ሜዳይ ዲዛ አሌቆ ሹቻታ፡ አልኦ ሹቻታኔ አንቁታ ጊጊሳ ዋላዲስ።

3 ታ ጸሳ ኬላ ታኒ ኬሂፔ ሲቁዛ ጊሻስ ታኒ ታ ጸሳ ኬላዛስ ጊግሲዳይሳፌ ሃራ ታስ ቡዞ ዲዛ ዋርቃፌኔ ቢራፔ ጌሻ ኬላስ አማዲስ።

4 ጸሳ ኬላ ጊምቤዛ አሌቂሳናስ 100,000 ኪሎ ጊራሜ ጊዲዛ ሙሩታ ዋርቃኔ 240,000 ኪሎ ጊራሜ ጊዲዛ ሙሩታ ቢራ አማዲስ።

5 ኦሳ ኦላና ሂላታስ ኮሺዛ ሚሸ፡ ዋርቃን ኦሴታናይሳስ ዋርቃ፡ ቢራን ኦሴታናይሳስ ቢራ አማዲስ፤ ሂስቲን ሃኛ አንቴፌ ባና ባ ሼኔን ጎዳስ አሐ አማናይ ኦኔ?» ጌዴስ።

6 ሂስቲን ኢስራኤሌ አሳስ ቆሞታ ኮራፒኔቲ፡ ቆሞታስ ቆሞታስ ኦላ ጋዳዋቲ፡ ሻላቃቲ፡ ማቶ ሃላቃቲኔ ካዋ ኦሳንቻታ ሃላቃቲ ባንታ ሼኔን ባስ ዲዛይሳ አሚዳ።

7 ኢስቲ ጸሳ ኬላ ኦሶስ 170,000 ኪሎ ጊራሜ ጊዲዛ ዋርቃ፡ 340,000 ኪሎ ጊራሜ ጊዲዛ ቢራ፡ 670,000 ኪሎ ጊራሜ ጸርቂማላኔ 3,400,000 ኪሎ ጊራሜ ጊዲዛ ቢራታ አሚዳ።

8 አልኦ ሹቺ ዲዛ አሳይ ኡባይ ቡቁራ ሚሻታ ናጊዛ ለዌ ጌርሾኔ ዛሬ ጌዲዳ ዩሂኤሌ ባጋራ ጎዳ ሚንጃ ከሐ ኤሂ ኢሚዳ።

9 አሳይ ባ ሼኔን ባ ኩሜላ ዎዚናፔ ጎዳሰ ኢሚዳ ጊሻሰ ኡፋዬቲዳሰ፤ ካዎ ዳዊቲካ ከሂ ኡፋዬቲዳሰ።

ዳዊቲ ጸሳሰ ሺሺዳ ጋላታ

10 ሄሳ ጊሻሰ ዳዊቲ ዲላታ ሺቂዳ አሳ ሲንፋን፥

«አቤት ኑ አዎ ጎዳ

ኢሰራኤሌ ጸሳዉ!

ሜሪፔ ሜርና ጋካናሰ ኔሰ

ጋላታይ ጌዶ።

11 አቤት ጎዳዉ!

ሳሎኒኔ ሳኣን ዲዛ

ኡባይ ኔሳ፤

ጌታቴሊ፥ ዎልቃይ፥

ቦንቾይ፥ ቱማይኔ

ፑላቴሊ ኔሳ።

12 ዱሬቴሊኔ ቦንቾይ

ኔፔ ቤቴሰ፤

ኡባይካ ኔሰ ሃሬቴሰ።

ዎልቃይኔ ሚኖታይ

ኔ ኩሼና፤

ኔኒ አሳ ኡባ ጌታሳናሲኔ

ሚንፋናሰ ዳንዳያሳ።

13 ሃኢካ ኑ ጸሳዉ!

ኑኒ ኔና ጋላቶሰ፤

ኔ ቦንቾ ሱንፋካ ሳቦሰ» ጌዲ

ጎዳ ጋላቲዳሰ፤

14 ዳዊቲ፥ «ኡባይ ኔፔ ቤቴዳሰ፤ ኑ ኔሰ ዛሬ ኢሚዳይ ኔ ኩሼፔ ኤኪዳይሳ፤ ሂሰቲን ኑኒ ሃይሳ ማላ ኢሞታ ኢማናሰ ታኒኔ ታ አሳይ ኦኔ?

15 ካሴ ኑ አዎታ ማላ ኑኒካ ኔ ሲንፋን ቤቴኔ ኢማላታ፤ ሃ ሳኣ ቦላን ኑ ዴኦ ላይሳይ ሂዶታይ ባይንዳ ኩዎ ማላ ኤሌ ኣጼሰ።

16 አቤት ጎዳ ኑ ጸሳዉ! ኔ ጌሻ ሱንፋሰ ከሐ ከጸናሰ ሺሺዳ ኡባይ ኔፔ ቤቴዳዛ፤ ሃይሲ ኡባይ ኔሳ።

17 «ታ ጸሳዉ! ኔኒ ዎዚና ፒልጋ ጸሊዛይሳኔ ሱሬቴሐ ደሲዛይሳ ታኒ ኤራይሰ፤ ታኒ ታ ሱሬ ዎዚናኒኔ ሎኦ ሼኔን ሃይሳ

ኡባ ኢማዲስ፤ ሃይሳን ዲዛ ኔ አሳይካ ኔስ ባ ሎኦ ሸኔን ኢሚዲ ኡፋዬተዳይሳ ታኒ ቤአዲስ።

18 አቤት ጎዳዉ! ኑ አዋ አብራሃሜ፥ ዪሳቃኔ ኢስራኤል ጸሳዉ! ኔ አሳ ዋዚናን ሃ ጊታ ሲቆዛ ሜርናስ ናጋ፤ ኢስታ ዋዚናይ ኔስ አማኔቲ ዳና ማላ ናጋ።

19 ኔ ዋጋ፥ ኔ አዛዞኔ ማራታ ናጋና ማላ ታኒ ጊጊሳ ዋሊዳ ሚሻታን ጸሳ ከላ ኢዚ ከጸና ማላ ታ ና ሶሎሞኔስ ኩሜላ ዋዚና አማ» ጊ ዋሲዴስ።

20 ሄሳፌ ጉዬ ዳዊቲ ዱላታ ሸቂዳ አሳስ፥ «ጎዳ ኢንቲ ጸሳ ጋላቲቱ» ጊዴስ፤ ሂስቲን ኡባ አሳይ ጎዳ ባንታ አዋታ ጸሳ ጋላቲዳ፤ ጎዳ ሲንላን ጉፋኒዲ ጎይኒዳኔ ካዋ ቦንቹዳ።

ሶሎሞኔ ካዋቲስ

21 ዋንቲላ ጋላስ አሳይ ጎዳስ ያርሾ ሺሺዳ፤ ጸጌቲዛ ያርሾካ ያርሺዳ፤ ሄሲካ 1,000 ኮርማታ፥ 1,000 ቶርሾታ፥ 1,000 ዶርሳ ላቃታ፥ ኡሻ ያርሾኔ ሃራ ያርሾታራ ኢሲፌ ኢስራኤል አሳ ጊሻስ ሺሺዳ።

22 አሳይ ሄ ጋላስ ጎዳ ሲንላን ከሂፔ ኡፋዬተሼ ሚዴሲኔ ኡዪዴስ፤ ሂስቲዲ አሳይ ካዋ ዳዊቲ ና ሶሎሞኔይ ካዋቲዳይሳ ናምእንላ ቆንጩራ ኤሪዳ፤ ኢዚ ዴራ አይሳና ማላ ጎዳ ጸሳ ሲንላን ዛይቲን ቲይዳ፤ ሳዶቄካ ኢስታስ ቄሴ ጊዳና ማላ ጎዳ ሲንላን ቲይዳ።

23 ሄሳፌ ጉዬ ሶሎሞኔይ ባ አዋ ዳዊቲ ሶሆን ጎዳ ካዋቲላ አራታን ኡቲዴስ፤ ኢዛስ ኡባ ሚሺ ኤኖ ጊዴስ፤ ኢስራኤል ኡባይካ ኢዛስ አዛዜቲዴስ።

24 ኦላ ጋዳዋቲ፥ ኤሬቲዳ ሚኖ አሳቲኔ ካዋ ዳዊቲ ናይቲ ካዋ ሶሎሞኔስ አዛዜታናስ ቃላ ጌሊዳ።

25 ጎዳይ ሶሎሞኔ ኢስራኤል አሳ ኡባ ሲንላን ቶቁ ቶቁ ሂስቲዴስ፤ ኢዛፔ ካሴ ኢስራኤል ካዋታስ ኢሜቲቤና፤ ቦንቾ ሶሎሞኔስ ኢሚዴስ።

ዳዊቲ ሃይቆ

26 ኢሴዬ ና ዳዊቲ ኢስራኤል ኡባ ሃሪዴስ።

27 ዳዊቲ ከብርኔን 7 ላይላ፥ ዬሩሳላሚን 33 ላይላ ካዋቲዴስ፤ ኢሲ ቦላ ኢስራኤል 40 ላይላ ሃሪዴስ።

28 ዳዊቲ ዳር ላይላ ዴኢዲ ዱሬቲዲ፥ ቦንቹቲዲ፥ ሎኦ ጨማ ጨሚዲ ሃይቂዴስ፤ ኢዛሶሆን ኢዛ ና ሶሎሞኔይ ካዋቲዴስ።

29 ዳዊቱ ካዎቴላ ላይላን ኮይሮፔ ደሚዲ ወርሴላ ጋካናሰ
ኦሴቲዳይሳ ናቤ ሳሜሊ፥ ናቤ ናታኔይኔ ናቤ ጋዴይ ጸፊዳ ታሪኬ
ማጻፋታን ጸፊቲ ኡቲዴሰ።

30 ኢዚ ዋሰቲ ሃሪዳኮ፥ ኢዚ ዋኒዳ ዎልቃማ አሳኮ፥ ኢዚ
አይ ሃኒዳኮ፥ ኢሰራኤሌ አሳይኔ ሄራን ዲዛ ካዎቴላቲ ኡሳይ
አይ ሃኒዳኮ ሄ ማጻፋታን ጸፊቲ ዴሰ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b